

Génesis

Srøsrø Pølbasrig

1 ¹Ke srøtø chigucha chigaaben, Tiusbe srømbalameranba, pirøwanba marig køn. ²Pirøbe mumay kuinguen asamgaig chiguchagaig pasrøben, pimerabe purø trømbø løstiig pinøgasraig pasrabig køn. Inchen Tiuswei Espíritube pi palawan llirabig køn. ³Tiusbe trenchibig køn: “Tør kønrrain” cha. Inchen tørbe misrøbig køn. ⁴Incha Tiusbe tørwane tab kui asha, tørwane løstøyugurri nuingui mendamarøbig køn. ⁵Tiusbe tørwane “kwaløm” cha wamappe, løstiigwane “yem” cha wamabig køn. Inchen maabenba løtsøba købig køn, tru srøsrø kwaløm.

⁶Katø Tiusbe trenchibig køn: “Larrø lendiig chiguchagaig kønrrain cha, tru pimeran nuingui, nuingui tarømartrabig tøbøtag pasrønrrai.”

⁷Incha Tiusbe tru larrø lendiig chiguchagaigwan marøbig køn, tru pimeran tarømarøbigwan. Tru pimera pala købelanba, umbu købelanba nuingui tarømarig kørrømisrtrai. ⁸Incha Tiusbe tru larrø lendiig chiguchagaigwane “srømbala” cha wamabig køn. Inchen maabenba, løtsøba køben, pa kwaløm købig køn.

⁹Katø Tiusbe trenchibig køn: “Srømbalamerai umbu pimera købeløbe kanbalatø misrtrain cha, pur kenamisrtrai.” Inchen treeg kuig køn.

¹⁰Incha purwane Tiusbe “pirø” cha wamappe, pimera kanbalatø misrigwane “marmera” cha wamig køn. Incha Tiusbe tabig kui asig køn.

¹¹Incha Tiusbe trenchibig køn: “Pirøbe misringarubash cha, pilli puzheelø chi kaumera køppe, treeg yellzheelø tøgar, mamig nigab tusrmera, chi tusr køppe, treeg yell truyu tøgar pirau treeg kønrrai. Inchen treeg kuig køn. ¹²Inchen pirøbe pilli puzheelø chi kaumera køppe, treeg yellzhig nigar, mamig nigab tusrmera yellzheelø truyu nigar misrøbig køn, nø chi tusr køppe, treekke. Inchen Tiusbe tabig kui asig køn. ¹³Inchen maaben misra, løtsøgualmaben, pøn kwaløm købig køn.

¹⁴Tiusbe katø trenchibig køn: “Tru srømbala larrø lendiig chiguchagaigube pilabelø kønrrain cha, kwalømwana, yemwanba tarømartrabelø, iiløbe chi utømera køben amrrubelan ashib kømig kønrrai, kwalømmerawan, pilamerawan.” ¹⁵Incha truiløbe srømbalasrø larrø lendiig

chiguchagaigu pilabelø kørnrain cha, pirøwan pilørnrrabelø.” Inchen treeg kuig køn. ¹⁶Tiusbe pagatø pilabelø nørreelan marig køn: tru pilabig larrø tørtiibe kwaløm piløben, pilabig tre tør kømíibe yem piløben inchai, katø nøbe kørnchabiimeragucha marig køn. ¹⁷Tiusbe tru srømbalamera larrø lendiig chiguchagaigu iilan põnsrøppe, pirøwan pilørnrrai põnsraig køn. ¹⁸Kwalømwán lata, yemwan lata pilamburab pilabeløbe nøm põnrørnrrai marig køn, tørwanba, løstiigwanba tarømartrabelø. Incha Tiusbe tabig kui asig køn. ¹⁹Inchen maaben misra, løtsøgualmaben pib kwaløm købig køn. ²⁰Incha Tiusbe trenchibig køn: “Pimerabe chigurrimbunø øsiguelø tøgagøbash cha, katø illimera tru pirøbalawan llirabeløgucha kørnrain cha, tru larrø lendiig chiguchagaigu srømbalamerawan amøñibelø.” ²¹Incha Tiusbe piyu ushamera kwaaramdø nørreelø marig køn. Chigurrimbunø øsiguelø kønab purrørnrrabelanba, chitøgucha nøm chimera køppe, treelø kørnrrai pimerabe treeg misringaruig køn, katø chigurrimbunø kwaldzariimera tøgargucha nøm chi køppe, treeløtøwein kørnrrai. Incha Tiusbe tabig kui asig køn. ²²Incha Tiusbe truilane mayanguen tabig kørnrrai marabe, trenchibig køn: “Larrø nørro tøgagøb, larrø nørro larrøbitchigay cha, marmerayu netsab, katø illimeragucha larrø nørro larrøbitchigay” cha. ²³Inchen maaben misra, løtsøgualmaben, truipe tratrø kwaløm købig køn. ²⁴Incha Tiusbe trenchibig køn: “Pirøbe øsiguelø misringarubash cha, kusreeg ushamera køben, namig ushamera køben, srala ambubelø køben, nøm chimera køppe, treelø kørnraingue.” Inchen treeg kuig køn. ²⁵Tiusbe namig ushamera nøm chimera køppe, treelø kørnrrai marøb, katø kusreeg ushamera nøm chimera køppe, treelø kørnrrai marøb, maya ushamera pirau sralig ambubelø nøm chimera køppe, treelø kørnrrai marøbig køn. Incha Tiusbe tabig kui asig køn.

²⁶Incha Tiusbe trenchibig køn: “Møg misag margun cha, nam mailø køben ke tre lataitøwein køb, katø nam lataitøwei isub, marøbelø kørnrrai. Incha maryu piyaumeran, srømbala amøñib illimeran, kusreeg ushameran, namig ushameran, pirau sralig ambub ushameran, truilø nun chinchaingaig, nø ashib tøga pasrørnrrain” cha.

²⁷Incha Tiusbe møywan marøppe nø maig køben ke tre lataitøwein kørnrrai marig køn. Pøs nøbe tre lataitøwein kørnrrai marig køn. Møg misag, ishug misag treeg marig køn.

²⁸Incha Tiusbe mayanguen tabig nebuilø kørnrigay chib, trenchibig køn: “Srøig larrøbitchabig yellmera tøgagøb, srøitø srøitø larrø nørro nemisrtrigay cha. Nimbe pirøwan netsøgana, pirøwane ñim ashib tøga põnrramisra, chinchaingaig ñim ashib karunrigay cha, maryu piyaumeran, pala amøñib illimeran, katø maya ushamera pirau srala ambubelan købengue.”

²⁹Incha Tiusbe trenchibig køn: “Asay cha, nabe ñimune pirau mamig nigab kauzheelø yellmera tøgartø kørnrrai tranar cha. Katø maya tusrmera mamig nigabelø, yell tøgarmera tranar cha, iibe kerriguba ñim

mab kômig kônrrai.” ³⁰Inchen pirau namig ushameranba, pala amõñib illimeranba, katø maya ushamera pirau srala ambubelanba, truilane pilli puzhigwan mab kômig tranar cha. Inchen treeg kuig kôn.

³¹Incha kerrigu Tius nø mariilan ashabe, truba truba tabig kui ashibig kôn. Inchen maaben misra, lõtsøgualmaben, trattø y kan kwaløm købig kôn.

2 ¹Inchen srømbalameranba, pirøwanba truyu kerriguh chi købelanba chab marig kørørmisrig kôn.

²Incha Tiusbe kerrigu nui maramigwan yandø patsøga, trattø y pa kwalømyube isrig kôn nø kerrigu chi marigwan. ³Incha Tiusbe tru trattø y pa kwaløm kônrrabyuigwane mayanguen tabig kônrrai mara, nuyasig kônrrai tarømara pasrøbig kôn, kaguende nø chigurrimbunø mara pønra tru kwalømbe nø isrig kua.

⁴Srømbalawan køben, pirøwan køben mara pønrrailan øyeeg købig kôn cha wamindig iig kôn.

Møg Misag Ellmarin Tulyu Inchen Jehová Pirøwanba Srømbalameranba Marmøwatøbe

⁵piraube ka nõtø kal-lab tusrmera chigucha kawei, chigucha kaumera kal-laig kawein købig kôn, kaguende Jehová Tiusbe piraumay srewan pungarumø srø køben. Inchagucha kwallchabig mu møg mugawein køben. ⁶Pibe piraugurri webarrub, pirø palawan kerrigu sømarøbig kôn. ⁷Inchen Jehová Tiusbe pirøyu usrøtøga møg misag mara, trugurrimbe øsiguig kônrrai kimyu urrøben, møøbe øsiguig misrig kôn.

⁸Incha Jehová Tiusbe Eden taisrø kan ellmarin tul mara pasrøbig kôn, tru pørr neeshibgatømayrø. Incha tru nø mari møwan truyu kørørmarøbig kôn. ⁹Incha Jehová Tiusbe chi tusrkurrimbunø chull asamdø tab tusrmera pirau kal-langarubig kôn, chull mamdø mamiimera nigabelø. Inchen tru tul tøbøtabe tru kwamø øsig køm tusrwanba, katø tru tabigwanba, kaigwanba nebua asam tusrwanba kal-langarubig kôn.

¹⁰Inchen tru Edenyugurrimbe pi webarrubig kôn tru tulwan sømarøb lulrrabig. Incha truyugurrimbe katø pippaløh pirisha webibig kôn.

¹¹Tru srøsrø pibe Pisón munchi købig kôn, truike tru Havila pirø muba kuimburab pøtøgatanwan pureb ibig køben, trusrømbe oro tøgaike.

¹²(Incha pirø muba kuimburab tru pirau orobe larrø tabig købig kôn, katø truyube mayzhig irrabig bedelio køben, ónice køben tøgaike.) ¹³Inchen tru wendau pibe Kihón taig, truike tru Cus pirø muba kuimburab pureb ibig kôn. ¹⁴Inchen tru pøn kônrrabyu pibe Tigris taig kôn, Asiria pirau pørr neeshibgatøwansrø pureb ibig. Inchen tru pib kônrrabyu pibe Eufates kôn.

¹⁵Incha Jehová Tiusbe møwan pera arrua, tru Edén ellmarin tulyu kørørmarøbig kôn, pirøwan kwallib ashib tsunrrai. ¹⁶Incha Jehová Tiusbe tru møwane trencha karua pasrøbig kôn:

—Tru tulyu chi tusryu mamiimerandøgucha ka manrrig cha.
 17Inchendø tru tabigwanba, kaigwanba nebua asamburab asam tusryu mamigwane manrrab kømø cha, kaguende tru tusryuigwan ñi mab kwalømbe isa kømø, ñibe kwanrrabguen— cha.

18Incha trugurrimbe Jehová Tiusbe trenchibig køn:

—Møg nõtø unamiibe chi tab kømøn cha, nun purugunrrabig nõ maig palain køben, treegwan martrab— cha. 19Incha Jehová Tiusbe maya ushameranba, illimeranba pirøwandøwei mara pønsra, møwei merrab pønsrøbig køn, chi munchi pønsramigwan nõ asha pønsrønrai. Inchen møg tru øsiguelan treeg munchi pønsra wamiiløbe tru munchin tøgær kørromisrig køn. 20Inchen møøbe maya ushamera namiguelan, pala amøñibelø maya illimeran, katø tru kusreeg ushameran mayamba munchi pønsrøbig køn. Inchen køben møywan nõ maig palain køben, treegwan purugunrrabiibe mugaabig køn.

21Inchen Jehová Tiusbe møywan purø mur kingarua, nõ kib tsumnebe kan tømbul tsutsigwan wesrawa, tru tsutsig wesrub kurigwane katøle treetøweih kasrøbig køn. 22Inchen Jehová Tiusbe tru tømbul tsutsig wesraigwane ishug misag mara, møyweimay pera arrubig køn. 23Inchen møøbe trenchibig køn:

—Iibe sí, nain tsutsigurrin tsutsig køb, katø nai asryugurri asr køb indan cha. “Ishug misag” cha wamig kønrrun chibig køn, kaguende nõbe møyweinukkurri wesraig køn— cha. 24Treekkurri møøbe møykawan, usran tarømisra, sraimba kandø misra, kan asrtø kønrrun.

25Møøba, ishuubabe pailøba køsaateelø købig køn. Inchendø chi kørig kui inchimeeløgue.

Adanba Evaba Mørmuig

3 1Inchen tru ulbe maya ushamera lataguen kømø, chigøben maramigwane purø may isua marøbig købig køn, Jehová Tius nõ mariiløyu. Incha tru ulbe ishuwane trenchibig køn:

—¿Kabe Tiusbe ñimungan tru ellmarin tulyuigwan ni møy tusryuigwanguen kerriguwan mamønrrain taig kuitarru?— cha.

2Inchen ishuube ulwane trenchibig køn:

—“Tulyu pønrrab tusryu mamiimerane ka manrrigay” taig køn cha.

3Inchendø tru ellmarin tul tøbøtag pasrab tusryu mamigwane Tiusbe øyeeg taig køn cha: “Mamønrrigay cha, ni katøramøwei inchigay taig køn cha, kwamig kømønrrai”.—

4Inchene ulbe ishuwane trenchibig køn: —Ñimbe kwamønrrabguen cha. 5Tiusbe asha køn cha, ñim tru tusryuigwan mab kwalømbe, ¡katø! chinetø nebua asamigwan ñimui isubig kuren, ñimbe Tius lataitøwein kønrrabguen cha, kaigwanba, tabigwanba nebua ashibelø.—

6Inchen ishuube tru tusryuigwan larrø chull mamdiig kui ashib, trurriugu tru tusryu mamiibe larrø mayzhig kønrraptiig kui ashib, katø chiwandøgucha larrø kusrebig kuinrrabna isumig purø chull kønrraptø tusr kui ashib inchibig køn.

Incha tru tusryu mamigwan nemørøb, maptinchibig køn. Inchabe kewangucha srørren, truikkucha mabig køn. ⁷Inchen mømibe tru pailanba, jkatø! chineto nebua asamigwan nømui isubiibe kurøptinchen, nømbe køsaateelø købrain kui wetøgørra, nømbe higuera ishiimeran tsusha, sötøgasrailø marøbelø køn.

⁸Inchen yandø mawab misrøb pishi isig ichibig webarruben, tru ellmarin tulyu Jehová Tiusbe llirab arri møra, møøbe nui sraimba tusr utumerawansrø trubabelø køn Tius nø pasrainukkurri. ⁹Treendingucha Jehová Tiusbe møwan wamabe, payibig køn:

—¿Ñibe chu pasrøgu?— cha

¹⁰Inchene møøbe trenchibig køn:

—Tru ellmarin tulyu ñi llirab arri nabe mørøptindinaben, nane truba kørig køtan cha, kaguende nabe køsaatiig købrain købtinchen, treekkurri nabe trubar— cha.

¹¹Inchene Tiusbe trencha payibig køn:

—¿Ñune køsaatiig køn chabe, mu eshkata? cha. ¿Na mamønrrain taig tusryu mamigwan ñibe mappeendi?— cha.

¹²Inchen møøbe trenchibig køn:

—Tru ñi nan lincha pera uñchai trani ishug tru tusryu mamigwan nan srørren, nabe mar— cha.

¹³Inchene Jehová Tiusbe ishuwane trenchibig køn:

—¿Øyeebe chi margu?— cha

Inchene Ishuube

—Tru ul nan purø may wamincha isøben, nabe mar cha— trenchibig køn.

¹⁴Inchen Jehová Tiusbe tru ulwane trenchibig køn:

—Ñi øyee marikkurrindø maya ushamerai utu ñibe larrø trømbøig nebuig kønrrig cha, kusreeg ushamerai utu lata, namig ushamerai utu lata. Patsøtøgatø sraløb uña, ñi chugatig øsig tuingatiibe pirøyu usrøwan manrrig cha. ¹⁵Incha ishuuba ñibabe larrø ashig kømuindiyabelø kønrrai maramønrrun cha, ñuinukkurri amrrubeløba, katø ishuweinukkurri amrrubeløba. Incha tru ishug misagweinukkurri srøig srøig kurrab arrubiguig ñune turwan pusøbunøben, ñibe nune talunyu tsatchun— cha.

¹⁶Incha ishuwane trenchibig køn:

—Ñune unø tøgamisrøbyu pusrkwabigwan masken trømbøig pusrkwannrai nemaramønrrun cha. Purø trømbøig pusrkwai incha, ñui ureemeran tøgamisrtrabguen cha. Inchen ñi ureg tøgagukkøb chull isuibe ñui kewein køben, ñui keebe ñune nø karub nø ashchabig køn— cha.

¹⁷Incha møwane trenchibig køn:

—Ñi ñui srawei wamwan manchitanmaptø mørøb pasrøwa, na mamønrrig tain tusryu mamigwan ñibe main køn cha. Ñigurrindø pirøbe larrø trømbøig nebuig pasrønrrun cha. Ñi chugatig øsig tsumnegatiibe ñibe jkatø! isua møra marøb megawabe, truyugurri manrrabguen cha. ¹⁸Inchen pirøbe

tsøshambah, kaldusrmerabatø misren, mappe, kau umbu tusrmerandø manrrigay cha. ¹⁹Ñibe pøsra, pøsra mara mamig tøgagønrrig cha, ñi katøle pirøtøwei misramnegatikke, kaguendø ñibe pirøtøga mara pasrig køn cha. Ñibe pirø usrø kuig kōppe, katø ñibe usrøtøwei misrtrabig køn— cha.

²⁰Inchen Adánbe nui srawane Eva munchi pasrøbig køn, kaguende Evabe maya misagwei usrin kønrrabig kuimba.

²¹Jehová Tiusbe mōweimba, nui sraweimba kemelø ushamerai kalusmeran mara, kennøbig køn. ²²Incha Jehová Tiusbe trenchibig køn: “Møøbe mōimbe kan mōig køben nam lataitøwei misra pasramisrin køn cha, tabigwanba, kaigwanba nebua ashibig. Pøs, nui tasigwan larrøbitchain kōmøn, chibig køn, tru øsig kōm tusryu mamigwangucha nemøra, truigwan ma, managatig øsig kønrrab.” ²³Incha Jehovábe tru Edén tulyugurri nōmun webusrøbig køn. Incha pirøwan kwallchain pasrig køn, tru nun mara pasrin pirøwan. ²⁴Incha mōwan wambig wegucha, Edén tru tulyu pørr kal labgatōmay querubinmera pønsra, katø kan espada naarabig amburab, iburab llirabig pasrøbig køn, managatig tru øsig kōm tusryumay ambam maywan pumønrrai martrab.

Cainba Abelba

4 ¹Adanbe nui srai Evaba unø tøgagønrrab pailø waramisrøbelø køn. Incha Evabe kwanrriig kōrrømisra, Cain kal labene, trenchibig køn: “Na unø tøgagømig Jehová treeg kønrrain køben, kan mōg-unø tøgaguinatan” cha. ²Incha katø wendøbe Cainwei nuneg Abelwan tøgamisrig køn. Abelbe ubisha ashibig køben, Cainbe pirøwan kwallibig kuig køn. ³Inchen kan maya yana kōsrøn puraiben, Cainbe Jehováwan ketamig nui kwaliiløygurri srua arrubig køn. ⁴Inchen Abelgucha nui ubishamera ke srøsrø lluilan srua arrubig køn, sebowanba. Inchen Jehovábe Abelwanba tru nui kettrab srua arrigwanba truba tab kui ashibig køn. ⁵Trune Cainwane tab kui ashmuig køn, tru nø keta tranigwan chigucha. Inchen Cainbe truba trømbøig namuben, nui maløbe ke minchiptinchibig køn.

⁶Trenchene, Cainwane Jehovábe trenchibig køn:

—¿Chindimbarre namøgu? cha. ¿Chindimbarre ñui maløbe ke peg misrøptinnda? cha. ⁷Ñi sōlwan isua marig kuimbe, ñibe utsøbasrmø kurraasha pasrabsruinrrun cha. Inchendø ñi sōlwan isua marmuikkurrimbeh, kaigwan matrai inchabiibe ñun megambunrrab ¡katø! muniitø pasran cha. Inchen køben ñibe tru kaig marmumigwane ñi kananrrabguen— cha.

⁸Cainbe nui nuneg Abelwane trenchibig køn:

—Chugøben lliranrrab amun— cha. Indig yandø tru llirab amønaisrømbe Cainbe nui nuneg Abelwan namappe, kweechibig køn.

⁹Inchene Jehovábe Cainwane trencha payibig køn:

—¿Ñui nuneg Abelbe chu unah?— cha. Inchen nøbe trencha løtabig køn:

—Chindindøbeh cha. ¿Nagan nai nunewan ke tru ashib wendautø pasrabig kuitarru?— cha.

¹⁰Inchene Jehovahé trenchibig køn:

—¿Chi margu? cha. Ñui nunewei animbe piraugurri trashib nan wamøtan cha. ¹¹Ñibe larrø trømbøig nebuinanrrabig kørrømisrøb, tru ñui nuneg Abelwan ñi kweechen ani lusigwan muchib piraugurri ñune webya inrrai wegutsig kørrømisrøb inchabguen cha. ¹²Pirøwan kwallib megaingucha, yandø mamig misrønrrabig køn cha. Inchen ñibe piraube punø panrrø, punø panrrø ka lliraitø, lliraitø chuguen tsub tsumibe chigaig kønrrabguen— cha.

¹³Inchene Cainbe Jehovaháwan trenchibig køn:

—Nan øyeeg møra pasrønrrai mariibe purø nuig køtan cha, pasramguengaike. ¹⁴Møi na tsuinukkurri yandø nan weguchen; ñui merrabgurrimbe møimbe trubatø unamønrrun cha, pirø muba kuimburab lliraitø, lliraitø chuguen tsub tsumig chigaikke. Inchen mugøben nan ashibiibe nane kwetchautan— cha.

¹⁵Inchene Jehovahé trenchibig køn:

—Møikkøben Cainwan kweechibiibe siete pijisken purab trømbøig nebuin pasrønrrun— cha. Incha Jehovahé Cainwane kan siñal asamdiig tøgag kønrrai marøbig køn, mugøben ashagucha, nune kweechimønrrai. ¹⁶Incha Cainbe Jehovahéwei merrabgurri yandø tarømisra ya, Nod tain pirau Edén pørr kalabgatømayrø tsubig køn.

Cainweinukkurri Amrrub Misaamera

¹⁷Cainbe nui sraimba unø tøgagønrrab pailøba waramisrøbelø køn. Inchen sraimbe kwanrriig kørrømisra, unø tøgamisrig køn, tru Enocwan. Incha Cainbe kan ciuda mara pasrabe, truigwane tru nui nusrkai Enocwei munchin pasrøbig køn. ¹⁸Incha Enocbe kan nusrkai Irad taig tøgaguig køn. Inchen tru Iradbe Mehujaelwei møskain køben, Mehujaelbe Metusaelwei møskain køben, Metusaelbe Lamecwei møskain kuig køn.

¹⁹Incha Lamecbe nuyasig pagatø ishumburmera tøgaguig køn. Kan ishuwei munchibe Ada købene, katøgan ishuwei munchibe Zila købig køn. ²⁰Adabe kan unø tøgamisrig køn, tru Jabalwan. Tru merrabsrø kølli misag Jabalweinukkurri pølbasa amrrub mendig kuig køn, carpa lasrue pønrrailøyu warab, katø nømbe ushamera karrøgøb inchibelø. ²¹Jabalbe kan nuneg Jubal taig tøgag køben, tru merrabsrø kølli misag Jubalweinukkurri pølbasa amrrub mendig kuig køn, mayeelø arpa kønabeløba, lus urrabeløba. ²²Inchen Zilagucha Tubal-Cainwan tøgaguig køn. Truiibe chigurrimbunø bronce tsandzøntøgaba, hierro tsandzøntøgaba larrø tabelø marøbig kuig køn. Katø Tubal-Cainwei nuchaabe Naama købig køn.

²³Kan piji Lamecbe nui sralan trenchibig køn:

—Adaba, Zilaba, nai wamwan mørtray cha. Lamecwei sralø, nai wamwan tab mørtray cha. Nan kørriinchen, nabe kan møwan kweechib,

nan mur kebachen, nabe kan matsinan kweechar cha. ²⁴Cainwanma siete pijisken purab trømbøig nebunrrai pasrig kuibe, Lamecbe sietebato setenta pijisken treetø treetø purab trømbøig nebuin pasrønrrun” cha.

²⁵Adánbe nui sraimba unø tøgagønrrab pailøba waramisrøbelø køn.

Incha Evabe kan nusrkai tøgagua, trunune Set munchi pasrig køn. “Tiusbe nane katøgan nusrkai trandan cha, Cain Abelwan kweetsig købene truburø tøgagønrrai.” ²⁶Incha Setgucha kan nusrkai tøgagua, truigwane Enós munchi pasrig køn.

Indig truyugurrimbunø yandø møgueløbe Jehováwei munchiwan wamab miabelø køn.

Adanweinukkurri Amrrub Ureemera

5 ¹Iig køn tru Adánweinukkurri amrrub misaameran munchin merrarrailø, Tius mowan nø mara pasrøb kwalømbe, mowane Tius lataitøwein kønrrai marig køn. ²Incha møøba ishuuba kønrrai Tiusbe treeg mara pønsra, katø mayanguen tabig nebuilø kønrrai mara, tru nø mara pønrsøb kwaløm “Adan” cha wamig køn.

³Adanbe pilamera ciento treinta tøgagua kan nusrkai tøgaguig køn chiyutøgucha nø lataitøwei, treeg unø. Incha truigwane Set munchi pasrig køn. ⁴Adanbe Setwan tøgaguinukkurimbunø pilamera ochocientos tøgagig kua, nusrkalø køben, nimbasrmera køben tøgaguig køn. ⁵Inchawei Adanbe pilamera novecientos treinta tøgagua, yandø kwaig køn.

⁶Setbe pilamera ciento cinco tøgagua, nusrkai Enóswan tøgaguig køn. ⁷Setbe Enóswan tøgaguinukkurimbunø pilamera ochocientos siete tøgagig kua, nusrkalø køben, nimbasrmera køben tøgaguig køn. ⁸Inchawei Set kerrigu øsig tsuin kwalømmerabe pilamera novecientos doce kuig køn. Inchen yandø kwaig køn.

⁹Enósbe pilamera noventa tøgagig kua, kan nusrkai tøgaguig køn, Cainán taig. ¹⁰Enósbe Cainánwan tøgaguikkurimbunø pilamera ochocientos quince tøgagig kua, nusrkalø køben, nimbasrmera køben tøgaguig køn. ¹¹Inchawei kerrigu Enós øsig tsuin kwalømmerabe pilamera novecientos cinco køben, yandø kwaig køn.

¹²Cainánbe pilamera setenta tøgagig kua, nusrkai Mahalaleelwan tøgaguig køn. ¹³Cainánbe Mahalaleelwan tøgaguikkurimbunø pilamera ochocientos cuarenta tøgagig tsua, nusrkalø køben, nimbasrmera køben tøgaguig køn. ¹⁴Inchawei Cainán kerrigu øsig tsuin kwalømmerabe pilamera novecientos diez køben, yandø kwaig køn.

¹⁵Mahalaleelbe pilamera setenta y cinco tøgagig kua, nusrkai Jaredwan tøgaguig køn. ¹⁶Incha Mahalaleelbe Jaredwan tøgaguikkurimbunø pilamera ochocientos treinta tøgagig kua, nusrkalø køben, nimbasrmera køben tøgaguig køn. ¹⁷Inchawei Mahalaleelbe kerrigu øsig tsuin kwalømmerabe pilamera ochocientos noventa y cinco køben, yandø kwaig køn.

¹⁸Jaredbe pilamera ciento sesenta y dos tøgagig kua, nusrkai Enócwan tøgaguig køn. ¹⁹Jared Enocwan tøgaguinukkurrimbunø pilamera ochocientos tøgagig tsua, nusrkalø køben, nimbasrmera køben tøgaguig køn. ²⁰Inchawei Jared kerrigu øsig tsuin kwalømmerabe pilamera novecientos sesenta y dos køben, yandø kwaig køn.

²¹Enocbe pilamera sesenta y cinco tøgagig kua, nusrkai Matusalénwan tøgaguig køn. ²²Matusalénwan tøgaguinukkurrimbunø Enocbe Tiusba maig unamig køben, treeg uñibig kuig køn, pilamera trescientos tøgagig. Incha nusrkalø køben, nimbasrmera køben tøgaguig køn. ²³Inchawei Enoc kerrigu øsig tsuin kwalømmerabe pilamera trescientos sesenta y cinco tøgaguig køn. ²⁴Enocbe Tiusba maig unamigwan unig køn. Incha chindinguen asiimíig pinaptindig kuig køn, kaguende Tius nune øsiibatø pera iben.

²⁵Matusalénbe pilamera ciento ochenta y siete øsig tsua, nusrkai Lamecwan tøgaguig køn. ²⁶Incha Matusalénbe nusrkai Lamecwan tøgaguinukkurrimbunø pilamera setecientos ochenta y dos tøgagig tsua, nusrkalø køben, nimbasrmera køben tøgaguig køn. ²⁷Inchawei Matusalén kerrigu øsig tsuin kwalømmerabe pilamera novecientos sesenta y nueve køben, yandø kwaig køn.

²⁸Lamecbe pilamera ciento ochenta y dos øsig tsua, kan nusrkai tøgaguig køn. ²⁹Incha truigwane Noé cha wamig køn, kaguende nøbe trenchibig køn: “Jehová pirøwan larrø trømbøig nebunrrai mara pasrim pirau, nam chi mariiløyu purø trømbøig murig pui melaigugurri namun i unøbe chairannrrun” chib. ³⁰Incha Lamecbe nusrkai Noéwan tøgaguinukkurrimbunø pilamera quinientos noventa y cinco tøgagig tsua, nusrkalø køben, nimbasrmera køben tøgaguig køn. ³¹Inchawei Lamec kerrigu øsig tsuin kwalømmerabe pilamera setecientos setenta y siete køben, yandø kwaig køn.

³²Noébe pilamera quinientos tøgagig kua, pøngatø nusrkalø tøgaguig køn: Semwanba, Camwanba, Jafetwanba.

Misaamera Larrø Kaig Marøb

6 ¹Inchen yandø møguelø pirau truørø larrøbichib menda, nømbe nimbasrmera tøgagøb mendig køn. ²Inchen Tiuswei nusrkaløbe, tru Tiuswan ashmø misaamerai nimbasrmerabe truba truba tabzheelø kua asha, tru utu mas tab ishumburmeran lawa, nømuyasig sralø marøbelø køn. ³Inchene Jehovábe trenchibig køn: “Nai Espiritube misag øsig kønrrai nuinuube managatikkuha pasrønrraamøn cha, kaguende møøbe patsønrrabig ka treetø køn cha. Inchawei nøbe øsig tsumibe pilamera ciento veintebe tøgagønrrun” cha.

⁴Tru kwalømmerawane purø nørrø møguelø warabig køn, larrø nørreelø. Inchen katø tru Tiuswei nusrkaløbe tru møguelai nimbasrmeraba kasharawa, ureg tøgaguig køn. Inchen tru i møgueløbe chish møguelø chiyugucha kørmeelø købig køn, truiløbe merrabsrøngurri mumera kuilan nebua asi misaamera.

⁵Inchen Jehovábe ashibig kòn pirau misaamera larrø trømbøig marøb amrruibe chi lamøtiig kømø, purø nuig kui, nømui manrraube chu uragucha kerrigu chi isuiløbe kaigwandø, kaigwandø isubelø kuikkurri. ⁶Inchen Jehovábe yeekkucha kuitamab isubig kòn, pirau misagwan tsunrrai marigwan. Nui manrraube purø kørrø isub pusrkwabig kòn. ⁷Incha Jehovábe trenchibig kòn: “Misagwan mara pønssrailan chigucha kaanrrai patsøgønrrab cha, misagwan lata, ushameran lata, srala amøñibelan lata, pala amøñib illimeran lata. Karrenguitamab isur cha, øsig kønrrai na mariilan.” ⁸Inchen køben Noébe Jehováwein kabyu nøbe tabig kui asig kuig kòn.

Noé Arcan Marøb

⁹Ig kòn, Noéwan maig pureb arrigwan waminchibig:

Noébe sølgandø maig maramigwan marøb, nøbaguetøtø nørrørawarmerai utu nøbe sølgandø maig maramigwan marøb, katø Noébe Tiusba maig unamig køben treeg unibig købig kòn. ¹⁰Noébe pøngatø nusrkalø tøgaguig kòn: Semwanba, Camwanba, Jafetwanba. ¹¹Inchen piraube larrø trømbøig minchib, katø melambuyab kalø marig truitø netsain pasrabig kòn Tiuswei merrab. ¹²Tiusbe pirøwan ashene, tuyube larrø trømbøig mincha pasrabig kòn, kaguende maya misaamerabe larrø trømbøig mincha pasrøben tru nømui amønainug. ¹³Inchen Tiusbe Noéwane trenchibig kòn:

—Maya misagwan øyandø kønrrai nabe treeg isur cha. Kaguende nømgurrindø pirøbe larrø trømbøitø netsaim pasran cha. Incha nømune pirøwanbañau pinishinrrab cha. ¹⁴Incha ñibe gofer tsiitøga kan arca mar chibig kòn. Incha tuyube cuartomera mara, umbuwan lata, wambigwan lata, pi larraimønrrai brea srølrrig cha. ¹⁵Incha marøppe, øyeg martrig chibig kòn: Yammaybe ciento cuarenta metrosig, lendømaybe veintitrés metros tøgagig køben, palamaybe catorce metros tøgagikke. ¹⁶Incha arcane pøn itøniisraig mara, pala patsabsrøngurri pinag cincuenta centimetrosyuh pendanarrab pasrtrig cha. Incha mumay malømay køben kan yaskab pasrtrig cha. ¹⁷Kaguende nabe pirau pi pulab arrubig ørtrab kur cha, tru srømbala umbuwan chigurrimbunø øsig warabelan pinishinrrai. Inchawei pirau chigurrimbunø købiibe chishtø pinønrrun cha. ¹⁸Inchendø nabe ñune øyamay pasramønrrun cha, ñibe ñui sraimba, ñui nøsrkaløba ñui nusrkalai sraløba tru arcayu kebamrrigay cha. ¹⁹Incha chigurrimbunø øsig købigwan trumørig truilan parchig, parchig kebambingarunrrig cha, chi ushamerandøgucha, kan ishuuba, kan møøba, ñiba øsig kønrrai. ²⁰Chi illimerandøgucha, chi ushamerandøgucha, sraløb amøñibelangucha trumørig parbatø øsig kønrrab ñiba kebamrrun cha. ²¹Incha nøm chi mabelø køben, chi mamikkurrimbunø ñi tulisha, esegau cha, truilaimba, ñuimba mab kømig kønrrai. ²²Inchen Noébe Tius maig karuigwan kerriguh treeg marøbig kòn.

Pirau Pi Pulab Netsab Arrubig

7 ¹Incha Jehovábe Noéwan trenchibig kòn: —Ñiba ñui yaeløba arcayu kebinrrø cha, kaguendø nai merrab ñundøwei sølgandø tabigwan marøbig kui ashar cha, mõi misaamerai utu. ²Inchen chi ushameratøgucha tabig chishelane trattrø y pagatøbatø møg ushameraba, trattrø y pagatøbatø ishug ushameraba kertrig cha møøba ishuuba, møøba ishuuba. Inchen chi ushameratøgucha chishig kømeeane, kan møøba, kan ishuuba, pagatø, pagatø kertrig cha. ³Katø treetøwei pala illimerangucha, trattrø y pagatøbatø kertrig cha, møøba, ishuuba, pirau tru illimeran piniimíig tøgagønrrab. ⁴Kaguendø trattrø y pa kwalømyube yu pirau kwalømmera cuarenta, yemmera cuarenta purayamne sre pungarumønrrun cha. Na mariilø chigurrimbunø øsig købigwane kerrigu chish paluuncha pinisamønrrun cha.

⁵Inchen Noébe Jehová maig karuigwan kerriguh treeg marøbig kòn.

⁶Tru uras Noébe pilamera seisientos tøgag købig kòn, tru pi pulab arrubig pirøwan chishtø kasrøb arrub uras. ⁷Inchen Noébe nui srain køben, nusrkalø køben, yernamera køben arcayu kebibig kòn, tru pi pulab arrubigugurri kwamø, øsig webinrrab. ⁸Inchen chi ushameratøgucha tabig chishelø lata, chishig kømeeelø lata, pala amøñib illimera lata, katø pirau srala amøñibelø lata ⁹Noéba arcayu kebambubelø kòn, parbatø, parbatø, møøba ishuuba, møøba ishuuba, Noéwan Tius mandø karuig, treekke. ¹⁰Indig tru trattrø y pa kwalømyu tru pi pulab arrubiibe pirau chishtø kasrøb netsab arrub mendabig kòn.

¹¹Inchen Noéwei øsig tsuin pilamera seisientos køben, tru pila kebyaig pa pølyu diecisiete kwalømh, tru marmera mas purø nørreelø umbusrøngurri chab wesurrøben, tru srømbalæsø pimeran katab pønrrabelan truilangucha kuren, ¹²piraube yemmera cuarenta, kwalømmera cuarenta purayamne sre arrubig kòn.

¹³Inchen tru kwalømh arcayu kebambig kòn Noé køben, nui nusrkalø Sem køben, Cam køben, Jafet køben, Noéwei srain køben, nusrkalai pøngatø sralø købengue. ¹⁴Incha nømba kebambubelø kòn, tru kau umbu namig ushamera trumørig, kusreeg ushamera trumørig, pirau srala ambub ushamera trumørig, katø illimera trumørikke, katø kwaldzariibarmera købendø pala ammeelø købengue. ¹⁵Øyeeg kebambig kòn arcayu Noéba, chigurrimbunø øsig købeløbe parbatø, parbatøgue. ¹⁶Inchen tru kebambubeløbe trumørig ishuuba, møøba kebambig kòn, Tius maig karuig, treekke. Inchen Jehovábe yaskabwan yandø kasrøbig kòn.

¹⁷Inchen pirau tru pi pulab arrubiibe kwalømmera cuarenta nemisramnegatig pulab iben; pimera pulab menda, tru pimerabe arcane piraugurri pala kusruig kòn. ¹⁸Inchen pimerabe pirau nurabig nurab arruben, arcabe pi palawan uñibig kòn. ¹⁹Inchen pimerabe piraube truba truba pulab nebib iben, maya srømbalamerai umbu tunmera purø paleelø pønrrabeløguen chishtøh pinøgasraig kørømisrøbelø

køn. ²⁰Inchen tru purø pala tunmerawan pimera chab pinøgasrainukkurri katøgucha pimerabe palabunø siete metros purab neguchib pulabig køn. ²¹Inchen chigurrimbunø pirau øsig warabeløbe kerriguh chab kwabig køn, illimera lata, ushamera kusreeg ushamera lata, namig ushamera patsøtøga srala ambubelø lata, trugurri maya misaamera lata. ²²Inchen chitøgucha kimrrabmay israbig øsiguelø pirau warabeløbe mayambah chishtø kwaig køn. ²³Øyamay chimeratøgucha pirau øsiguig warabeløbe chab pinisailø kuig køn. Misag lata, ushamera lata, patsøtøga srala ambubelø lata, katø pala amønib illimera lata pinisaig kørromisrig køn. Øsig kørromisrøppe, Noébah tru arcayu tru nøba kebambubeløtøwei øsig kørromisrig køn. ²⁴Inchen pimerabe tru pirø palawan kwalømmerna ciento cincuenta nemisramnegatig pi netsaig kørromisrig køn.

8 ¹Tiusbe Noéwanba, truyu kusreeg ushameranba, namig ushameranba kerriguba tru arcayu Noéba purrabelan isubig køn. Incha Tiusbe pirau kan isig ichibig arringaruben, pimerabe kørreb mendabig køn. ²Pimera pirø umbusrøngurri wesurrabeløbe kasrøben, tru srømbalasrø pimeran katab pønrrabelan kuriiløgucha kasrøben, srømbalasrøngurri sre arrubiibe yandø mas pumøben inchibig køn. ³Inchen pimerabe pirau lamøh, lamø kørreb ib mendøben, kwalømmerna ciento cincuenta puraiuben pimerabe chab lamørabig køn. ⁴Inchen tratrø y pa pøl misren, diecisiete kwalømh arcabe Ararat tunmerasrø pasramisrøbig køn. ⁵Inchen pimerabe pa tratrø pølgatig kørreibig kørreb arruben, tru pa tratrø pøl ke srøsrø kwalømyuh tru nørø tunmerain pala yuumerabe kenamisrøbig køn.

⁶Indig truyugurrimbunø kwalømmerna cuarenta nemisren, Noébe tru nø mari arcayu pendanawan kura, ⁷kan yalø illiwan øren, truiibe yaitø, arriitø inchib uñibig køn pimera pirau kølamnegatig. ⁸Incha katø kan palomangucha inrrai ørøbig køn pirau pimera køliitashchab ashchab. ⁹Inchen palomabe arcayumay katø arrubig køn, kaguende ni chugucha punamig chi kaaben. Pimerabe katøgucha pirø palawan kasraig srø køben. Inchen Noébe nui kwalwan yuula, paloman kemøra, katø umbu kesrubig køn. ¹⁰Incha kan trune muniirawa, paloman arcayugurri katø inrrai ørøbig køn. ¹¹Indig tru palomabe maaben misrøb køben arruppe, kan olivo ishiizhig kimtsigu mutaig arruptinchen, Noébe pimera pirau yandø chab kølin kui wetøbeñibig køn. ¹²Incha trugurrimbunø katøgan trune muniirawa, katø paloman øriibe, yandø katøle truiibe nuimay arrumøtø, pinab pinabig køn.

¹³Noé øsig tsuin pilamerabe seiscientosba kan pilaba køben, tru srøsrø pølyu ke pølbasrøb kwalømyuh pimerabe pirau chishtø chab kølabig køn. Inchen Noébe tru arcayu pala kasraigwan kusrua ashene, møimbe pirøbe yandø pur køptinchibig køn. ¹⁴Inchen katø tru wendø pølyu tru veintisiete kwalømyube pirøbe yandø kerrigu pur købig køn. ¹⁵Inchen Tiusbe Noéwane trenchibig køn:

¹⁶—Arcayugurri ñiba, ñui sraimba, ñui nusrkaløba ñui nusrkalai sraløba webambay cha. ¹⁷Incha ushamera tru ñiba purrabelangucha mayamba

chishtøh wer chibig køn; maya illimeran køben, ushameran køben, katø pirau srala amøñibelan køben, pirau ørøba truørø amrrain cha; pirau yellmera purø norrø misrøb purø nu larrøbichib amrrain— cha.

¹⁸Inchen Noébe nui nusrkaløba, nui sraimba, nusrkalai sraløba webarrubig køn. ¹⁹Inchen kerrigu ushamera køben, srala amøñib ushamera køben, illimera køben, pirau chimera køben øsig købeløbe trumørig, trumørig arcayugurri webambubelø køn.

²⁰Incha trugurrimbe Noébe Jehováweyasig kan altar mara, tabig chish ushameran møigwanguen palab kømø, kerriguba, katø chish illimeran møigwanguen palab kømø, kerriguba, altarbala chishtø parrøb Jehováwan keta tranøbig køn. ²¹Inchen larrø mayzhig irrabig nuinug puben, Jehovábe trenchibig køn: “Misakkurrindø pirøwane managuen katølebe larrø trømbøig nebuim pasrønrrai marmumønrrun cha, kaguende møwei manrøbe shushkurrimbunø kaigwandø, kaigwandø martrab isubelø køn cha. Katø chigurrimbunø øsig købigwane katølebe kerriguba pinishimumønrrun cha, møi lataibe.

²²Pirøbe ka pasraingatiibe ellmariilø køb, ellmariilan tulisamelø køb, chu urastøgucha pachig købig køb, pishin købig køb inchun cha. Chu urastøgucha sre pølmera køb, kwarø pølmera køb, katø yemmera køb, kwalømmera køb inchun” cha, trenchibig køn.

Tiusbe Noéba Øyamay Kønrrai Martrab Cha Kørrømisrig

9 ¹Tiusbe Noéwanba nui nusrkalanba mayanguen tabig nebuilø kønrrai trana, nømune trenchibig køn:

—Uremera norrø tøgagøb pirøwan netsøganrrigay cha. ²Pirau chi ushameratøgucha ñimune larrø kørig kuinchib kwartrun cha. Pala illimeran lata, pirau chigurrimbunø øsig warabelan lata, maryu piyaumeran lata, ñim ashib tøgagønrrai nabe ñimui tasku pønsrar cha. ³Chigurrimbunø kønabig øsiguelø købiiba, katø mamig tusrcheeløbabe ñim mab kømig kønrrun cha. Iigwan kerrigu na ñimun tranar chibig køn. ⁴Inchendø yau animbaigwan aniwan lusøskaimfigwane mamønrrigay cha, kaguende øsig kømibe aniyuweim pasran cha. ⁵Inchawei nabe tru ñimui øsig kui aniwane nabe ulø payamønrrun chibig køn. Ushamera pinisaig kui lata, kabe møguelai tasku pinisaig kui lata truigwane ulø payamønrrun cha. Nui mendaigwei øsig kuigwan pinishibigwane mu mowandøgucha ulø payamønrrun chibig køn.

⁶Inchawei møikkøben misag aniwan lushibigwane nui aniwangucha katøgan møg lusig kønrrain køn cha, kaguende møøbe Tius maig køppe, treetøwein kønrrai marig kuig kua.

⁷Trune ñimbe ureg norrø tøgagøb, larrø norrø larrøbitsay chibig køn, pirau purø norrø misag karrab, pirau netsøganøb.—

⁸Incha Tiusbe Noéwanba nui nusrkalanba katø treekkucha taig køn:

⁹—Nabe ñimba, katø ñuikkurri amrrub misaameraba øyamay kønrrai martrab cha kørrømaramønrrun cha, ¹⁰katø tru chigurrimbunø øsig købelø

ñimba pønrrabelø, kerrigu tru arcayugurri werrubelø: tru illimeraba, kusreeg ushameraba, namig ushameraba, pirau maya ushameraba. ¹¹Nabe ñimba øyamay kønrrai martrab cha pasramønrrun cha, nabe kerrigu øsig warabelan pi pulab arrubiitøgabe katølebe chishtø pinishinrrab kømur cha. Ni katø pirøwan pinishinrrab pi pulab attrabig katølebe chigaanrrabig køn— cha.

¹²Incha katø trenchibig køn:

—Tru ñimba, katø trugurri tru chigurrimbunø chi øsig købeløba tru managatig na øyamay kønrrai martrab cha pasrigwan isunanøb eshkað pasrønrrabiibe iig køn cha:

¹³Nai køshømbøtøn nabe wañiyu pasrar cha, iibe pirøba na øyamay kønrrai martrab cha pasrigwan treeg kuitamab ashib kømig kønrrai pasrønrrabig. ¹⁴Inchawei wañiwan na pirau pibøndøzhiibaig arringarubene, tru køshømbøtøbe wañiyu kenamisrtrun cha. ¹⁵Inchen nabe ñimba katø chigurrimbunø øsig købeløba tru na øyamay kønrrai martrab cha pasrigwan isumønrrun cha. Chigøben øsig købelan pinishinrrabig pi pulab arrubiibe katølebe kaanrrun cha. ¹⁶Inchawei køshømbøtø wañiyu kenamisrimørig maya misaameraba, katø i pirau kerrigu øsig købeløba tru na managatig øyamay kønrrai martrab cha pasrigwan isumønrrun— chibig køn.

¹⁷Incha Noéwan trendaig køn:

—Maya misaameraba, pirau chigøben øsig købeløba tru na øyamay kønrrai martrab cha pasrigwan treeg kuitamab asamiibe, iig køn— cha.

Noéwei Nusrkalø

¹⁸Noéwei nusrkalø arcayugurri webambubeløbe Semba, Camba, Jafetba køn. Inchen Cambe Canaánwei møskain kuig køn. ¹⁹I tru pøngatøbe Noéwei nusrkalø kuig køn. I tru pønelainukkurri amrrub misaamerayugurri pirau muba kuimburab misag netsaig køn.

²⁰Incha Noébe pirau kwallib menda kan uvas ellguain tra marøbig køn. ²¹Indiibe kan piji Noébe vino mucha mutsiirawa, tru nui carpa yau kebya, peña tsumisrøppe, køsaatiig tsuben, ²²tru Canaánwei møskai Cambe, møskai køsaatiig tsui ashabe, nui pa nunelan wambiisrø eshkanrrab webyain købig køn. ²³Inchen Semba, Jafetbabe kan itøtsinsramig pamisra, nømui kildunyu pinøgucha, wendømaytø amba, møskai køsaatiig tsuben, trutøga kasa trarrøbelø køn. Incha ashmønrrab wendømaytø amba, treeg køsaatiig tsuben nui asr køsagwan ashmuig køn.

²⁴Incha Noébe tru mutsiguig kib tsua kiagasra, tru mas unø nusrkai treeg indigwan wammørabe, ²⁵trenchibig køn:

Canaánbe larrø trømbøig nebuinanrrabig kønrrun cha. “Nunelø ka karuindiig megabig mas chigucha kømíig købash” cha. ²⁶Incha katø trenchibig køn: “Jehová, Semwei Tiuswane maya nuguen tab indig kønrrain cha. Inchen Canaánbe Sem manchiben, ka karuindiig megabig kønrrain cha. ²⁷Inchen Jafetwane purø nuig kønrrai Tius kusrua pasrig

kønrrain cha. Incha Jafetbe Semwei carpa yamerayu tsubig kønrrain cha. Inchen Canaánbe Jafet manchiben, ka karuindiig megabig købash” cha.

²⁸Indig Noébe tru pirau pi pulab arrubig arrinukkurrimbunø pilamera trescientos cincuentagatig tsuig købig køn. ²⁹Inchen Noé kerrigu øsig tsuim pilamerabe novecientos cincuenta kuig køn. Inchen yandø kwaig køn.

Noéweinukkurri Amrrub Misaamera

10 ¹Iiløbe tru Noéwei nusrkalø Semweimba, Camweimba, Jafetweimba truilø nøm tøgagui nusrkalø køn, tru pirau pimera pulabig arrua puraiben tøgaguilø.

²Jafetwei nusrkaløbe iilø køn: Gomer køben, Magog køben, Maday køben, Javan køben, Tubal køben, Mesec køben, Tiras købengue.

³Inchen tru Gomerwei nusrkaløbe iilø køn: Askenaz køben, Rifat køben, Togarma købengue.

⁴Inchen Javanwei nusrkaløbe: Elisa køben, Tarsis køben, Kitim køben, Rodanim købengue.

⁵Inchen truilainukkurri amrrub misaamerabe mar puluwan pirømerawansrø warabelø kuig køn. Truiløbe misag nørro søtømeramørig, katø mu møskalø køben, yau misaamera trumørig nømuin kui, nømuin kui pirømera waramig tøgartø købig køn, katø nømbe trumørig nømuin trigwan waminchibeløgue.

⁶Inchen Camwei nusrkaløbe iilø køn: Cus køben, Mizraim køben, Fut køben, Canaán købengue.

⁷Inchen Cuswei nusrkaløbe: Seba køben, Havila køben, Sabta køben, Raama køben, Sabteca købengue. Inchen tru Raamawei nusrkaløbe: Sebaba, Dedánba kuig køn.

⁸Inchen Cusbe Nimrodwei møskain kuig køn. Tru Nimrodbe pirau mugucha chinhaingaig ke nø karub pølbasing køn, yu pirau ke srøsrøzhiitø. ⁹Truibe Jehováwei merrab kaambu ushameran pasraarøb kemøramibe ke piaig lataig købig køn. Inchawei misaabe treeg taig tøgag købig køn: “Jehováwei merrab kaambu ushameran pasraarøb kemøramigwan larrø may kemørammaybe, Nimrod lataig køn” cha. ¹⁰Inchen nø karub tøgagui ciudadamera mas nørreeløbe iilø køn: Babel køben, Erec køben, Acad køben, Calne købengue, tru Sinar pirau. ¹¹Incha Sinargurrimbe Nimrodbe Asursrømay webya, truyube Ninive ciudadameran mara pønrsøbig køn, tru Rehobot ciudadawanba, Cala ciudadawanba. ¹²Trugurrimbe tru Niniveba tru Calaba tru i pa ciudadamerai tøbøtag pasrabig tru Resen purø nu ciudadawan mara pasrig køn.

¹³Inchen Mizraimweinukkurrimbe ludeos misaamera køben, anameos køben, lehabitasmera køben, naftuhitasmera køben, ¹⁴patruseosmera køben, casluitas misaamera køben, caftoritasmera køben købig køn. Tru i caftoritasmerai misaamerayugurri tru filisteos misaamera amrruig købig køn.

¹⁵Inchen Canaánbe tru nui mayur nusrkai Sidonweimba, Hetweimba mōskain købig køn. ¹⁶Inchen tru i Canaánweinukkurri amrrub misaamerabe jebuseosmera køben, amorreosmera køben, gergeseosmera køben, ¹⁷heveosmera køben, araceosmera køben, sineosmera køben, ¹⁸arvadeosmera køben, zemareosmera køben, hamateosmera køben købig køn. ¹⁹Inchen tru Canaánweinukkurri amrrub misaamerabe chu pirausrøn køben tru ørø, tru ørø chab ambubelø køn. Inchawei tru Canaán pirø muba kuimburab luløbiibe Sidongurri Gazasrøngatig larrøbichib luløbig køn, tru Gerarguebsrø. Incha trugurrimbe Lesasrøngatig luløbig køn, tru Sodomaba, Gomorraba, Admaba, Zeboimba truguebsrø.

²⁰Iilø kuig køn, tru Camweinukkurri amrrub misaamera, truiløbe misag nørø sötømeramørig, katø mu mōskalø køben, yau misaamera trumørig nømuin kui, nømuin kui pirømera waramig tøgartø, katø nømbe trumørig nømuin trigwane waminchibeløgue.

²¹Inchen tru Sem Jafetwei mayur nuneg truikkucha nusrkalø tøgaguig køn. Semweinukkurri amrrub misaamera kuig køn tru Heberwei maya nusrkaløbe.

²²Semwei nusrkaløbe iilø køn: Elam køben, Asur køben, Arfaxad køben, Lud køben, Aram købengue.

²³Inchen Aramwei nusrkaløbe: Uz køben, Hul køben, Geter køben, Mash køben kuig køn.

²⁴Inchen Arfaxadbe Selajwei mōskain køben, Selajbe Eberwei mōskain kuig køn.

²⁵Indig katø wendø Eberbe pagatø nusrkalø tøgaguig køn: tru srøsriibe Peleg munchi købig køn, kaguende nø tsuin kwalømmerawan pirøwan pirisaig købig kua. Inchen kan nuneebe Joctán taig købig køn.

²⁶Inchen Joctánbe Almodadwan køben, Shelefwan køben, Hazarmavetwan køben, Jeran køben, ²⁷Hadoramwan køben, Uzalwan køben, Diklan køben, ²⁸Obalwan køben, Abimaelwan køben, Sheban køben, ²⁹Ofirwan køben, Havilan køben, Jobabwan køben tøgaguig købig køn. Iiløbe kerriguba tru Joctánwei nusrkalø kuig køn. ³⁰Inchen tru nøm waraig pirømerabe Mesagurri ibiibe, Sefarburabsrø puraya, trugurrimbe tru nørø tunmera tōga pirømera tru pørr neeshibgatøwansrøngatig ibig køn,

³¹Iilø kuig køn, tru Semweinukkurri amrrub misaamera, truiløbe misag nørø sötømeramørig, katø mu mōskalø køben, yau misaamera trumørig nømuin kui, nømuin kui pirømera waramig tøgartø, katø nømbe trumørig nømuin trigwan waminchibelø.

³²Iilø køn tru Noéwei nusrkalainukkurri mu mōskalø køben, yau misaamera mumeratø købig kuig, katø mōigweinukkurri amrrub misaamera købig kuig, misag nørø sötømera møyuelø købig kuig, treekke. Inchawei tru pi pulabig chab pinisha puraiiben, truiløbe ambuurab, iburab larrøbichib amba, yu pirø muba kuimburab misaamera nørø sötø misrig købig køn.

Babel Pirau Purø Pala Ya Marøb

11 ¹Tru urassrømbe misaamerabe pirø muba kuimburab kan wamdø waminchibelø købig køn. ²Incha tru pørr neeshibgatøsrøngurri webamba ambub kuabe, tru Sinar pirausrømbe kan purø tab chag pirø wetørrawa, yandø nømbe truyu waramisrøbelø køn. ³Incha kan kwaløm nømbe kangurri, kangurri trenchibelø køn: “Naarillusmera margun cha. Incha nagu partrab” cha. Incha øyamay sruumeratøga marøbgunrriibe naarillutøga marig køben, chilliitøga marøbgunrriibe asfaltotøga maramig købig køn. ⁴Incha trugurrimbe trenchibelø køn: “Kan ciuda margun cha, kan purø palaig marig tøgag, trube pala patsabsrømbe srømbalærøngatig kachibikke. Treekkurrimbe mugui nebua asiilø nørreelø misra, pirø muba kuimburab ke tru ørøtø amba wamig kaanrun” cha.

⁵Inchen Jehovábe kørraarrubig køn, tru ciudawanba tru torrenba tru møguelai nusrkalø marigwanba ashchab. ⁶Incha Jehovábe trenchibig køn: “I misaamerabe kandø køb, wamgucha kandø waminchib, katø tru maramigwangucha yandø martrab pølbasa køn cha, trurrigu nøm martrab indigwane muguin katiasamørra cha. ⁷Inchawei kørraamun chibig køn, nømui wamindi wamwan ni chiwan wamindi møramgaig misrtrai martrab cha, møikkurrindøgucha nømasiitø ni chi tainguen mørtrab kaimanrai.”

⁸Incha øyamay Jehovábe pirø muba kuimburab tru ørø larrøbichib amrai maren, yandø tru ciudawan marmøtø, yandø lelachibelø køn. ⁹Incha treekkurri Babel cha wamig køn, kaguende pirau muba kuimburab wamindi wamwan Jehová truyuh nøm mandø kuinguen mørmønrrai marig købig kua. Incha trusrøngurri nømune pirau muba kuimburab tru ørø amba warønrrai marig køn.

Semweinukkurri Amrrub Misaamera

¹⁰Iilø køn tru Semweinukkurri amrrub misaamera: Sembe pilamera cien tøgag kua, Arfaxadwan tøgaguig køn, tru pirau pi pulab arrubig purayaig pa pila køben. ¹¹Incha Sembe tru Arfaxadwan tøgaguikkurrimbunø pilamera quinientos øsig tsua, nusrkalø køben, nimbasrmera køben tøgaguig køn.

¹²Arfaxadbe pilamera treinta y cinco tøgagua, Salan tøgaguig køn. ¹³Arfaxadbe Salan tøgaguikkurrimbunø pilamera cuatrocientos treskatig øsig tsua, nusrkalø køben nimbasrmera køben tøgaguig køn.

¹⁴Salabe pilamera treinta tøgagua, Eberwan tøgaguig køn. ¹⁵Incha Salabe Eberwan tøgaguinukkurrimbunø, pilamera cuatrocientos tres øsig tsua, nusrkalø køben, nimbasrmera køben tøgaguig køn. ¹⁶Eberbe pilamera treinta y cuatro tøgagua, Pelegwan tøgaguig køn. ¹⁷Incha Eberbe Pelegwan tøgaguinukkurrimbunø pilamera cuatrocientos treinta tøgag tsua, nusrkalø køben, nimbasrmera køben tøgaguig køn.

¹⁸Inchen Pelegbe pilamera treinta tøgagua, Reuwan tøgaguig køn. ¹⁹Incha Pelegbe Reuwan tøgaguinukkurrimbunø, pilamera doscientos nueve øsig tøgag tsua, nusrkalø køben, nimbasrmera køben tøgaguig køn.

²⁰Reube pilamera treinta y dos tøgagua, Serugwan tøgaguig køn.

²¹Inchen Reube Serugwan tøgaguinukkurrimbunø pilamera doscientos siete øsig tsua, nusrkalø køben, nimbasmra køben tøgaguig køn.

²²Serugbe pilamera treinta tøgagig tsua, Nacorwan tøgaguig køn.

²³Incha Serugbe Nacorwan tøgaguinukkurrimbunø pilamera doscientos tøgagig tsua, nusrkalø køben, nimbasmra køben tøgaguig køn.

²⁴Nacorbepilamera veintinueve tøgagua Térájan tøgaguig køn.

²⁵Nacorbepilamera Térájan tøgaguinukkurrimbunø pilamera ciento diecinueve tøgagua nusrkalø køben, nimbasmra køben, tøgaguig køn.

²⁶Térájanpilamera setenta tøgagua, Abramwan køben, Nacorwan køben, Haranwan køben tøgaguig køn.

Térájanweinkurri Amrrub Misaamera

²⁷Iilø køn tru Térájanweinkurri amrrub misaamera: Térájan Abramwan køben, Nacorwan køben, Haránwan køben tøgaguig køn. Inchen Haránbe tru Lotwan tøgaguig køn. ²⁸Inchen nui møskai Térájan kwamøwatø, tru Haránbe Caldeosmeraim pirausrø, tru nø kal-laim piraun kwaig købig køn.

²⁹Inchen Abramba, Nacorbabe nòmuyasig sralø laig køn. Tru Abramwei sraimbe Sarai købene, Nacorwei sraimbe Milca taig købig køn, tru Haránwei nimbasmra. Tru Haránbe Milcaimba, Iscaimba møskain kuig køn. ³⁰Inchen Saraiibe chi ureg tøgagørrabig kømíig kua, chi urekkaig købig køn.

³¹Inchen tru Tarébe tru nui nusrkai Abramwanba, katø Haránwei nusrkai nui awelu Lotwanba, nui yerna tru Abramwei srai Saraiwanba, pera webibig køn, caldeosmeraim piraun Ur tainukkurri tru Canaan pirausrømay inrrab. Inchenø tru Harán taig pirausrø puabe, truyu kørrømmisrøbelø køn. ³²Inchen tru Térájan øsig tsuin kwalømmerebe pilamera doscientos cinco kuig køn. Incha Térájan Harán pirausrø kwaig købig køn.

Abramwan Wamig

12 ¹Jehovábe Abramwane trenchibig køn:

—Ñuim piraugurrimba, ñui yau misaamerainukkurrimba, trugurri ñui møskawei yaugurrimba inrrø cha, na ñun eshkam pirausrømay. ²Nabe ñigurri purø nørø misag søtømera kønrrai marøb, katø mayanguen tabig nebuig kønrrai mara, ñui munchiwane mayeelø nebua asig kønrrai maramønrrun cha, ñibe katøganelayasig maya nuguen tabig kønrrai, ñibe treeg kønrrabguen cha. ³Nabe ñun mayanguen tabig nebuig kønrrai marøbelane, nòmungucha mayanguen tabig nebuilø kønrrai maramønrrun cha. Nun trømbøig nebunrrai marøbelane, nòmungucha trømbøig nebuilø kønrrai maramønrrun cha. Incha piraun chi misaamera køben pirø muba kuimburab warabeløbe ñuinug mayanguen tabig nebuilø kønrrai mariilø kønrrun— chibig køn.

⁴Inchen Abrambe Jehová maig chiben ibig køn. Inchen nøbabe Lotgucha ibig køn. Tru Harán piraugurri Abram webib urasbe nøbe

pilamera setenta y cinco tōgaig kuig køn. ⁵Incha Abrambe nui srai Saraiwan køben, nui nunewei nusrkai Lotwan køben pera ibig køn, katø chigurrimbunø nø chi tøgaguilan køben, katø tru Harán pirau nui karuig mendig melab misaameran købengue. Nøbe Canaán pirausrø truiløba pubig køn. ⁶Incha Abrambe Canaánsrø puabe, tru pirau kerrigu pureb ya, tru Siquénsrø pubig køn, tru Moré Tusr taig pasramnug. Inchen tru urassrø tru cananeo misaamerabe Canaan pirau warabelø købig køn. ⁷Inchen Jehovábe Abramwan kenamisrabe trenchibig køn:

—Ñuinukkurri amrrub misaameran nabe truilan i pirøwan trananmønrrun— cha. Inchen Abrambe kan altar kusrabig køn tru Jehová nun kenamisrøbigweyasig. ⁸Incha trugurrimbe tunmeragøba tōga pirømerasrømay ibig køn, tru Betel pørr neeshibgatømayrø. Incha tru nui carpa yawan truyuh lasrua pasrøbig køn. Inchen Betelbe pørr pinebgatømay kørromisrene, Haibe pørr neeshibgatømayrø kørromisrøbig køn. Incha nøbe Jehováweyasig kan altar kusrua, nui munchiwan isub wamabig køn. ⁹Incha Abrambe truygurri webya, ibig køn, kørromisrøb, kørromisrøb tru Neguev pirausrøngatig.

Abram Egipto Pirausrø

¹⁰Tru Neguev pirausrømbe parø arrum mendøben, Abrambe Egipto pirausrømay kørraarrubig køn truyu tsunrrab, kaguendø tru Neguev piraube purø trømbøig parø pasrøben. ¹¹Incha Abrambe ke Egiptosrø chab pub ib pasrøwabe, nui srai Saraiwane trenchibig køn:

—Na ashen ñibe purø tab ishug køn cha. ¹²Egipto misaamera ñun ashippe, trenchinrrun cha: “Ñui srain køn” cha. Incha nane kweecha kuchippe, ñune øsig kønrrai ka uñbashchun cha. ¹³Inchawei tiusmanda ñibe naimbe nuchag kur chinrrig cha, ñigurri nan chigucha kømø, tab kønrraimba, katø nan kweechimønrraimba.—

¹⁴Indiibe yandø Abram Egiptosrø kebibene, tru egipcimerabe tru ishuube larrø tabzhig kui ashibelø køn. ¹⁵Inchen tru Faraonwei merrab nørreelø pønrrabelø ashabe, truiløgucha Faraónwei merrab purø tab waminchib køben, tru ishuwane Faraón nø waig yaumay pera ambubelø køn. ¹⁶Incha tru Saraigurri tru Faraónbe Abramwan larrø tab inchib, ubishamera køben, waaramera køben, burrumera køben, karuindiig mendig melabelø møguelø køben ishumburmera køben, camellomera køben keta, tranøbig køn. ¹⁷Inchendø tru Abramwei srai Saraigurri Jehovábe tru Faraónwanba nui yau misaameranba murba kebatig køn, purø trømbø kwanrrømeratōga. ¹⁸Inchen Faraónbe Abramwan wama, trenchibig køn:

—¿Nan øyeebe chi margu? cha. ¿Chindimbarre ñui srain køn cha eshkamugu? cha. ¹⁹Chindimba trenchigu cha: “Nai nuchag køn” chabe. Nai srain kønrrai na treeg marig kuimasr cha. Møimbe ñui sraimbe yu

pasran cha. ¡Pereptsu!— chibig køn. ²⁰Incha Faraónbe nui karuig pønrrab møguelan ørøbig køn ¡katø! webambi ashib pønrrønrraingue, Abramwanba nui srawanba nui chigurrimbunø købigwanbañau sruaamrrai.

Abramba Lotba Mendamisrøb

13 ¹Incha Abrambe Egiptogurri nui sraimba katø nui chine tøgaguiløbañau Neguev pirausrømay katø arrubben, nui kuchiuñø Lotgucha nøba arrubig køn. ²Abrambe ushamera tøga kuiløyu lata, an tøgaguiyu lata, oro tøgaguiyu lata purø pua møg købig køn. ³Incha Abrambe Neguevsrøngurri katøle arruppe kørrømsrøb, kørrømsrøb arrub tsubig køn tru Betel misag sètømera waraisrøngatig, tru merrabwansrø nø tru carpa yawan lasrua tsuig købiisrø, tru Betelba, Haiba misamera warabnug tru tøbøtag. ⁴Truyu kuig køn tru merrabsrø nø kan altar mara kusruinug. Incha truyu Abrambe Jehováwei munchiwan isub wamabig køn.

⁵Lot tru Abramba lincha ibikkucha ubishamera køben, waaramera køben, carpa yamera køben tøgaig købig køn. ⁶Incha pirøbe kanbalatø lincha waramibe truburab tre lendø kømfíg køn, kaguende nøm tøgaguiløbe purø nørrø kua, trubalatøbe waramgaig købig køn. ⁷Indiibe kan kwaløm Abramwei ushameran ashibeløba, Lotwei ushameran ashibeløba aleguiab kurrabelø køn. Inchagucha tru urasbe cananeosmeraba ferezeosmeraba truiløgucha truyu warabelø købig køn. ⁸Inchen Abrambe Lotwane trenchibig køn:

—Nam pailainug lata, katø nai ubisha ashibeløba, ñui ubishameran ashibeløba truiløgucha chi kwayab kømig chi kaanrrain cha, kaguende nambe nunelø ker cha. ⁹¡Pirøbe asimburab kerriguba ñui merrab pasrømutarru? cha. Tiusmanda nainukkurri tarømsrøtra cha, ñi atsimay ibene, nabe kursmay yamønrrun cha, ñi kursmay ibene, nabe atsimay inrrur— cha.

¹⁰Inchen Lotbe ashib pasrøwabe, tru Jordan chaabe kerriguba Zoarsrøngatig pizheelø purø tøga pirømera kui ashibig køn. Jehováwei ellmarin tul lata tabzhikke; kabe tru Egipto pirømera lataikke. Tru Jordanbe treeg kuig køn, Jehová Sodoma ciudawanba Gomorra ciudawanba pinishimøwatøbe. ¹¹Incha Lotbe kerrigu Jordan chagwan nø merrarrowa, Lotbe tru pørr neeshibguebansrø ibig køn. Incha øyamay Abramba, Lotba nøørø misrig køn. ¹²Abrambe Canaán pirau kørrømsra tsuben, trune Lotbe tru Jordan chag pirø ciudamerasrø tsunrrab ibig køn. Incha tru nui carpa yamerane Sodomarsøngatig lasrua pønrsrøb ibig køn. ¹³Inchen tru Sodoma warab misaamerabe larrø kailø kua, larrø trømbøgølig marøbelø købig køn, Jehóawan kalø marøb.

¹⁴Inchen yandø Lotbe Abramwan tarømsringuen køben, Jehóabe Abramwane trenchibig køn:

—Abram, kurrasha cha, ñi pasrainukkurri tab ash cha, waguebwansrø, walliguebansrø, pørr neeshibgatøwansrø, pørr pinebgatøwansrø,

¹⁵pirøwan muba kuimburab mayamba ñi nebua asigwan ñunba, ñuinukkurri amrrub misaameranba managatigweyasig na ñun tranamønrrun cha. ¹⁶Ñuinukkurri amrrub misaamerabe nørø køptø kan pirau usrøtui lataig kønrrai maramønrrun cha. Usrøwanma muguen mundamgaig kuig køppe, ñuinukkurri amrrub misaameragucha mundamgaig kønrrun cha. ¹⁷Kurra, tru pirø yammay maya yab kuigwanba, lendømay mayan kuigwanba llirab inrrø chibig køn, kaguende nabe ñun tranamig køn— cha.

¹⁸Incha Abrambe tru nui carpa yameran picha kusrua, Manre tainug nørø parøndzig encinas tusrmera pønrrabnug tsunrrab ibig køn, tru Hebrónsrø. Incha truyube Jehováweyasig kan altar kusrubig køn.

Lotwan Wesrawa Srua Amben Abram Kerrab

14 ¹Tru kwalømmerawan tru Amrafelbe Sinarsrø rey køben, Ariocbe Eleasarsrø rey køben, Quedorlaomerbe Elamsrø rey køben, Tidalbe Goyimsrø rey købig køn. ²Incha truiløbe kwayabrren købig køn, Sodomasrø rey Beraba køben, Gomorrasrø rey Birsaba køben, Admasrø rey Sinabpa køben, Zeboimsrø rey Semeberba køben, katø tru Belasrø reyba købengue, truibè Zoargucha taig. ³Incha tru i trattrøgatø reymerabe nømui suldaumeraba tru Sidim chagu kanbalatø misrig køn kwayanrrab, tru Mar Trebi taisrø. ⁴Tru rey Quedorlaomerbe nømune pa trattrø y pa pila nø karub tøgagøben, pa trattrø y pøn pilayube tru trattrøgatø reymerabe tru Quedorlaomerwan mas karuig mørøb melømønrrab mur pønrramisrøbelø køn.

⁵Incha tru pa trattrø y pib pilayube Quedorlaomerbe tru reymera nuingatø pønrrabeløba Astarot Karnaim pirausrømay amba, truyube refaitasmeran kanawa kørrømarøppe, Ham taisrømbe zuzitasmeran, Save Quiriataimsrømbe emitasmeran, ⁶Seir tunmerawansrømbe horeosmeran kanawa kørrømara, tru Paran chaamerasrøngatig ambubelø køn, tru misag waraimfig chi misrmø pirø puluwansrø. ⁷Incha truiløbe katøle amruube, tru Gadessrø Enmispat taisrø pua, amalecitasmerai pirømerasrømbe kerriguh chi købigwan chishtø pinisha, katø tru Hazon Tamar pirau amorreosmera warabelan treetøweih mara kørrømarøbelø køn.

⁸Inchen Sodoma rey køben, Gomorra rey køben, Adma rey køben, Zeboim rey køben, Bela rey køben, Zoarsrø rey køben werrua, Sidim chaasrø tru reymeraba kwayab mendabelø køn. ⁹Tru Quedorlaomer Elamsrø reyba, Tidal Goyimsrø reyba, Amrafel Sinarsrø reyba, Arioc Eleasarsrø reyba truilø nøm pib reymera tru trattrøgatø reymeraba kwayabelø køn. ¹⁰Inchen tru Sidim chaasrømbe asphaltos pisumera truba, truba tøganug kuig køppe, tru Sodoma reyba Gomorra reyba tru kwayabygurri nui suldaumeraba wegørra lulen, møyiløbe truyu chab kegørrøben, kan reymerabe tunmerasrømay trubab chab luløbelø køn. ¹¹Inchen tru pib reymera kanabeløbe Sodomaba, Gomorraba

ciudayu chigurrimbunø købigwan, mamiimeran nòmui mara wesrawabe, yandø truyugurri ambubelø køn. ¹²Inchen tru Abramwei nunewei nusrkai Lotgucha sodomasrø tsubig kuig køppe, nungucha merrarrawa, tøga srua ambuptinchibelø køn, nui chi tøgamisrigwanbañaugue.

¹³Inchen møikkørørn truyugurri welula arrubiibe, tru hebreo Abramwan ígwan kerrighu eshkabig køn. Inchen Abrambe amorreo tru Mamre taigwei tru nørørø parøndzig encinas tusrmera pønrrab puluwan tsubig kuig køn. Tru Mamrebe Escolweimba, Anerweimba nuneg køben, truiløbe Abramwanweingatø pønrrabelø treelø købig køn. ¹⁴Incha Abrambe tru nui yautøwei kal-lawarmeran trescientos dieciocho tru kwayamigweyasig kusrenani møgueløba tulaamba, truiløba webya, tru pibgatø reymeran wetøgønrrab Dansrøngatig pasra ibig køn. ¹⁵Incha yandø yem køben, Abrambe tru kwayamig kusrenni møgueløba, pesan københ kwayanrrab kegørra, Hoba taisrøngatig pasra ambubelø køn, Damasco tru waguebgatømay pasrab ciudasrø. ¹⁶Trenchacha chigurrimbunø wesra srua ambiilan katøle chab kerrab, katø nui kasugunø Lotwan nui chigurrimbunø tøgamisriilanbañaau kerrighu chab kerrabig køn, katø ishumburmeranba, katøganelanba.

Melquisedec Abramwan Mayanguen Tabig Nebuig Kønrrun Chib

¹⁷Arambe Quedorlaomerwanba truigweingatø pønrrab reymeranba kanawa arruben, Sodoma reybe, tru Save taig chaasrø katønrrab webibig køn, truiibe tru Reywein Chagu.

¹⁸Inchen tru Salemsrø rey Melquisedecbe, Tius Mayeelain Pala Pasrabigwei sacerdotebe pirrimba, vinoba wesrue, ¹⁹Abramwan mayanguen tabig nebuig kønrrai marøbig køn, øyeeg wammeratøga: “Tius Mayeelain Pala Pasrabig Srømbalameranba, Pirøwanba Marøbig ²⁰Tius Mayeelain Pala Pasrabig Purø Nuigwan maya nuguen tabig wamindig kønrrain cha, tru ñun ashig kømui inchibelan ñui tasku tranøbigwan. Inchen Abrambe chigurrimbunø katøle wetørrawa srue arrigwan cienyugurri diezwane wesrawa, Melquisedecwan tranøbig køn.

²¹Inchene tru Sodomasrø reybe Abramwane trenchibig køn: —Misaamerane nan tranrra cha, chigurrimbunø købigwane ñi tøga kørørmistrig— cha.

²²Inchene Abrambe tru Sodomasrø reywane trencha løtabig køn:

—Tius Mayeelain Pala Pasrabig Srømbalameranba Pirøwanba Marøbig Jehovahwan ¡katø! nabe treebe marmumønrrun cha, nabe trendaig kuig køn cha. ²³Ni kan train piritøguen—, kabe nai alpargatis tsi-unøtøguen nabe ñuiwane chiwangucha nai marmumønrrun chibig køn, ñi managuen øyeeg chimønrrai: “Abrambe nagurrinre pua misrig køn” cha. ²⁴Tru na pera pasraig møguelø mab mutsigwandø srørri maig kørørmistrain cha. Inchen tru naba amrrub møguelø Anerba, Escolba, Mamreba truiløbe si, nømuimburappe ka utønrrun— chibig kø n.

Tius Abramwan Øyamay Kønrrai Martrab Cha Kørrømisrøb

15 ¹Inchen øyeelø chab puraiben, kan piab lataigu Jehovahéinukkurri wam Abramwan trenchibig køn:

—Abram, chi kørig kui inchimøta cha. Nabe ñun chi kømønrrai ashib tøga pasrabig truig kur cha. Ñun tranamibe purø nuig kønrrabig køn— cha.

²Inchendø Abrambe trenchibig køn:

—Jehová Tius ¿Ñi nan keta traniibe chi puruguimøriasamørra cha, na chi urekkaigwane? Inchen tru na chine tøgamisriilan merrarranrabiibe tru Damascosrø Eliezer kømuitarru?— cha. ³Incha katø Abrambe trenchibig køn:

—Ñi nan kan nusrkai tranmuig købene, kan nai yautøwei kal-lawei nai kan karuindiig mendig megabig, truig nai chi tøgaguilan ketig utønrrabig køn— cha.

⁴Inchen katø Jehovahéinukkurri wam trenchibig køn:

—Ñui chi købigwane truig ashchabig kømøtø, truilane ñui nusrkai utønrrabig køn— cha.

⁵Incha wambiisrø pera yabe, trenchibig køn:

—¡Au! srømbalaneb nesh cha, kønchabiimeran mundamdø køtamørtrig— cha. Incha katø trenchibig køn:

—Ñuinukkurri katøburø ureemerabe øyeetøwein kønrrun— cha.

⁶Inchen Abrambe Jehovaháwan køreben, treekkurri nune Tiusbe chi kaig marmíig lataig, tabig treeg asha pasrig køn. ⁷Inchene nøbe trenchibig køn:

—Nabe Jehovahá kur cha, caldeosmeraim pirau tru Ur taisrøngurri wesrabig i Canáan pirøwan na ñun keta tranrab.—

⁸Inchendø Abrambe trenchibig køn:

—Jehová Tius, ¿tru na truigwan nain kønrraitamappe nabe mandø incha asamerah?— cha.

⁹Inchene Jehovahábe trenchibig køn:

—Kan ishug waara-unøzhig pøn pilaiba, kan cabra pøn pilaiba, kan carnero pøn pilaiba, katø kan palomaba, kan paloma-unøzhiiba srua amø— cha.

¹⁰Inchen Abrambe tru ushameran kerriguh srua arrua, truilan sølgørrab tab tøbøtag para, tru pariilan tru pinrrøgue, tru pinrrøgue warøbig køn. Inchendø tru illimerane tøbøtag parmuig køn. ¹¹Inchen yau mab illimerabe tru usha kweetsiilø warabelaimbalawan kørørrub amrruben, Abrambe kwaarøsrøbig køn.

¹²Inchen yandø chab pilliraben, Abrambe truba mur kib tsubenba jmøimbe ke yalø løstøgølig nun itøgasrøptinchen! nøbe truba kørig kui inchibig køn. ¹³Inchene Jehovahábe trenchibig køn:

—Isa kømøtø, ñuinukkurri amrrub misaamerabe, ka peguelaim pirautø warønrrabelø køn cha, nømbe truilø karub sruaguindeelø meløwa, pilamera cuatrocientos nebumne larrø kaig indinab melønrrabelø køn

cha. ¹⁴Inchendø tru nu sötø misaamera pasrabig nòmun ka karuptø srua kônrrabelangucha numune mōra melônrrai maramônrrun cha. Inchen trugurrimbunø tru ñuinukkurri amrrub misaamerabe yandø treeg melainukkurri wegørra ambuppe, purø tōga misaamera webamba amrrun chibig kòn. ¹⁵Trune ñibe ñui mōskalōba pishindø tab israb tsumisrtrabguen cha, larrø kōllizhig misra kwaben, sōrōben.

¹⁶Inchen tru pimmaygatig srōig srōig misag kurrab amrrubelōbe katōle i pirautōweih amrrunrab kòn cha, kaguende truilø pumuatōbe tru amorreosmera larrø kaig marōb amrruibe ke awentamgaikkatiibe pumø srø kônrrun cha.

¹⁷Inchen yandø pōrr pinaiben, chab pilliraben, kan horno naguish kuchibiiba kan nag tulun pilabiiba kenamisrōbig kòn. Incha truilōbe tru ushameran kweecha tab tōbōtag pirisha ambumay, imay wari utōwan puraambubelø kòn. ¹⁸Tru kwalōm Jehovábe Abramba øyamay kônrrai martrab cha kōrrōmarabe, trenchibig kòn:

—Ñuinukkurri amrrub misaamerane i pirōwan na tranamig kòn cha, Egipto pirau piyugurrimbunø, Eufrates tru nu pistrongatikke:

¹⁹ceneosmeraim pirōmeran kōben, cenezeosmeraim pirōmeran kōben, cadmoneosmeraim pirōmeran kōben, ²⁰heteosmeraim pirōmeran kōben, ferezeosmeraim pirōmeran kōben, refaftasmeraim pirōmeran kōben, ²¹amorreosmeraim pirōmeran kōben, cananeosmeraim pirōmeran kōben, gergeseosmeraim pirōmeran kōben, jebuseosmeraim pirōmeran kōbengue.

Agarba Ismaelba

16 ¹Abramwei srai Saraibe ureg tōgagōnrrab kaimabig kuig kòn. Inchende kan nui karuindiig megabig egipcia ishug Agar taig tōgaig kua, ²Saraibe Abramwane trenchibig kòn:

—Nane Jehovábe ureg chigaig kônrrai treeg martan cha. Inchendø tiusmanda tru namui karuindiig megabig tru Agarwan pera, ki chibig kòn. Inchippa truikkurri na ureg tōgaguinabgun— cha.

Inchen Abrambe Sarai taigwan mōrōbig kòn. ³Inchen Saraibe tru karuindiig megabig Egiptosrø Agarwan pera arrua, Abramwan srai lataig kônrrai tranōbig kòn. Abram Canaán pirau pa tratrø pila tsuben, øyeeg purayaig kòn. ⁴Inchen Abrambe tru Agarba kib waramisren, tru ishuube kwanrriig misra, yandø unø tōgamisrarmab isua, nun karub pera kōbig Saraiwane namig ashib kebibig kòn. ⁵Incha Saraibe Abramwane trenchibig kòn:

—Ñigurrindø kòn cha, nan mandōguen kōmui isui uñchai marōbiibe. Ñune ñui srai lataig kônrrai nai karuindiig megabigwan na tranig kòn cha. Incha mōimbe nōbe unø tōga kônrrab kōppe, nane namig ashib kebitan cha. Incha Jehová nø ashchun chibig kòn, na kalø marig kuin kui, ñi kalø marig kuin kui.—

⁶Inchen Abrambe Saraiwane trenchibig kòn:

—Ñui ka karuindiig megabiibe ñuin tasku køn cha. Ñun maig marøg køben, treeg mar— chibig køn. Inchen Saraibe kaig inchib mendøben, Agarbe welula yam nebuig køn.

⁷Indig Jehováwei ángelbe tru mu misag waraimø pirømerasø kan pigab menda Agarwane wetørrabig køn, Shursømay ambi maywansø. ⁸Inchabe payibig køn:

—Agar, Saraiwei ka karuindiig megabig, ¿Chugurri arrugu? cha. ¿Chumay inrrab inchigu?— cha. Inchene nøbe trenchibig køn:

—Nan karub pera købig Saraiwan nabe trubab welula arrur— cha.

⁹Inchen ángelbe trenchibig køn:

—Ñui karub pera købigweimay katøle llirawa ya, tammay mur kurrashmø, nø maig chiben nui tasku treeg mørøb megau— cha.

¹⁰Incha katø ángelbe trenchibig køn:

—Ñuinukkurri amrrub misaameran purø nørrø kønrrai maramønrrun cha, purø nørrø køptø mundamguengaikke.—

¹¹Incha ángelbe katø trenchibig køn:

—Ñibe kwanrriig køn cha. Ñibe kan nusrkai tøgagønrrun cha. Incha Ismael munchi pasrtrig chibig køn, kaguendø ñi larrø isui miaben, Jehovábe mørig køn cha. ¹²Nøbe muguen kemalamgaig kønrrabig køn cha, kan kaambu mula-unø lataig. Incha nøbe mayeelan kwayam lanrrabig køben, katø nungurringucha mayeelø kwayam lanrrun chibig køn. Inchen nøbe nunelan, ka kwayam laptø, kwayam laptø tsunrrun— cha.

¹³Incha Agarbe Jehovába wamindig køppe, nøbe nune trencha wamabig køn:

—Ñibe tru nan ashib wab Tius køn— cha. Kaugen Agarbe trenchibig køn: “Øsig Wab, katø Nan Ashibigwan nabe ashar” cha.

¹⁴Incha tru pisuwane treeg wamig købig køn: “Øsig Wab, Nan Ashib Inchibigwein Pisu” cha. Inchen tru i pisube Gadesba, Beredba tøbøtagu kørrømisrøbig køn.

¹⁵Indig Agarbe Abramwei kan møg-unø tammissren, Abrambe Ismael munchi pasrøbig køn, tru unan.

¹⁶Inchen tru Agar Ismaelwan tammissrøb uras Abrambe pilamera ochenta y seis tøgaguig købig køn.

Tru Srøig Øyamay Kønrrai Martrab Cha Kørrømarigwanba Circuncion Marigwanba Caminchibig

17 ¹Abram pilamera noventa y nueve tøgagøben Jehovábe kenamisra trenchibig køn:

—Nabe Maramburab Marøbig Purø Nuig tru Tius kur cha. Ñibe nai merrab sølgandø, mu mandamgaig uñ cha. ²Nabe ñiba øyamay kønrrai martrab cha kørrømarøb, katø ñui misamera larrø nørrø larrøbitchai marøb indamønrrun— cha.

³Inchen Abrambe maløwan pirau kebatamne utsøbasren, Tiusbe nune trenchibig køn: ⁴—Iig køn cha, tru na ñiba øyeeg maramønrrun

cha korrø mariibe, ñibe tru purø norrø chi misag sötømeraindøgucha ñi mōskain kōnrrai. ⁵Ñibe mas Abram munchi kōmōtø, ñibe Abraham cha wamig kōnrrun cha. Kaguende nabe ñune tru purø norrø chi misag sötømeraindøgucha ñibe nōmui mōskain kōnrrai pasrar cha.

⁶Ñuinukkurrimbe purø norrø misag nemisrtrai maramōnrrun cha. Ñuinukkurrimbe misag sötømera norrø kōb, ñuinukkurri katø reymera kōb inchun cha. ⁷Katø nabe, ñiba ñuinukkurri amrrub misaameraba øyeeg martrab cha korrø maramōnrrun cha, katøle srøig, srøig misag kurrab amrruimørig katø øyeeg martrab cha mara pasramōnrrun chibig kōn, managatig pasrōnrrabig, nabe ñuimba, ñuinukkurri amrrub misaameraimba nabe pasrabig pasrōwa, managatig nōmuyasig Tius kōmōnrrun cha. ⁸Ñunba, ñuinukkurri amrrub misaameranba tru ñi ka arruatiig tsuin pirōwan tranamōnrrun cha, Canaán pirōwan muba kuimburab managatig tōgagōnrrai. Inchen nabe pasrabig pasrōwa, managatig nōmuyasig Tius kōmōnrrun— chibig kōn.

⁹Incha katø Tiusbe Abrahamwane trenchibig kōn:

—Tru na ñun øyeeg martrab cha korrø marigwane ñibe, maramig kōn cha, ñiba, ñuinukkurri katøle srøig, srøig kurrab amrrub misaameraba. ¹⁰Iig kōn cha, tru na ñiba øyeeg martrab cha korrø marig, katø ñiba tru wendø ñuinukkurri amrrub misaameraba. Inchen trunun maramig kōben, ñimui utube mu mōtøgucha circuncidaig kōnrrun chibig kōn. ¹¹Ñimbe circuncidanrrigay cha, naba, ñimba tru øyeeg martrab cha korrø marigwan treeg marigu asamig pasrōnrrai. ¹²Trune kwalōmyube mu mōguelandøgucha circuncidanrrigay cha, katøle katøle ureemera kurrab amrruimørig, ñui yau kal-laweig kui lata, kabe amrrub misaameran peniilø kui lata. ¹³Inchawei ñui yau kal-laweig kui lata, kabe kan anwei penig kui lata nōmbe circuncidaig kōnrrabelø kōn cha. Inchen, tru asru siñalbe tru treeg martrab cha korrø marigwan managatigwein kōn cha eshkabig kōn.

¹⁴Inchen tru circuncidamīgwane ñimui misag utugurrimbe wegutsig kōnrrun chibig kōn, kaguende na øyeeg martrab cha korrø marigwan itōbunikkurri.—

¹⁵Incha katø Tiusbe Abrahamwane trenchibig kōn:

—Ñui sraimbe Sarai cha wamig kōmōtø, yandø Sara cha wamig kōnrrun cha. ¹⁶Nabe nune mayanguen tabig nebuig kōnrrai maren, nōbe ñui kan nusrkai tōgagōnrrun cha. Nabe mayanguen tabig nebuig kōnrrai maren, nōbe norrø sötø misaamerai usrin kōnrrabig kōben, katø nuinukkurrimbe misag sötømerai reymera werrunrrun— chibig kōn.

¹⁷Inchen Abrahambe nui malōwan pirau kebatamne utsōbasrabe, nui manrø umbutø intsab trenchibig kōn: “¿Kan mōg pilamera cien tōgaig kua, unø tōga kōnrrautah? cha. ¿Katø Saragucha pilamera noventa tōgaig kua, unø tōgagōmdø kōnrrautah?” cha. ¹⁸Inchene Abrahambe Tiuswan trenchibig kōn: —Ñi treeg martrab cha korrø misrigu Ismael truigwane nō tōga pasrōnrrai tranø— cha.

¹⁹Inchene Tiusbe trenchibig kòn:

—Isa kòmò, Sara ñui sraimbe kan nusrkai tøgagønrrab kòn cha, truigwane Isaac munchi pasrtrig cha. Nabe tru øyeeg martrab cha kørømarigwan Isaacweinukkucha katøle treetøwei marig kørømisrtrai indamønrrun cha. Inchawei na treeg marigwane wendø nuinukkurri amrrub misaameraba managatig tōga pasramønrrun chibig kòn.

²⁰Inchen Ismaelweimburabgucha nabe ñun mōrar cha, nungucha mayanguen tabig nebuig kōnrrai maramønrrun chibig kòn. Nøgucha uremera larrø nōrrø tøgagōnrrai marøb, purø nōrrø misag sōtø larrøbitchai marøb indamønrrun chibig kòn. Ismaelbe karub ashib pōnrrōnrrabelø doce nōrreelai mōskain kōnrrun cha. ²¹Inchendø na tru øyeeg martrab cha kørømarigwane Isaacba kōnrrai mara pasramønrrun cha, tru Sara katø pila øyan kwalømmerawan tru tøgagōnrrab kui unøyu.— ²²Incha Tiusbe Abrahamba chab waminchabe, nuinukkurri tarōmisra ibig kòn.

²³Inchen Abrahambe nui nusrkai Ismaelwan kōben, tru nui karuig mendig melabelø nui yau kal-lawarmeran kōben, anwei pena tōgaguilan kōben, Abrahamwei yau mu mōguelø purrabelane kerriguba wama, tru kwalømdøwei circuncidabig kòn, Tius maig karuig kōben, treekke.

²⁴Abraham tru circuncidab urasbe pilamera noventa y nueve tōgaig kōbig kòn.

²⁵Inchen nusrkai Ismaelbe tru circuncidab urasbe pilamera pa tratrø y pøn pilaig kōbig kòn.

²⁶Inchawei tru kwalømdø Abraham kōben, nui nusrkai Ismael kōben, ²⁷mayeelø tru nui yau purrab mōguelø kōben, katø nui yau kal-lawar kui lata, katø amrrub misaameran peniilø kui lata, mayeeløbah circuncidaig kōbig kòn.

Isaac Kal-lanrrun Cha Kørømisrig Kōbig

18 ¹Incha Jehovábe Abrahamwan kenamisrōbig kòn tru Mamre tainug nōrrø parōndzig encinas tusrmera pōnrrab pulu, tru nui carpa yau yaskabu waben kwaløm tru mas purø mur pōrr asentab pasrōben. ²Incha mōimbe nō kurraashene, pōngatø mōguelø nuin pinrrøgue pōnrraptinchen, nōbe tru mōguelan amrruy chinrrab yaskabugurri luløb ya, maløwan pirau kebatamne utsōbasrabe trenchibig kòn:

³—Nai kasuku, na ñui karui megabigwan ñi nan tab indamdiig kui asōnaig kōbene, trube, ib imøtø, lincha kørømisrtra cha. ⁴Nabe pi srua amrrungarumønrrun cha, ñimui katsiimeran kwalamig. Trugurrimbe tusr umbu isrōnrrigay cha. ⁵Na ñi maig chiben purugunrraptøwei wabigwei yaburab puramrrab amrruig kōbene, nabe lamø mamig manrrai sruaarrumønrrun chibig kòn, ñimui ambamigwan chishtë ambamdø kōnrrai.— Inchen nōmbe trenchibelø kòn:

—Ñi maig taigwan mar— cha.

⁶Inchen Abrahambe tru Sara waig carpa yausrōmay kōrinatø lulabe, trenchibig kòn:

—Petøzhiitø purø tab harinawan arroba y media menrra, nemøra, harinawan masawa, trutøga pirrimera naarrøsryu kar— cha.

⁷Incha Abrahambe tru waara purrabsrømay luløb ya, kan truba tab waara-unøzhigwanh merrarrowa, nui karuig mendig megabigwan tranen, truike mamigweyasig ¡katø! petøzhiitø tamarøbig køn. ⁸Incha queso køben, pitsø køben, tru waara kweecha tamarigwan køben, nømun manrrai pønrsøbig køn. Incha Abrahambe nøm mab kømne tru tusr umbu ashib pasrøben,

⁹truiløbe payibelø køn:

—¿Ñui srai Sarabe chu wah?— cha.

Inchen Abrahambe:

—Yu carpa yau wainrrun— chiben, ¹⁰kan møig køsrønbe trenchibig køn:

Nabe katø pila katø øyan kwalømmerawandøwei arrumønrrun cha.

¡Au! Tru urasbe Sara ñui sraimbe kan nusrkai tøgagønrrun— chibig køn.

Inchen Sarabe, nømui wendau, tru carpa yau kebambi yaskabu tru wamindigwan mørøb pasrabig køn. ¹¹Inchen Abrahamba Sarababe yandø mur køllireelø, Sarabe yandø pabøguen pinig købig køn. ¹²Inchen Sarabe intsaptinchibig køn, nui umbutø treeg isub: “¡Paare! kan na yan kølliibe, ke trengatikkucha kønrrai indamdiig kønrraitarru cha katø nai kekkucha yan kølligwein køben.”

¹³Inchene Jehovábe Abrahamwane trenchibig køn:

—Sarabe trenchib intsan cha, ¿Kan isa kømø, treeg kønrrab kø chinder? chib. ‘Na yan køllig købendø, kan unø tøgagømig.’ ¹⁴¿Kabe Jehováweingan kaimamdiig chi købig kuitarru? cha. Inchawei katø pila arrubigu tru chu ura treeg kønrrun taiguh, na katø ashchab arrubene, tru urasbe Sarabe kan nusrkai tøgaguen wanrrun— chibig køn. ¹⁵Inchen Sarabe kwaarøppa, trenchib isabig køn:

—Nabe intsømuig køn— cha.

Inchene Jehovábe trenchibig køn:

—Ñibe intsabwei indig køn— cha.

Abraham Sodomayasig Purøwaminchib

¹⁶Incha tru møgueløbe kurra, Sodomaguebsrø ashabe yandø truguebsrø ambub mendøben, Abrahambe ungua chinrrab nømbe lincha ibig køn.

¹⁷Inchen Jehovábe nuinøtø treeg isubig køn:

“¿Na chi martrab indigwan nagan Abrahamwan eshkamø maramuitarru? cha. ¹⁸Nøbe purø nørrø misag sètømera, trurrigu mu chindamgaig murig, katø nøgurri chi misaameratøgucha pirø muba kuimburab warabeløbe mayanguen tabig nebuilø treeg kønrrab køben. ¹⁹Nabe nui ureemeranba nuinukkurri amrrub misaameranba kusrennrrai wesrawa pasrar cha, tru nø martrai karua pønrraillan møra marøppe, tru tabig sølgandø mariguba, nø tabig kui asamig mariguba kønrrain cha, tru øyeg mariiløgurri Abrahamwan Jehova maig martrab cha kørrømariibe kerrigu treeg nebunrrai”.

20Incha Jehovábe Abrahamwan trenchibig køn:

—Sodomaimburappa, Gomorraimburappa, truyu misamera yeeg kaig martan chib trashib eshkaib melaibe masken, masken køben, nõmui kaig mariiløgucha masken, masken nuraben, purø trømbøig mindin køn cha.

21Møimbe na kørraarumønrrun cha, tru nõm øyeeg, øyeeg køtan chib trashib melaig nainug pubig isa kømøtø, treeg købwei indiitashchab.

Treeg kuin kuisruandøbe, trube, na asamønrrun— cha.

22Inchen tru pailø møgueløbe nõørø misra, Sodomaguebsrø amben, trune Abrahambe Jehovába pasrabig køn. 23Inchen Abrahambe Jehováwan kemallabe, trencha payibig køn:

—¿Sølgandø tabig marøbigwanba, kaig marøbigwanba tøgatø pinishinrrapteh?— cha.

24Inchippa tru ciudayu sølgandø tabigwan marøbelø cincuenta købene, ¿tru ciudawan ka pinishinrrapteh? cha, tru ciudayu sølgandø tabigwan marøbelø tru cincuentaeløgurri ciudawan pinishimø, ¿ka købasamdiig kømuitarru? cha. 25Treekkatig maramibe chigaaguinrrun cha, tabigwanba, kaigwanba kanbalatø kwanrrai indamig, kan pailøba treetø kalø marig kui lataig. ¡Ñibe mana treeg martrab kø! cha. Pirau muba kuimburab kerriguba maig kønrrabigwan ñi asha marøbig køppe, ¿ñibe maig maramigwan sølgandø tab asha marmønrraitirru?— cha

26Inchene Jehovábe trencha løtabig køn:

—Sodoma ciudayu cincuenta sølgandø tabigwan marøbelø wetørrappe, truilan isua, truyube chinchimø, kagøbasamønrrun— cha.

27Inchene Abrahambe trenchibig køn:

—Nabe nai Señorwan ke menrra inchib lata indinatan cha, nabe ka usrø tuindø kuinabendø. 28Inchen cuarenta y cincotø købene, trube cincuenta kømuikkurrindø ciudawan kerrigu pinishinrrapteh?— cha.

Inchene Jehovábe trenchibig køn:

—Pinishimumønrrun cha, truyu na cuarenta y cinco sølgandø tabigwan marøbelø wetørrappe.—

29Inchen Abrahambe katøgucha:

—¿Inchippa cuarenta wetørrappe?— chiben, Jehovábe trenchibig køn:

—Tru cuarenteelan isua, chinchimumønrrun— cha.

30Inchen Abrahambe katøgucha payibig køn:

—Nai Señor, na øyeeg chiben namømørrunrrig cha. ¿Inchippa truyu treinta wetørrabeneh?— cha.

—Tru treinteelan isua, kagøbasamønrrun— chibig køn Jehovábe.

31Inchen Abrahambe katøgucha:

—Nabe nai Señorwan ke menrra indinatan cha, ¿truyu veinte wetørraimbe maig købsruerah?— chiben,

—Veinteelan isua, nabe pinishimumønrrun— chibig køn.

32Incha katøle Abrahambe trenchibig køn:

—¡Nai Señor, nan namømørrunrrig cha, i piejindøh na ñun katølø trenchibashibsruguh cha: ¿Inchippa truyu pa trattrø wetørraimbeh?— cha.

Inchene Jehovahé trenchibig køn:

—Tru pa trattrøn isuptø, pinishimumønrrun— cha.

³³Incha Jehovahé Abrahamba øyeegwan chab waminchabe, yandø truyugurri iben, Abrahambe nui carpa yaumay katø arrubig køn.

Sodomanba Gomorranba Pinishib

19 ¹Incha tru pagatø angelesmerabe tru Sodomasrømbe nøsig pineb iben, pubene, Lotbe tru Sodoma ciudayu kebambi yaskabsrø wabig køn. Incha Lotbe truilan ashippe, amrruy chinrrab paramisrøptincha, maløwan pirausrø kebatamnegatig utsøbasrøbig køn. ²Inchabe trenchibig køn:

—Nai kasukumera, na ñui karui megabigwei yausrø kørrømisrtrab amrrurray cha. Incha ñimui katsiimeran kwallchigay cha. Incha srønabe løtsø kurra ñimui ambamigwan amrrigay— cha.

Inchen nømbe trenchibelø køn:

—Kah cha, mõi yembe nambe yu umbu puinuutø, ka kørrømisrtrab ker— cha.

³Inchen Lotbe truba truba inchen, nømbe nøba amba, nui yau kebamben, nøbe tab mamiimera tamarøb, pirri chi levaduragailø karøb inchen, nømbe mabelø køn.

⁴Inchen nømbe kinrrabguen waramismøwatø, tru ciudayu møgueløbe yawan kerrigu chab tulsrubelø køn, maya misag matsøreløgurrimbunø kølleeløgatikke. ⁵Incha Lotwane trenchib trashibelø køn:

—Tru ñui yau kinrrab amrrub møgueløbe chu purra? chib. ¡Wambig webetay! chib. Nambe nømbe ishumburmeraba latakøwei marøg kuin pønrrer— chib.

⁶Inchen Lotbe wambig webya, yaskabwan kasrøb trenchibig køn:

⁷—Nai misaamera, tiusmanda øyeekkatig trømbøgøliibe martrab inchimøtay cha.

⁸Nabe pagatø nimbasrmera tøgagig kur cha, managuen kan mu møøba kimeelø. Nabe truilane wertrur chibig køn, ñim truilan maig marøg køben martrigay cha. I møguelane chigucha treebe marmørrunrrigay chibig køn. Kaguende truiløbe nai yaambu mugøben kaig martrab inchib kønrrain kømøtø, na ashib tøgaguilø purran— cha.

⁹Inchene nømbe trenchib løtabelø køn:

—¡Yugurrimbe mendatsu!— cha. Inchabe treekkucha chibelø køn:

—Ya peesriig namui utu ka tsunrrab arruatiig købendø, ¡paare! ¿namune maig maramigwan ke ñi asha karunrrab indirru? cha. Møimbe truilan lataguen kømø, ñune purø trømbøikken martrumøn— chibelø køn. Inchabe Lotwan melambua, yaskabsrø kemalla, yaskabwan wesra kutchab inchibelø køn.

¹⁰Inchen tru pailø møgueløbe yaambugurri taska kemørøppa Lotwane yaambumay kesrub, trugurrimbe yaskabwan kasrøptinchibelø køn. ¹¹Incha

tru mógueløbe tru yau yaskabu melambub amrrubelane kammeran ashmeelø misrtrai marøptinchibelø køn, mas unøtiigwangurrimbunø kølliwingatikke. Inchen nømbe yaskab lab ke mandøguen kømui inchib købig køn. ¹²Incha tru móguelø kørrømisrøbeløbe Lotwan trenchibelø køn:

—¿Ñigan ñui yaelø mas tøgagøtirru? cha. Ñui yernomeran køben, ñui nusrkalan køben, ñui nimbasmeran køben, yugurri wesru chibig køn. ¹³Kaguende nambe i ciudawan Kerrigu pinisamig køn cha. Tru katøgan misaamera yeeg kaig martan chib trashib eshkab melaibe Jehová nø waisrø puin køn cha. Inchagurri Jehovábe namune ciudawan pinishinrrai ørig køn— cha.

¹⁴Inchen Lotbe tru nui yerno kønrrabeløba waminchab webibig køn, tru nui nimbasmeran kasharanrrab misrarmera købeløba. Incha trenchibig køn:

—¡Mallatø webambay! cha, kaguen Jehovábe i ciudawan pinishinrrab køn— cha. Trune nui yerno kønrrabeløbe ka intsab trendaitamaptøh isubelø køn.

¹⁵Inchen yandø tør— rrab arruben, ángelesmerabe Lotwan mallatø indingarub, trenchibelø køn:

—¡Mallatø inchi chiben! cha. Ñui srawanba, ñui pagatø nimbasmeranba yu purrabelan pera inrrø chibig køn, ciudayu trømbøig nebunrrai marigu ñim pinømønrrappe.—

¹⁶Inchen Lotbe ke peguen inchimuben, tru pagatø mógueløbe nunba, nui srawanba, nui pagatø nimbasmeranba tasku kemøra, nømune ciudayugurri wambiisrø wesrubelø køn, Jehováwei lastima asiitøga. ¹⁷Incha yandø ciudayugurri wambiisrø wesrawa pasrabe, kane trenchibig køn:

—¡Ñui øsig kuigwan ñi tøgønrrappe, welula inrrø! cha, wendømay keshmøwei, i chagu chu pasramismøweingue. Ñui øsig kuigwan tøgagønrrab tunsrømay lul cha, pinømønrrappe.—

¹⁸Inchene Lotbe trenchibig køn:

—Kah, cha nai kasuku na ñim maig taigwan megabig tiusmanda, treebe kaimamønrrun cha. ¹⁹Nabe ñimuin kabyu tab kui asig kuinaig købene, nai øsig kuigwan na tøgagømig kønrrai ñimbe nane purø nu lastima asig køn cha. Inchendø nabe tunsrømaybe lulrrab kaimamønrrun chibig køn, inchippa na trusrø pumatø kaig attrabig nan wetøgøben, kwamig kømønrrai. ²⁰Yu puluwandø kan lamø ciudagøllig køn cha, trusrømaybe lulamønrrun chibig køn nabe. Trusrømay ibashcha cha, pøs, truike lamø ciudagøllig kømuitarru cha— truyu na øsig kømigwan ka tøgagømig kønrrai.—

²¹Inchen trenchibig køn:

—Ñi øyeeg miaigwangucha nabe mørar cha. Tru ñi wamindi ciudawane nabe pinishimumønrrun chibig køn. ²²Trube, øsig kug købene, mallatø trusrømay lul chibig køn. Kaguende ñi trusrø pumatøbe, nabe chigucha martrab kaimamønrrun— cha. (Inchagurri tru ciudawane Zoar cha wamig kuig køn.)

²³Inchen Lotbe Zoarsrø pubene, yandø pørrbe neeshib arrubig køn.

²⁴Inchen yandø Jehovábe srømbalasarøngurri azufreba, naaba sre pubig ørøbig køn Sodomaimbalaba, Gomorraimbalaba. ²⁵Incha tru ciudadameranba, katø truyu warab misaameranba, tru chaameranba, katø tru pirau chi kal-lawa pørrrabelanbañau chishtøh pinisaig købig køn. ²⁶Inchen Lotwei sraimbe mømibe wendømay keeshenba, nøbe maig kuimaytiig tre srug misra pasrambuig køn.

²⁷Katø kwaløm Abrahambe løtsø kurra Jehovába tru nø waminchib pasraisrømay ya, ²⁸Sodomaba, Gomorraba katø trusrø muba chag kuimburab truguebrø ashene, naguishbe kan nu tra pachib lataig piraugurrimbe kurrab pasraptinchibig køn.

²⁹Øyamay tru muba chag kuimburab ciudadameran Tiusbe pinisaig køn. Inchendø Tiusbe Abrahamwane isua tøgá pasrøwa, tru Lot tsuig ciudadameran purø trømbøig pinishib arrubigugurri Lotwane wesraig køn.

Lotba Nui Pagatø Nimbasermeraba

³⁰Inchen Lotwane Zoarsrø kørrømisra tsumibe kørig køben, nui pagatø nimbasermeraba tunmera tøgá pirømerasrø tsunrrab ya, nømbe pønæløba kan peña trab pasrabyu warønrrab kørrømisrøbelø køn. ³¹Indiibe kan kwaløm køli nimbaserbe tru wendø numøsrwane trenchibig køn:

—Namui møskaimbe yandø kølliizhig køben, yu nam warainuube namba kasharanrrabelø muguen møgueløbe kaagøn cha, yu piraube mutøgucha trendø treeg kasharamig købig købene. ³²Namui møskawan vino mutsøsrá mutsiirana, nøba kigun cha, trumay namui møskaweinukkurri amrrub misaamera tøgagømig kønrrain— cha.

³³Incha tru yem møskawan mutsiirana, køli nimbaserbe kebya, møskaimba kibig køn. Inchen møskaimbe nune kinrrab tsumisren, mørmøwei, ni katø kurra iben mørmøwei indin købig køn.

³⁴Incha katø kwalømbe tru køli numøsráimbe wendø numøsrwane trenchibig køn:

—Nabe marig yem nai møskaimba kiaig køn cha, katø mõi yemgucha mutsiirana, mømibe ñi kebya kinrrig cha, trumay nam namui møskaweinukkurri amrrub misaamera tøgagømig kønrrain— cha.

³⁵Incha tru yem katø møskawan vino mutsøsrá mutsiirana, wendiibe kurra, katø møskaimba kibig køn. Inchen møskaimbe chu uras nøba kinrrab tsumisri mørmøwei, ni chu uras kurra, yai mørmøwei inchibig køn. ³⁶Incha Lotwei pa mimbasermerabe pailøba møskawei kwanrreelø kørrømisra, ³⁷køli nimbaserbe kan nusrkai tøgamisra, truigwane Moab munchi pasrig køn. Treekkurri truike mõi ya moabitasmerai møskain køn. ³⁸Inchen wendiikkucha kan nusrkai tøgamisra, truigwane Ben-ammi munchi pasrøbig køn. Inchen truike tru mõi ya amonitasmerai møskain køn.

20 ¹Incha Abrahambe tru nø tsuinukkurri Neguev pirausrømay ya, truipe Gadesba tru Shur ciudadameraba pønrrabnug tru utu kørromisrøbig køn. Incha tru Gerarsrømbe ka purainrrab arrubig lataitø tsuabe, ²trusrømbe tru nui srai Sarane, “naimbe nøbe nuchag køn” chibig køn. Inchen Abimélec tru Gerarsrø reybe Sarane wamønrrab øra, nui srain kønrrai isua kørromarøbig køn.

³Inchen tru yem Abimélecbe kan piaig tøgaguiyu Tiusbe arrua, nune trenchibig køn:

—Ñibe kwanrrabguen cha, kaguende ñi ñui srain kønrrai ñi kørromari ishuube kasharaweig køn— cha.

⁴Inchendø tru Abimélecbe tru ishuwane pera kib chi marmuig kua, nøbe trenchibig køn: —Señor, ¿chi kalø marmígwangucha ñigan kwetchab indirru? cha. ⁵Yamba Abraham nõtøwei ¿øyah chimuig kuitarru? cha: “Naimbe nøbe nuchag køn” cha. Inchen katø ishug misakkucha: “Naimbe nuchagwein køn” cha trendaig køn cha. Nabe nai manrrø umbugurri chi kaig isua kømøtø, nai tasiimeran chishig tøga pasrab, iigwan øyeeg marig køn— cha.

⁶Inchen Tiusbe piaigu trenchibig køn:

—Nagucha asha pasrar cha, ñui manrrø umbugurri tabig isua marigwan. Incha nabe ñi nan kalø marmønrrai na ñun kebachibashmuig køn cha. ⁷Inchawei ñi katøle nui keeba inrrai ibashmuisruandøbe ñibe isa kømø, kwanrrabguen cha, ñui yau mutø purrabelø køben truiløbañau. Kaguendø nøbe Tius maig karuigwan eshkabig køn cha. Incha ñi øsig kønrrai ñuimburø purøwaminchun cha—

⁸Indig katø løtsøbe Abimélecbe løtsø kurra, nui tru karub peraguilan wama, truilan mayeelan nun chi purayaigwan kerriguh eshkabig køn. Inchen tru møgueløbe purø kørro kørig kui inchibelø køn.

⁹Inchen Abimélecbe Abrahamwan wama, trenchibig køn:

—¿Ñibe namune chi mara pasrøgu? cha. ¿Pøs, nabe ñune chiyu kalø marta? cha. Ñibe naimbalaba, na misagwan karub tøga waimbalaba purø trømbøig kalø maringarubsrutan cha. Ñibe nane chi maraamíig mara pasrtan cha.— ¹⁰Incha katø Abimélecbe Abrahamwane trenchibig køn:

—¿Chi isuarre ñibe øyeeg marig kø?— cha.

¹¹Inchen Abrahambe trenchibig køn:

—Nabe nainetø treeg isuig køn cha: “Yusrømbe Tiuswan kørig tøgar muguen kaagua, nai srawan nømui mara kørromarøkkøptø nane kwetchaitamab”. ¹²Inchendø chiwei isamø chibig køn: “nøbe naimbe nuchagwein køn” cha. Nai møskaweimbe nøbe nimbasrøwein køn cha, usrimbe katøgan usrin kuindøgucha. Inchagurri nabe nune nai srain kønrrai marig køn cha. ¹³Nai møskawei yaugurri nan Tius ka truørøtø, truørøtø uñchai nan webingarub uras nabe Sarane trendaig køn cha: Na ñui keg kuitamab isua ñi tøga pasrøwabe trube, øyeeg chirrunrrig cha. Nam chu pub ambiisrøndøgucha ñibe øyah chirrunrrig cha, “ñibe nai nuchag kur”— cha.

¹⁴Inchen Abimelecebe Abrahamwane ubishamera køben, waaramera køben, katø nui karuig mendig melab møguelan køben, ishumburmeran køben tranøbig køn. Incha katøle nui srai Sarangucha tranøbig køn.

¹⁵Incha Abimelecebe trenchibig køn:

—Nai pirømerabe kerriguba ñui merrab pasran cha, ñun katøguchi tab tsumdønug, truyu kørømisra tsu— cha.

¹⁶Incha Sarane trenchibig køn:

—Nabe ñui nuchawane tsantsøn anmera mil tranar cha, tru anbe øyeeg purayaigwan truburø trani an køn cha, trube ñi chi kalø marmíig kuin kui ashchai maya misagwei malau kenamarig kønrrain cha. Trumaybe ñune mugucha kaig waminchippe kønrraamøn— cha.

¹⁷Inchen Abrahambe Tiusba waminchen, Tiusbe Abimelecwanba, nui srawanba trugurri nui karuig mendig melab ishumburmeranba ureg tøgagønrrai tamarøbig køn. ¹⁸Kaguende Jehovábe Abrahamwei srai tru Saran øyeeg puraiben Abimelecwei yaelane ureg chigaanrrai mayeelai matrizwan kasraig kua.

Isaac Kal-laig

21 ¹Nø maig taig købigwan trumay martrab Jehovábe Saran ashchab arrua, nune tru maig tranrrab kørømisrigwan treeg marig købig køn. ²Inchen Sarabe kwanrriig kørømisra, Abraham kølli misagwei kan nusrkai tøgaguig køn. Tius tru mana tøgagønrrun taig tru uraske. ³Inchen tru Sara tøgaguig unø tru møg-unø kal-labigwane Abrahambe Isaac munchi pasrig køn. ⁴Incha Abrahambe tru nui nusrkai Isaacwan trattø y pøn kwalømyu circuncidaig køn, Tius maig karuig køben, treekke. ⁵Nui nusrkai Isaac kal-laben, Abrahambe pilamera cien tøgagig købig køn. ⁶Incha Sarabe trenchibig køn: “Tiusbe nane ka intsøg kønrrai marig køn cha. Møikkøben na unø tøgaguin kui wammørøbeløbe naba ketøtø intsønrrun cha. ⁷¿Abrahamwane mugui trenchinrrautah cha, Sara ureg mutsørønrrun? chabe. Inchen køben, Abraham ya køllig køben nabe kan nusrkai tranar” chibig køn.

Agarwanba Ismaelwanba Abrahamwei Yaugurri Webusriiø

⁸Inchen Isaacbe nurab iben, yandø pitsø kuchen, tru pitsø kuchib kwalømbe Abrahambe larrø tab mamiimera tamarøbig køn. ⁹Inchen Sara ashene, mømibe tru Egiptosrø Agarwei nusrkai tru Abrahamba tøgaguig unø Ismaelbe, nui nusrkai Isaacwane ke ka intsatø ashen, ¹⁰Sarabe Abrahamwane trenchibig køn:

—Ñui tru karuindiig megab ishuwane nui nusrkawanba yugurri weguchi cha, kaguende tru ka karuindiig megab ishuwei nusrkaimbe nai nusrkai Isaacbabe chi tøgaguigwan keta tranamigube tøgatø ashchabig kømøn— cha.

¹¹Inchen øyeeg wammerabe Abrahamwane purø murig pubig køn, kaguen nui trag unan øyeeg nebuben. ¹²Treeg kuindøgucha Tiusbe Abrahamwane trenchibig køn:

—Ñui karuindiig megab ishuweimburab lata unaimburab lata chi isumøta cha. Sara nø maig taigwan kerriguba ka møra, trunun treeg ka mar cha, kaguende ñuinukkurri amrrunrrab misaamerabe Isaackurri kørnrun cha. ¹³Inchen tru ñui karuindiig megabigwei nusrkaweinukkingucha truba truba nørrø søtø misaamera kørnrai nabe treeg maramønrrun cha, kaguende ñuinukkurri arrubig kuimba.—

¹⁴Indig katø kwalømbe Abrahambe lõtsøzhig kurra, Agarwane pìrrin køben, pi niguin kalusyu pi køben trana, kildunyu mutøsa, Ismaelwane yandø ñi ashchig cha nun tranabe, ka amrrigay chibig køn. Inchen nøbe webya ya, Beerseba tru mu misag warab waraimøsrø chu pumikkaig llirab uñibig køn. ¹⁵Inchen tru kalusyu niguin pibe patsapinchen, unane kan lamø tusr umbusrø wanna, ¹⁶usrimbe truyugurri kan maya yabgøsrøn ashib wanrrab tarømisrøbig køn. Kaguende nøbe treeg isubig køn: “Nai unan kwai ashig kømøtan” cha. Inchen usri wamisren, unøbe trashib kishibig køn.

¹⁷Inchen Tiusbe unø trashib kisigwan møren, Tiuswei ángelbe Agarwan srømbalærøngurri wama trenchibig køn:

—¿Agar, chinnda? cha. Chi kørig isumøta cha. Kaguende unø nø wainukkurri kisigwan Tiusbe mørin køn cha. ¹⁸Kurra ya, unan tasku kemøra, srua pasramisrø cha, kaguende nabe nuinukkurri misaamera purø nørrø søtø kørnrai maramønrrun— cha.

¹⁹Inchen tru uras Tiusbe Agarwan kammeran kurøptinchen, nøbe kan pisu waig ashiptinchibig køn. Inchen Agarbe tru pi niguin kalusyu pi netsøgana, unan pizhig srørrøbig køn.

²⁰Inchen Tiusbe unan lincha pasrøben, unøbe nurab ya, mu misag warab waraimøsrø tsua, nøbe arcotøga søl øramibe kan piaig lataig købig køn.

²¹Incha nøbe Paran tru mu misag warab waraimø pirausrø tsubig kuig køn. Inchen usrimbe nune kan Egipto pirausrø ishuuba kasharanig køn.

Abrahamba Abimelecba Øyamay Kørnrai martrab cha Kørømarig

²²Tru kwalømmerawandøwei Abimelecba katø tru nui suldaumeran nø asha karubig Ficolba Abrahamwan trenchibelø køn:

—Ñi chi marøb arrigutøgucha Tiusbe ñiba pasran cha. ²³Incha mõi yutøwei ñibe Tiusken ashen ¡katø! nabe treeg marmø kømø, maramønrrun taitøga kalø marmørrumøn chirra chibelø køn, tru nan lata, nai nusrkawan lata, nainukkurri amrrub misaameran lata. Incha ¡katø! treeg maramønrrun chirra chibig køn nanba, mõi ñi yu tsuim pirau misaameranba tru purainrrab arruatiigwan utabelan tab inchib tøgagørrunrrig cha, tru ñun mandø tab indig køben tru tab inditøga treetøwei tab inchib.—

²⁴Inchen Abrahambe trenchibig køn:

—¡Katø! nabe treeg marmø kømø, maramønrrun— cha.

²⁵Inchendø Abrahambe Abimelecwane ‘ñibe nane øyeeg kalø marig køn’ cha trunun wesrabig køn, tru Abimelecwei karuig mendig melabelø

Abraham tru pirø umbugurri pi wesraizhig købigwan nun kerraigwan.

²⁶Inchen Abimelecbe trenchibig køn:

—Nabe øyee gwane murreendi mormur cha. Katø ñigucha nan wammørørsmøwei inchene, nabe møinguen wammørøb pasrar— cha.

²⁷Inchen Abrahambe ubishamera køben waaramera køben srua arrua, Abimelecwan tranøbig køn. Incha ambugurri, igurri øyamay kønrrab cha wamincha kørrømisrøbelø køn. ²⁸Inchen Abrahambe nui ubisha sötømerayugurri ishug ubisha-ureezheelø trattrø y par, nuingui tarømarøbig køn. ²⁹Inchene Abimelecbe trencha payibig køn:

—Iig tru ishug ubisha-ureezheelø trattrø y par tru ñi nuingui tarømariiløbe ¿maig punrrabigwan eshkabig køh?— cha.

³⁰Inchen Abrahambe trenchibig køn:

—Tru iig ishug ubisha-ureezheelø trattrø y par iilan na ñun tranen, ñi utiibe tru pirø umbugurri pizhigwane na lalla wesraig købigwan trunun eshka pasrørrabig køn— cha.

³¹Incha treekkurri trusrømbe Beerseba cha wamig køn, kaguende tru pa møguelø truyu ambugurri, igurri øyamay kønrrab cha wamincha kørrømisrig kua.

³²Incha øyamay kønrrab cha kørrømisrøbelø køn tru Beersebasrø. Incha Abimelecba katø tru suldaumeran nø asha karubig Ficolba katø filisteosmerai pirøsrømay katø ambubelø køn. ³³Incha Abrahambe tru Beersebasrø kan tamarisco tusr ellguawa pasrabe, Jehová, tru Managurri Managatig Wabigwei munchiwan isub wamabig køn. ³⁴Incha Abrahambe filisteosmeraim pirausrø purø yana tsuig køn.

Tiusweyasig Isaacwan Kwetchai Abrahamwan Tius Karub

22 ¹Inchen kan maya yanagøsrøn puraijen, Tiusbe Abrahamwane nui isubigwan Tiusweinug tøga pasraibe maig køtashchab ashchab marøbig køn. Incha Abrahamwan trenchibig køn:

—Abraham— cha.

Inchen nøbe:

—Yu pasrar— chiben, ²Tiusbe trenchibig køn:

—Møimbe ñui kandø nusrkai ñi truba undaaraigwan pera, Moriah pirausrømay ya, truyu kweecha, nan keta trannrra chibig køn. Kan tunyu maramigwan na eshkarrumøn— cha.

³Inchen Abrahambe katø kwalømbe løtsøzhig kurra, nui burrun tsølig pasra, trugurrimbe tru kweecha parramigweyasig trar para, nui karuig mendig melabelø pailanba nui nusrkai Isaacwanba pera, Tius chumay inrrain taisrømay ibig køn. ⁴Incha pøn kwalømyube Abrahambe kurraashabe yabgurrindø trusrø nebua ashibig køn. ⁵Inchabe tru nui karub pera kuilane trenchibig køn:

—Ñimbe yutø burrun srua muniiranrrigay cha. Nabe unøbatø trusrøngatig amba, Tiuswan tabig waminchib kua, katøle ñimuimay amrrumønrrun— cha.

⁶Incha Abrahambe tru kweetsigwan kerrigu parram trarwan tamara, nui nusrkai Isaacwan niisra, nõbe nagwanba, kuchillunba nemõra srua, pailõba ambub mendabelø køn. ⁷Inchabe Isaacbe nui mõskai Abrahamwane:

—Papá— chiben, mõskaimbe:

—Nai nusrkai ¿chi chinrrab inchigu?— chiben, Isaacbe trenchibig køn:

—Nambe nagwanba, trarwanbabe tõgaguer cha. Inchendø tru kweecha keta tranam ubisha unõbe ¿chu pasrah?— cha.

⁸Inchene Abrahambe trenchibig køn:

—Nai nusrkainzhig, tru keta tranam ubisha unane Tius nõ ashchab kuinrrun— cha. Incha pailõba ambub købelø køn.

⁹Incha Tius tru chu taisrø puabe, Abrahambe kan altar kusrua, tru pala trarwan tamara wara, nui nusrkawan lusra, tru pala trarrøbig køn. ¹⁰Incha Abrahambe nui nusrkawan kwetchab kuchillun srua kwalwan kusrubene, ¹¹mõimbe Jehovahæi kan ángel srømbalasrøngurri wamaptinchibig køn:

—¡Abraham! ¡Abraham!— chib.

Inchen nõbe:

—Yu pasrar— chiben, ¹²ángelbe trenchibig køn:

—Ñui tasigwan ñui nusrkaweimbala kusramøta cha. Chigucha marmøta cha. Ñibe Tiuswane kørig tõgaig maig købash inchimíig kui ashar cha, kaguende ñui nusrkai kandiigwan treebe marøg kømøtan chimøn— cha.

¹³Incha Abraham ashene, nui wendaube kan carnero srar kwaliimerayu iløsrka megaptinchibig køn. Inchen Abrahambe tru carneron kemøra nui nusrkawaimburø, kweecha, kerrigu parrøb Tiuswan keta tranøbig køn. ¹⁴Incha Abrahambe truyube “Jhová Chi Palabigwane Nø Ashibig Køn” cha munchi pasra wamig køn. Incha mõin kwalømgatig trenchibelø køn: “Tru tunyube chi palabigwane Tius nõ ashchun” cha.

¹⁵Incha Jehovahæi ángel srømbalasrøngurri Abrahamwan katøle wama, ¹⁶trenchibig køn:

—Na Jehovahæ mui katøganwei merrab kømø, nabe naasiitø marig kørrømisrtrai maramønrrun chib pasrar cha. Kaguende ñibe øyeeg maran cha, ñui kandø nusrkawan øyeebe marøkkømøtan chib, nan trenchib pasrømøtø. ¹⁷Inchawei nabe ñune mayanguen tabig nebuig kønrrai tranamønrrun cha. Ñuinukkurri amrrub misaamerane purø nõrrø kønrrai maramønrrun cha, srømbalasrø kønchabiimera pønrrabig lataig, mar menda pisrum lataig kønrrai nõrrø køptø. Ñuinukkurri amrrub misaamerabe nõmun ashig kømui inchibelai ciudadameran nõm merrarrowa tõga pønrramisrtrun cha. ¹⁸Ñui yellyu misaameragurri chu pirausrøn køben misaamera nõrrø søtø warabeløbe mayanguen tabig nebuig kønrrun chibig køn, nai wamwan ñi mõrikkurri.—

¹⁹Incha Abrahambe tru pailø nui karui melabelø munig kørrømisrøbelaisrømay katø ibig køn. Incha trugurrimbe ketøtø lincha

Beersebasrømay ambubelø køn. Incha Abrahambe yandø trusrø tsumisrig købig køn.

²⁰Indig wendøsrø Abrahamwane treeg wam pubig køn: “Tru nui nuneg Nacorwei srai Milcabe nusrkalo tøgagøn cha. ²¹Ke srøsrø tøgagui nusrkaimbe Uz køben, tru wendaube Buz køben, trugurrimbe Kemuel køben købig køn. ²²Tru wendau kal-labeløbe Hazo køben, Pildas køben, Jidlaf køben, Betuel købengue. ²³Inchen tru Betuelbe Rebecai møskain købig køn. Iilø køn Abrahamwei nuneg tru Nacorwei srai Milca tøgaguig nusrkalo trattrø y pøngatøba. ²⁴Katø Nacorbe nui linchaig Reumába nusrkalo tøgaguig købig køn. Truiløbe Teba taig køben, Gaham taig køben, Tahas taig køben, Maaca taig køben kuig køn.

Sara Kwaben Sørig

23 ¹Sarabe pilamera cientoveintisiete tøgag tsua, ²Canaan pirau Hebrón ciudayu Quiriat Arbasrø kwaig købig køn. Incha nøbe Sara kwaben kisha, truba isuín korrømisrøbig køn.

³Incha Abrahambe tru kwabig tsunukkurri webya ya, truyu hititasmeran trenchib waminchibig køn:

4—Nabe ñimui utube ka peesrøngurri arruatiig kuinaindøgucha, nai srawan søramigweyasig yanrra— chib.

⁵Inchen hititasmerabe trenchibelø køn:

6—Tiusmanda namui kølli misag namun mørtra cha: Ñibe namui utube chi maramigwan ñi asha karubig kønrrai Tius wesra pasrig møg køn cha. Ñui srawane namuyasig purø tabig tamarig pønrrabigu sørø chibelø køn. Namui utube møikkucha ñui srawan tru søra tramigwane ka chimønrrun— cha

⁷Inchen Abrahambe kurra pasramisra, hititasmerai merrab utsøbasrøptinchabe trenchibig køn:

8—Nai kwabigwan na yu sørønrrai ñimun tabig asønabene, Zoharwei nusrkai Efrónwan tiusmanda naimburø wamincha kettray cha, ⁹tru Macpela tain pirau linderomerayu søramig srug trab lalig pasrabigwan nan yanrrai. Mayaweyig kønrraptiig køben treezhigwan ñim mayeelø ashen anwan na wartrab tan chirrunrigay cha, trumay nai yau misaameran søramig tøgagønrrab— cha.

¹⁰Inchen tru Efrón hititabe nui misag utu wawabe, truilø mørøb, katø tru nui ciudayu yaskabwan mayeelø kebambubelø mørøb inchai Abrahamwane trenchibig køn:

¹¹—Nai kølli misag, tiusmanda, pirøwane ka kettrumøn cha, katø tru søramig srug trab lalig tru pirau pasrabigwanba. Nai misaamerabe nømbe asha korrømisran cha. Na pirøwane ñune ketig køben, ñui srawane ka sørø— chibig køn.

¹²Inchen Abrahambe tru pirau maya misagwei merrab utsøbasra, ¹³truyu warab misaamerai merrab tru Efronwan Abrahambe trenchibig køn:

—Ñi pirōwan nan yanrrab isuppe, tiusmanda mōrtra cha. Tru pirō mayaweyig kōn, chiben, nabe treegwan anwan wartrumōn cha. Trumay kōrrōmisrtra cha, treebe si, nai srawan na truyu sōramōnrrun— cha.

¹⁴Inchene Efrōnbe Abrahamwane trenchibig kōn:

—Nai kōlli-misag tiusmanda mōrtra cha. ¹⁵Pirōbe tsandzōn an cuatrocientosweyig kōn cha. Inchendō anwan isumōtō tru kwabigwan ka sōrō— chibig kōn.

¹⁶Inchen Abrahambe tru Efrōn trendaigwan trumay kōrrōmisra, Efrōn mayaweyig kōn cha eshkaigwan tru hititasmerai merrab Abrahambe cuatrocientos tsantsōn anwan mōi, mōi unaashibig kōn, tru penab, yanōb inchibelō maig marōbelō kōben treetōweingue.

¹⁷Inchawei tru Efrōnweim pirō tru Mamre taisrō pōrr neeshibgatōmay Macpela taisrō pasrab pirōbe, tru sōramig tru srug trab lalig lata, tru pirau pōnrrab tusrmera lata, ¹⁸yandō Abrahamwei kōrrōmisrig kōn, tru hititasmeraba, katō tru ciudayu yaskabwan kebambubelōba ashen. ¹⁹Incha trugurri Abrahambe nui srai Saran tru Mamre pōrr neeshibgatōmay Macpela tain pirau sōramig tru srug trab lalig pasrabigu sōrabig kōn, tru Hebron Canaán pirausrō. ²⁰Inchawei tru pirōba tru sōrig srug trab laliibabe yandō Abrahamweyasig yandō mu kōnōgamgaig kōrrōmisrig kōn, trube tru hititasmera Abrahamwan yanig sōrab tōgagōnrrai.

Abraham Isaacwei Srain Kōnrrabigwan Lab

24 ¹Yandō Abrahambe kōlliizhig pilameragucha tsabōtō tōgaig, chiyutōgucha Jehová mayanguen tabig nebuig kōnrrai tranigwan tōgaig kōbig kōn. ²Incha kan piji Abrahambe tru nui karuig mendig megabig ke managurri peraguig nui chi kōbigwan nō asha marōb pasrabigwan wamabe, trenchibig kōn:

—Ñui tasigwan nai srōptsim umbu estsartra cha. ³Incha tru srōmbalameranba, pirōwanba nō ashib pasrab Tiuswei merrab ¡katō! treegwan marmō kōmō, nabe maramōnrrun chirra chibig kōn. Yu Canaán pirau na tsuinug ishuwan nai nusrkaweyasig srain kōnrrai lab pasramig kōmōnrrain cha. ⁴Treeg kōmōtō, naim pirausrōmay nai yau misaameraimay irrunrrig cha, nai nusrkai Isaácweyasig srain kōnrrabigwan lanrrab.—

⁵Inchen tru karub peraguibe trenchibig kōn:

—¿Inchippa ishug unō i pirausrōmay naba arrumōnrrab misrene, trube, maig punrrerrah? cha. ¿Trube, ñui nusrkawan tru ñi webarrua arri pirausrōmay nabe pera yam punrrautah?— cha.

⁶Inchen Abrahambe trenchibig kōn:

—Nai nusrkawane chiweinguen trusrōmaybe pera imōrrunrrig cha, ⁷Jehová srōmbalamerai nō Tius, nai mōskawei yaugurrimba, nai yau misaamerai piraugurrimba nan wesrabiibe, ¡katō! treegwan marmō kōmō,

nabe maramønrrun taitøga nan øyah chib wamindig køn cha: “Ñuinukkurri amrrub misaameran i pirøwan tranrrumøn” cha. Inchawei nøbe nui ángelwan ñui merrab ørtrun cha, nai nusrkaweyasig srain kønrrabigwan trusrøngurri ñi pera attrai. ⁸Inchene ishug-unø yandø arrumubene, trube, tru ¡katø! nabe treegwan maramønrrun cha, ñi kørrømsriibe ñuimburappe yandø ñibe chi isumikkaig kørrømisrabguen chibig køn. Inchendø nai nusrkawanesi trusrømayguimbe pera imørrunrig— cha.

⁹Inchen tru nui karub pera kuibe tru nui karubig Abrahamwei srøptsim umbu nui tasigwan estsarøbig køn, tru chi martrab taigwan ¡katø! nabe treeg maramønrrun chib.

¹⁰Incha nøbe tru nun karub pera købig Abrahamwei pa trattrø camellosmeran nemøra, tru nui karub pera købigwei purø tabelan chine ketamig srua, Nacorwei ciudadsrømay ibig køn, tru Mesopotamiasrømay. ¹¹Incha ciudayu kømøtø, wambiisø camellosmeran kan pisu pulu tømønstrøngarubig køn isrønrrai, yandø maaben køben, tru srusralmera pi kalrrab werrum uras.

¹²Inchabe trenchib Tiusba waminchibig køn:

—Nan karub peragøbig Abrahamwei Tius, møin kwaløm na purø tab purayamig kønrrai martra cha. Nan karub peragøbig Abrahamwan ñi purø tab indigwan nun kenamar cha. ¹³Nabe yu pisu pulu pasrar cha, tru i ciudayu srusralmera pi wesranrrab amrrumne. ¹⁴Incha na tru srusran øyah taig truig kønrrain cha: “Na lamø pi mutsamig kønrrai tiusmanda ñui køtsøn pinøsrø” chiben, nøbe lötappe: “Muchi cha. Katø ñui camellosmeran chigucha na pi mutsøsrømønrrun” cha trenchibig, truig kønrrain cha, tru ñi lawa wesruig, ñui karuig megabig Isaacweyasig. Øyamay nabe wetøbenamønrrun cha, ñi nan karub peragøbigwan purø tab indigwan.—

¹⁵Inchen nø Tiusba chab waminchimøwatø, mømibe kan srusrø nui køtsøn kildunyu mutaig arruptinchibig køn, truike Rebeca, Betuelwei nimbasr. Tru Betuelbe Milcaimba, Nacorweimba nusrkain købig køn, Abrahamwei nunewei. ¹⁶Inchen tru srusrøbe truba tab ishug købig køn, mu møøbagucha kia kømíig købig køn. Tru srusrøbe pisuyu kørraarub, nui køtsøn pi netsøganøb katø inrrab iben, ¹⁷tru Abrahamwei karuig mendig megabiibe truigweimay lulabe, trenchibig køn:

—Ñui køtsøyu piwan kuchi srørrøbsrumuguh— cha.

¹⁸Inchene nøbe:

—Nai kasuku, muchi— chibig køn.

Incha mallatø køtsøn pinøsrub, køtsøn tasku muta pasramisra srørrøbig køn. ¹⁹Incha:

—Ñui camellosmeraingucha pi wesranrrab chibig køn, mutsamburab mutchai.— ²⁰Incha mallazhiitø tru køtsøyu piwan tru pi kwarainug kwara treetø, treetø yambiji pi wesrawa, mam camellos kuimba mutsamne kwarøbig køn. ²¹Inchen tru Abrahamwei karuig mendig megabiibe chigucha chimøtø, asig pasrabig køn, kaguende nøbe ke tab wetøbeñchab inchib pasraig kua,

tru nø arriibe ka kauløtø kømø arrig kønrrai Jehová nun puruguig kõtashig køb. ²²Inchen tru camellosmera piwan chab mucho, tru Abrahamwei karuig mendig megabiibe kan oro surtigas seis gramos tøgagwan kimyu mesrønrai tranøb, katø kwalmerayu pagatø orotøga mariilan treetøwei pønrsøb inçhibig køn, kwatsumayabe cien gramos menrraikke. Inçhabe trencha payibig køn:

²³—¿Ñibe mui nimbasr kugu? cha. Tiusmanda eshkarra cha.

Katø ¿ñui møskawei yaube naba, nan lincha amrrub møgueløba chu kørromisramdiig kø chinderah?— cha.

²⁴Inçhene nøbe trenchibig køn:

—Nabe Betelwei nimbasr kur cha, tru Milcaimba, Nacorweimba nusrkawei.— ²⁵Incha katø trenchibig køn:

—Namui yaube ñim kørromisra kiamiitø kømø, katø camellosmerai pu køben, para kebusriilø menrraguen tøgaguer cha, katø ñimuyasig chigucha.—

²⁶Inchen tru møøbe tømønrsra utsøbasrabe, Tiuswan trenchib tabig waminçhibig køn: ²⁷“Jehovábe maya nugucha, tabig køn cha, nan karub peragøbig Abrahamwei Tius. Nøbe nan karub peragøbigwan, purø nu tab indigwanba managuen elachimugwanba kenamarøb pasrain køn cha. Incha nan karub peragøbigwei nømmissamerai yausrø punrrai mariitan” cha.

²⁸Inchen tru sursrøbe luløbig køn, tru chi purayaigwan nui yuelan eshkanrrab. ²⁹Inchen tru Rebeca kan nuchag Laban taig tøgaguibe, truiibe tru mowan lanrrab pisusrøngatig luløbig køn, ³⁰kaguende Labanbe nuchawei tru surtigaswan køben, katø tru kwalyu pønraigwan køben ashib, katø ‘tru møg øyah, øyah chitan’ chib eshkaigwan mørøb indig kua. Incha Labanbe tru Abrahamwei karuig mendig megabigwein pulusrø kemallibig køn, truiibe nui camellosmeraba pisu pulusrø srø pasramne. ³¹Incha Labanbe trusrø pua: —Jehová maya nuguen tabig nebuig kønrrai indi møg, amø chibig køn. ¿Ñibe wambiitøbe chinchib pasrønrragu? cha. Nabe yawane ñuyasig chab tamarar cha, katø ñui camellosmerain chigucha.—

³²Inchen tru Abrahamwei karuig mendig megabiibe yamay arruben, nømbe camellosmeran niisrailan chab picha warabe, manrrai pønrsøbig køn. Incha trugurrimbe pi srua arrubig køn, tru Abrahamwei karuig mendig megabiiba, tru nui lincha amrrubeløba nømui srømmeran kwallchai. ³³Incha manrrai mamiimera pønrsøben, Abrahamwei mendig megabiibe trenchibig køn:

—Nabe na chi wamindamigwan wammørøsrømøwatøbe uta manrrab kaimamønrrun— cha.

Inchen Labanbe:

—Trube, wammørøsrørra— chibene, ³⁴Tru Abrahamwei mendig megabiibe trenchibig køn:

—Nabe tru Abrahamwei mendig megab møg kur cha. ³⁵Nan karub peragøbig Abrahamwane Jehovábe mayanguen tabig nebuig kønrrai

marig kòn cha. Nøbe larrø pua møg kòn cha. Nune ubishamera køben, waaramera køben, an køben, oro køben, karuindiig melab møguelø køben, ishumburmera køben, camellosmera køben, burrusmera køben tranig, treeg tøgagøn cha. ³⁶Inchen, nan karub pera købigwei srai Sarabe, køllimbala nui kan nusrkai tøgamisrig kòn cha. Inchen nan karub peragøbiibe nui chi tøgaguilan kerriguba nui nusrkaweyasig kørrømaran cha. ³⁷Nane nan karub peragøbiibe, ¡katø! nane øyegwan marmø kømø, maramønrrun tingaru tan cha, øyah chib: “Nai nusrkaweimbe yu Canaán pirau tru na tsuinug ishumburmerai utu ishuwan srai lanrrain kømøn” cha. ³⁸“Treeg kømøtø, nai møskawei yau misaameraimay ya, nai misagugurri amrrub ishumburmerai utu ishuwan nai nusrkawei srain kønrrai larrunrig” cha.

³⁹Inchene nabe nun trenchibig kur cha: “¿Inchippa ishug-unø nai mendig arrumønrrab incheneh?” cha.

⁴⁰Inchen nøbe nane trenchibig kòn cha: “Jehova maig chiben nabe trumay uninabig køben, truig ñune nui ángelwan ñiba inrrai ørtrun cha, ñi webya yaibe mayanguen tab punrrai, tru nai yau misaamerai yau ishug-unan nai nusrkawei srain kønrrai lanrrai, tru nai møskawei yauelainug. ⁴¹Inchen nai yauelø ishug unan tranøg kømuinchenequende ñi nan ¡katø! nabe treeg marmø kømø, maramønrrun taigwane trube, yandø ñibe chi isumikkaig kørrømisrabguen chibig kòn.” cha.

⁴²Inchen na mõi pisuyu puabe, nabe Jehováwan øyah chib miaig kòn cha: “Nan karub pera tøgagøbig Abrahamwei ñi Tius, ñi na arrigwan nan tab webyamig kønrrain kuabe trube, ⁴³na mõi pisu pulu pasrøben, øyeg purainrrain cha, tru pi wesrawa srua inrrab arrub srusran: ‘Tiusmanda, ñui køtsøyu piwan nan kuchi srørrøbsrumugu’ chiben, ⁴⁴nan øyah cha løtabig truig kønrrain cha: nan ‘muchi’ cha srørrøb, ‘katø ñui camellosmeraingucha pi wesrunrrur’ chibig, truig kønrrain cha, tru nan karub peragøbigwei nusrkawei srain kønrrai Jehová lawa wesruig ishug unø.”

⁴⁵Inchen nabe nai umbutø Tiusba chab waminchimøwatø, mømibe Rebecabe pi mutin køtsøn kildunyu mutaig, arruptindi ashibig kur cha. Incha pisuyu pi wesranrrab kørraiben, nabe trenchibig kur cha: “Tiusmanda, nan pi srøttra” cha.

⁴⁶Inchen nøbe tru urastø køtsøn pinøsrub, nan “muchi” cha srørrøb, “katø ñui camellosmerangucha pi mutsøsrønrrur” chiptinchibig kòn cha. Na muchib pasramne nøbe camellosmeran pi mutsøsrøbig kòn cha.

⁴⁷Inchen nabe “¿Ñibe mui nimbasr kugu?” cha payene, nøbe nane trenchibig kòn: “Nabe Betuelwei nimbasr kur cha, tru Nacorweimba Milcaimba nusrkawei.” Inchen nabe nune kan surtigas kimyu mesrøb, kualmerayu pønraigwan pønrsøb inchibig kur. ⁴⁸Incha nabe Jehováwan tabig waminchab tømønrsøbig kur. Jehováwan mayanguen, tabig kòn chib, nan karub tøga pasrabig Abrahamwei Tiuswan, nan tru muba arrum maywan pera arrimburø; tru nø nan karub peragøbig Abrahamwei nusrkawan nui trag yau misagwan

srain kónrrai tranen. ⁴⁹Inchawei nai karub tōga pasrabigwan ñim yaelø kermab pesannameelø køb, larrø tammayelø køb treelø kuabe, nan eshkarray cha. Inchen treeg kónrrab kómubene, trube, trunungucha eshkarray cha. Trumaybe na mandø indamigwan na isumig kónrrautan— cha.

⁵⁰Inchene Labánba, Betuelbabe trenchibelø køn:

—Pøs, øyebe chiguen kómøtø, Jehováweinukkurri arriinrrun cha. Nambe søl køn cha lètamig kómøwei, kabe kalø køn cha lètamig kómøwein kòtan cha. ⁵¹Rebecabe yu wan cha. Ñun karub peragøbigwei nusrkawei srain kónrrai trube pera inrrø chibig køn, Jehová nø maig kónrrai isuig, trumay.—

⁵²Inchen Abrahamwei karuig mendig megabiibe øyeeg taigwan mörøppe, Jehováwei merrab tømboñsra pirausrongatig utsøbasrøbig køn. ⁵³Incha tabzheelø orotøga mariilø køben, andøga mariilø køben, kemelø køben, wesrawa Rebecan ketøbig køn, Incha nuchawanba usranba truilangucha, chigøben ketøbig køn. ⁵⁴Incha tru Abrahamwei karuig mendig megabiibe tru nui lincha pera yailøba uta mab, uta muchib incha, truyu kòrrømisra kibelø køn. Incha katø løtsø kurrabe, tru Abrahamwei karuig mendig megabiibe trenchibig køn:

—Nan karub peragøbig Abrahamwei yausrømay ambashchay— cha.

⁵⁵Treeg kuingucha Rebecai nuchaaba, usrimbabe trenchibelø køn:

—Ishug unøbe kan pa tratrø kwalømdøguen namba ka kòrrømisrtrain cha. Trugurrimbeguendø ka ibwei inchun— cha.

⁵⁶Inchen tru Abrahamwei mendig megabiibe trenchibig køn:

—Nan kòrrømisrtrai inchumørrunrigay cha, na arrigwan Tiusbe yangucha tab punrrai marig købene, trube, tru nan karub pera købigwei yamay katø ibashchunrigay— cha.

⁵⁷Inchen nømbe trenchibelø køn:

—Trube, ishug unan wamønrrab cha, nø manchitashchab— cha.

⁵⁸Incha nømbe Rebecan wama, payibelø køn:

—¿I møøba inrraguh?— cha. Inchene nøbe:

—Øø, na lincha inrrur— chibig køn.

⁵⁹Inchen nømbe nuchag Rebecan ibashibelø køn, katø Rebecan lamiikkurri ashib tøgagøb ishuwanba. Abraham karub peraguiba, katø tru nø lincha pera arriiløba inrrai.

⁶⁰Incha Rebecane mayanguen tabig nebuig kónrrai nømbe øyeeg chibelø køn:

—Ñi, namui nuchag, misaamera purø nørøø katøyug katøyug amrrubelai usrin kónrrai isuer cha. Tru ñuinukkurri amrrub misaamerabe nømun ashig kòmuinchibelai ciudadameran nøm merrarrawa tōga pønrramisrtrain— cha.

⁶¹Incha Rebecabe tru nui karub tøgagui srusralmeraba, yandø camellosmeran itøguana, tru Abrahamwei mendig megabigwei tru mendig ambubelø køn. Øyamay tru Abrahamwei mendig megabiibe Rebecan pera ibig køn, truyugurri.

⁶²Inchen Isaacbe tru “Øsig Wab, katø Nan Ashibig” cha wamim pisuyugurri katø arrin købig køn, kaguende nøbe Néguev pirau tsubig kua. ⁶³Isaacbe kan maaben wambigwansrø lliranrrab webarrin købig køn. Incha mømibe kurraashene, camellosmara pulu lutaurab amrruptinchibelø køn. ⁶⁴Inchen Rebecagucha kurraasha, Isaacwan ashabe, camelloyugurri pinaarrua, ⁶⁵tru Abrahamwei mendig megabigwan payibig køn:

—¿Mugøh? cha, ø møg namun katønrrab øsrø arrubiibe.—

Inchene nøbe:

—Øibe nan karub pera købig truig køn— chiben, Rebecabe tru malø kasraitøga pinab kasrøptinchibig køn.

⁶⁶Inchen tru karuig mendig megabiibe nø maitø marigwan kerriguh Isaacwan waminchibig køn. ⁶⁷Incha Isaacbe tru nui usri Sara tsui carpa ya købiisrømay Rebecan pera arrua, Rebecane nui srain kønrrai marøbig køn. Isaacbe Rebecane truba truba undaarawa, øyamay Isaacbe nui usrin kwabigwan truba pesrøgui uniibe yandø tabgui

Abrahamweimba Srai Ceturaimba Ureemeragurri Amrrub Misaamera

25 ¹Abrahambe katøgan srai tøgaguig købig køn, truigwei munchibe Cetura taig. ²Truibe Zimramwan køben, Jocsánwan køben, Medánwan køben, Madiánwan køben, Isbacwan køben, Súajwan køben tøgaguig køn. ³Inchen Jocsanbe Sebanba, Dedánwanba tøgaguig køn. Inchen tru Dedánweinukkurri amrrub misaamerabe: asureosmera køben, letuseosmera køben, leomeusmera køben kuig køn. ⁴Inchen tru Madiánwei nusrkaløbe: Efa køben, Efer køben, Janoc køben, Abida køben, Elda køben kuig køn, truiløbe mayamba Ceturainukkurri amrrub misaamera.

⁵Abrahambe nø kerrigu chi tøgaguilane Isaacwan chishtøh kørømarig køn. ⁶Inchen nui linchatø ishumburmeraba tøgagui ureemerane chigøben ketiilø trana, incha nø øsig wappatø nusrkai Isaacweinukkurri tarømara, truilane pørr neeshibgatømay pirømerasrø warønrrai ørig køn.

Abraham Kwaigwanba, Sørigwanba Waminchib

⁷Abraham øsig tsuibe pilamera ciento setenta y cinco kuig køn. ⁸Larrø kølliizhig misra, kwaig købig køn, larrø yam pilamera øsig tsua. Incha nui kølli misaameraba tsunrrab yaig købig køn. ⁹Inchen nui nusrkalø Isaacba, Ismaelba misra kusra sørabelø køn, tru Macpela tainug, søramig peñayu trab lalig pasrabigu tru Mamre taig pinrrøguewansrø, tru Zohar hititai nusrkai Efrønweim pirau. ¹⁰Iibe tru Abraham hititasmeran penin pirø købig kuig køn. Truyu Abrahamwan sørig købig køn, Sara sraweim pulutøwei. ¹¹Inchen yandø Abraham kwaben, Tiusbe Isaac nui nusrkawane mayanguen tabig nebuig kønrrai inchen, Isaacbe tru ‘Øsig Wab, katø Nan Ashibig’ taisrø pisu puluwan kørømisra, tsubig køn.

Ismaelweinukkurri Amrrub Misaamera

¹²Abrahamwei nusrkai Ismaelweinukkurri amrrub misaamerabe iilø køn, tru Sarai karuindiig megab ishug egipcia tru Agar Abrahamba tøgagui unai. ¹³Iilø køn tru Ismaelwei nusrkalai munchimera, tru kerrigu mayur kal-labigwei wendautø trumørig kal-lawa amrrubelai. Ismaelwei kerrigu mayur nusrkaimbe Nebayot køben, trugurrimbe Cedar køben, trugurrimbe Adbel køben, Mibsan køben, ¹⁴trugurrimbe Misma køben, Duma køben, Masa køben, ¹⁵Hadar køben, Tema køben, Jetur køben, Nafis køben, Cedema køben kuig køn. ¹⁶Iilø køn tru Ismaelwei doce nusrkalo, tru nømui nørrø misag sötømrørig ashib pønrrabelai munchimera. Nømui pirømeraba nøm chu kørømisra warailøbabe tru munchimeratøgatøwei pønsra wamiilø. ¹⁷Inchen Ismaelwei øsig kuin pilamerabe ciento treinta y siete kuig køn. Inchen nui israbig luchen, yandø kwaig køn. Incha nui kølli misaameraba tsunrrab yaig køn. ¹⁸Incha ismaelitasmerabe Havilasrøngurri Shur taisrøngatig waraig købig køn, Egipto pinrrøguewansrø, tru Asiriamay ambi maywansrø. Inchen nøbe nunelan, ka kwayam laptø, kwayam laptø tsubig køn cha.

Jacobpa Esauba Kal-laig

¹⁹Iig køn tru Isaacweimburab chi pureb arrigwan wamindig, tru Abrahamwei nusrkawan. ²⁰Isaacbe Rebecaba kasharab uras pilamera cuarenta tøgagui kuig køn, tru Rebecabe Betuelwei nimbasr Labanwei nuchag købig køn. Inchen Betuelba Labanbabe arameosmera Padan-aramsrø warabelø kuig køn.

²¹Rebecabe trendø ureg chigagønrrabig køben, Isaacbe nui sraweyasig Jehováwan miabig køn. Inchen Jehovábe nø miaigwan møren, Rebecabe kwanrriig kørømisrig køn. ²²Inchen tru pa ureemerabe nui patsautø kwayab purrøben, Rebecabe treeg isubig køn: “Øyeeg købene, ¿chiwein kui øsig uñibig unamøtah?” cha. Incha Jehováwan payrrab ibene, ²³Jehovábe trenchibig køn:

—Nui patsaube misaamera purø nørøbatø pa sötø køn cha. Misagwan ashib karub pønrrønrrabelø pailø nørreelø ñui patsau purraisrøngurri nørømisrøbguen purran cha. Kane katøgan lataguen kømø, mu chindamgaig kønrrabig køn cha.

Inchen mayur kal-labiibe wendiig nø karuig meganrrabig køn— cha.

²⁴Indig yandø kal-lamig ura pubene, nui patsaube møg ureezheelø par kuin køptinchibig køn. ²⁵Inchen tru srøsrø kal-labzhiibe ke pigø isig nabzhig købig køn, trurrigu asr ørøba isikuzhikke. Treekkurri Esau munchi pasrig køn. ²⁶Inchen tru wendau nuneebe Esauwei talunwan merrarraweig kal-laben, treekkurri Jacob munchi pasrig køn. Inchen Isaacbe tru parcheelø kal-labene, pilamera sesenta tøgagui kuig køn. Nø Mayur Kal-laig Nusrkain Kuimburø Nø Uta Tøgagømigwan Yanøb

²⁷Inchen ureemerabe nõrrørab amba, Esaube ushameran pasraara kemøramiibe ke kan kaisab lataig inçhibig købig køn, kaambumerawansrø unamig chull møg kua. Trune Jacobpe treeg maramigwane chi isumø ka nuimburab uñibig køn, carpa yau kørrømisra chigøben maramigwan chullig.
²⁸Incha Isaacbe Esaúwan mas undaarabig køn, kaguen nõ chi kemøra sua arriilan srørrig mabig kua. Trune Rebecabe Jacobwanre mas undaarabig køn.
²⁹Indiibe kan kwaløm Jacobpe pigø mamig may tamariizhig nenøb wabene, Esaube wabigwansrø llirab uña, larrø muraaraig puabe,
³⁰Jacobwane trenchibig køn:

—Ø pigø mamig may tamara ñi neniizhigwan tiusmanda srøttra cha, kaguende nabe larrø muraaraig war— cha. (Inchagurri Edom cha wamig kuig køn.)

³¹Inchene Jacobpe trencha løtaptinchibig køn:

—Ñi mayur nusrkain kuimburø uta tøgagømigwan møin kwaløm, trube, yunømaryagun— cha.

³²Inchen Esaube:

—Pøs, nane parøgwabiitø ke kwamdø køtan cha. ¿Na mayur nusrkain kuimburø uta tøgaguatøbe chigui indamøtah?— chiben, ³³Jacobpe trenchiptinchibig køn:

—Møin kwaløm ¡katø! treegwan marmø kømø, maramønrrun chirra— cha.

Inchen nõbe: —¡Katø! treegwan maramønrrun— cha kørrømisra, nõ mayur nusrkain kuimburø uta tøgaguigwan Jacobpa yunømaryabelø køn.

³⁴Inchen Jacobpe nuimburappe, pirrin køben, tru lentejas tamari mamiizhigwan køben tranen; truígwan uta mab muchib inchabe, truyugurri kurrab ibig køn. Øyeeg mara, Esaube nõ mayur nusrkain kuimburø uta tøgagømigwan chiguen tabig kømui lataig indig købig køn.

Isaacbe Gerarsrø

26 ¹Tru kwalømmerawan tru pirau parø purø trømbøig arrubig køn, tru Abraham tsub urassrø parø arrub lataitøwei. Inchen Isaacbe Gerarsrømay ibig køn, tru filisteosmerai rey Abimelec tsuisrømay.
²Incha truyu Jehovahé Isaacwan kenamisra, trenchibig køn:

—Egiptosrømaybe imøta cha. Na chu tsunrrain chiben tru pirau kørrømisra cha. ³I pirautø ka tsu cha, ka petø purainrrab arruatiig lataitøweingue. Nabe ñiba pasramønrrun cha. Incha nabe ñun mayanguen tabig nebuig kønrrai maramønrrun cha; kaguen ñuinukkurri amrrub misaamerane i pirømeran kerriguh tranamønrrun cha. Øyamay ñui møkai Abrahamwan ¡katø! nabe tru treegwan marmø kømø, martrab taigwane maramønrrun cha. ⁴Ñuinukkurri amrrub misaamerane kan srømbalasrø kønchabiimera lataig nõrrø kønrrai mara, i pirømeran kerriguh tranamønrrun. Incha chu pirausrøn køben misaamera nõrrø sötø warabeløbe mayanguen tabig nebuig kønrrai marig kønrrun cha tru ñui misaamera amrrubeløyugurri. ⁵Kaguende Abrahambe

tru na maig taig wamwan nan mōra, treeg kōrrōmisrtraī marig kōn cha, tru øyeeg kōmig kōn cha na wamindigwanba, martrai na karua pōnsrailanba, mandø kōmigwan eshkawa pōnsrailanba, katø mu chindamgaig martrai karua pōnsrailanba.— ⁶Incha Isaacbe Gerar pirau kōrrōmisra tsuig kōbig kōn.

⁷Inchen trusrø warab mōguelø nui sraweimburab payene, nøbe trenchibig kōn: —Naimbe nuchag kōn— cha, kaguende nøbe kōrig kui inchibig kōn ‘nai srain kōn’ tamiibe. Nui srai Rebecan nōmui marøg kōptø trusrø mōgueløbe nun kwetchaitamab isubig kōn, kaguende nøbe purø tab ishug kōben.

⁸Incha kan maya yana kōsrōn Isaacbe trusrø tsuben, tru Abimelec filisteosmerai reybe kan pendanayu ashīb pasrøbene, mōimbe Isaacbe nui srai Rebecane truba tabzhig undaarab pasrai ashiptinchabe. ⁹Abimelecbe Isaacwan wamabe, trenchibig kōn:

—Chima øibe ñui srain kuirreh cha. Inchendø nane ¿chindimbarre, “naimbe nuchag kōn” chigu?— cha.

Inchene Isaacbe trenchibig kōn:

—Kaguende nun nōmui marøg kōptø nabe pinisaig kōmuitamab isua trendaig kōn— cha.

¹⁰Inchene Abimelecbe trenchibig kōn:

—Ñibe namune ¿chindimbarre øyeeg margu? cha. Katøguchimbe namui misagu mōig kōben, ñui sraimba kaig marøb waramisrig kuimasrtø cha. Incha treeg kaig mariitøga kangurrindø ñibe namune mayeelan kegørrørka pōnsrøbsrutan— cha!.

¹¹Incha Abimelecbe maya misagwan trencha karua pasrøbig kōn:

—Møikkōben i mōwan kui, kabe nui srawan kui chigøben inchib kalø marøbiibe kwamig kōnrrain— cha.

¹²Indiibe Isaac tru pirau ellmara, tru pilawan kan yellzhikkurrindø cien menrrabatø purø nōrrø tulishibig kōn, kaguende Jehová nun mayanguen tabig nebuig kōnrrai inchen. ¹³Incha nøbe maskken maskken pua misrøb, larrø nui misrøb ya, muguen treeg tøgagømuinrrunig puaig misrig kōn. ¹⁴Incha Isaacbe ubisha sötømera kōben, waara sötømera kōben, nun mara tranøbelø trurrigu nōrrø tøgagøben filisteosmerabe pusrkwai ashīb mendabelø kōn. ¹⁵Incha nui mōskai Abraham øsig wab urassrø, Abrahamwei karuig mendig melabeløbe aljibesmera lalla, pi wesruilan, truilan filisteosmerabe pirøtøga netsø kasra pōnsrøbelø kōn.

¹⁶Inchen Abimelecbe Isaacwane trenchibig kōn:

—Ñibe namuinukkurrimbe tarømisra, inrrø cha, kaguende ñibe nam lataguen kōmø mu chindamga nuig misrin kōn— cha.

¹⁷Inchen Isaacbe truyugurri ya, Gerar chag pirømerasrø tsumisrig kōn. ¹⁸Mōskai øsig wab urassrø pisumera lalla, wesruilø kōbigwan, katøle kura wesrubig kōn; mōskai kwaimbala tru filisteosmera kasra pōnsraig kōbelan. Incha tru pisumerane mōskai chi munchi pōnsraig kōbelan tru munchimeratøgatøwein pōnsra wamabig kōn.

¹⁹Indig kan kwaløm Isaacwei karuig mendig melabeløbe tru chaasrø lallib kuabe, luløb pizheelø wetørrabelø køn. ²⁰Inchen tru Gerar pirau ubisha ashib warabeløbe Isaacwei ubisha ashibeløba ‘i pibe namuin køn’ chib larrø mur aleguiyabelø køn. Incha treekkurri Isaabe tru pisuwane ‘Esek’, (‘Aleguiyaim Pi’) cha munchi pasrig køn, kaguendø nømbe tru pigurri aleguiyaig kua. ²¹Inchen katøgan pisu lalla wesruben, katø truikkurri treetøwei mur aleguiyabelø køn. Incha truigwane “Sitna” (‘Ashig Kømui Indiyab Kørrømisrin Pi’) cha munchi pasrig køn. ²²Inchen Isaacbe truyugurri nøøromisra ya, katøgan pisu lalla wesraben, yandø tru pisuwane “Rehobot” cha munchi pasrig køn (‘Pishindø Tab Waramdiig Køn’ chib). “Møimbe chigømø llirab waramig kønrrai Jehovábe trandan cha nam i pirau merraptø webambamig kønrrai”

²³Inchen Isaacbe truyugurri Beersebamay ibig køn. ²⁴Inchen tru yem Jehovábe Isaacwan kenamisra, trenchibig køn:

—Nabe ñui møskai Abrahamwei Tius kur cha. Chi kørig kui inchimøta cha. Nabe ñiba pasrar cha. Nai karuigwan marøb megabig Abrahamwan undag køptø nabe ñune mayanguen tabig nebuig kønrrai marøb, ñuinukkurri amrrub misaamerane purø nørrø kønrrai marøb indamønrrun— cha.

²⁵Inchen Isaacbe truyu kan altar kusrua, Jehováwei munchiwan wamab tabig waminchibig køn. Incha tru nui tsumig carpa yawan truyu tamara, pasrøbig køn. Inchen Isaacwei karuig mendig melabeløbe katø truyu lalla, pi wesrubelø køn.

²⁶Inchen Abimeleche Gerarsrøngurri Isaac tsuisrømay arrubig køn. Inchen tru Ajuzat tru nun trag linchib wam purugubiiba, tru nui suldaumeran nø karub pera pasrabig Ficolba lincha amrrubelø køn. ²⁷Inchen Isaacbe trenchibig køn:

—¿Ñimbe naimaybe chinchab amrrugue? cha. Ñimbe nane tsalø køptø, ñimui piraugurringuen nan wegucha pønrrøbendøbe?—

²⁸Inchene nømbe trenchibelø køn:

—Nambe asha ker cha, Jehovábe ñiba pasrain kui. Pøs nambe treeg isuer cha: “Ñiba namba øyamay martrab kandø isua kørrømisram kønrrab kui. Inchen treeg isuigwane ¡katø! marmø kømø nabe øyamay maramønrrun taitøga maramig kønrrain cha. Inchen tru øyamay kønrrai martrab cha kørrømariibe møimbe øyeeg kønrrun cha”

²⁹Pøs ñibe namun chigucha kaig marmumig kønrrain cha. Pøs namma ñune chigucha chi kaig incha ashmøtø, nambe ñune tab tøgagua, ñune chigucha kømø tab webya inrrai marig kuig køn cha. Pøs møimbe ¡Jehová mayanguen tabig nebuig kønrrai indiibe ñi køn!— cha

³⁰Inchen Isaacbe truilayasig truba truba tab mamiimera tamaren, nømbe mab, muchib inchibelø køn. ³¹Incha katø kwalømbe løtsøzhig kurra møingurrimbunøbe ambugurri igurri kwayab kømønrrab cha nømbe treeg kørrømisrøbelø køn, Inchen Isaacbe yandø ungua chiben, nømbe chi isumø, tab webamba ambubelø køn.

³²Inchen tru kwalømdøwei Isaacwei mendig melabeløbe tru nøm pi wesranrrab lallib kuigwan:

—¡Nambe pi wetørrer!— chib eshkaab amrruptinchibelø køn.

³³Inchen Isaacbe i pisuwane “Seba” cha munchi pasrig køn trenchippe: ¡Katø! marmøgømmø maramønrrun tain pisu cha. Inchawei tru ciudadwane møin kwalømgatig “Beerseba” cha wamig køn.

³⁴Inchen Esaube pilamera cuarenta tøgagua, Judit taigwan nui srai marig køn, tru hitita Beeri taigwei nimbasrwan. Katø trugurri tru Basematwan srai marig køn, tru hitita Elønwei nimbasrwan. ³⁵Inchen Isaacweimba, Rebecaimbabe tru i pagatø ishumburmerabe larrø trømbøig isuindø, isuindø melønrrai marøbelø købig køn.

Møskai Isaac Mayanguen Tabig Nebuig Kønrrai Tranigwan Jacob Utah

27 ¹Indig Isaac yandø larrø kølliizhig misren, nui kammerabe yandø pilømben, yandø ashchab kaimabig købig køn. Kan kwaløm nui mayur nusrkai Esauwan wamabe, trenchibig køn:

—Nai nusrkain— cha. Inchen nøbe:

—Nabe yu war— chiben, ²Isaacbe trenchibig køn:

—Nabe yandø køllig kur cha. Nabe chi kwaløm kwam kui mørmur cha. ³Pøs, ñibe tru ñui usha kemørøb srua uniilan: tru ñui arconba ñui flechaswanba nemøra srua, wambigwansrø kan usha ørtrab inrrø chibig køn. ⁴Trugurrimbe, na maig chullig kuaasha, kan mamig larrø mayzhig tamara, srua attra chibig køn, na manrrur cha. Trugurrimbe na kwamøwatø mayanguen tabig nebuig kønrrai ñuyasig na Tiuswan mianrrab— cha.

⁵Inchen Rebecabe Isaac tru nui nusrkai Esaúwan waminchen, mørøb wabig køn. Inchen Esaúbe wambigwansrø ibig køn, møskaweyasig kan ushawan pasraara, kweecha, sruattrab. ⁶Inchen Rebecabe nui nusrkai Jacobwane trenchiptinchibig køn:

—¡Au! nabe ñui møskai Isaacbe ñui nuneg Esaúba: “Kan usha kemøra larrø may mamiizhig tamara, srua attrig” chib øyeeg waminchen trunun mørar cha.

⁷“Incha nø mamigwan ma, Jehováwei merrab mayanguen tabig nebuig kønrrai ñuyasig na Tiuswan mianrrab chitan cha, nø kwamøwatø.”

⁸Inchawei nai nusrkai na mandø cha karuben, trunun tab mørtra chibig køn. ⁹Møimbe ubishameraba cabrameraba purrabsrømay ya, pagatø purø tab cabro ureemeran sruattra cha. Pøs, nabe ñui møskai maig mabig kui asha truilan larrø may mamiizhig tamaramønrrun cha.

¹⁰Inchen ñibe nø manrrai srua inrrig cha, nø kwamøwatø, mayanguen tabig nebuig kønrrabigwan Tiuswan nuyasig miaben, trunun ñi utønrrig— cha.

¹¹Inchene Jacobpe usri Rebecane trenchibig køn:

—Nai nuneg Esaúbe ya isiitø møg køben, nabe ya chigucha isikkaibe cha. ¹²Inchippa nai møskaimbe nan katørawa, nan mugui mørabe, nane isa purø may kebenørskøptiig kui martrautan cha. Trubeguende nane mayanguen tabig nebuig kønrrai nayasig Tiuswan miai urasbe nane masken larrø kaig nebuig pasramigwanguen miawa pasrtrautan— cha.

¹³Inchene usrimbe trenchiptinchibig køn:

—Nai nusrkai, ñun trømbøig nebunrrabiibe nan nebunrrain cha. Na maig taigwan mørøptø møra, srua amø— chibig køn.

¹⁴Inchen nøbe ya srua arrua, usran tranen, usrimbe møskai maig chullig kuaasha, treeg tamarøbig køn. ¹⁵Incha trugurrimbe usrimbe mayur nusrkai Esaú kewa uniilø purø tabig yau purrabelan Jacob wendø nusrkawan kenanøbig køn. ¹⁶Incha trugurrimbe tru usrimbe Jacobwane tasiguba, katø nukaburab chi isikkayube tru cabro ureezhelai kalusmeratøga pinøbula,

¹⁷trugurrimbe tru may mamiizhig tamarigwanba, tru pirrin tamarigwanba Jacobwan tranøbig køn.

¹⁸Inchen Jacobpe møskaweimbulu puabe, trenchibig køn:

—¡Nai Papá!— cha.

Inchene Isaacbe trenchibig køn:

—Nabe yu war cha, nai nusrkai. ¿Ñibe mø nusrkain kugu?— cha.

¹⁹Inchene Jacobpe trenchiptinchibig køn:

—Nabe Esaú, ñui mayur nusrkain kur cha. Nabe ñi maig taigwan marar cha. Kurra, wamisra na kemøra srua arrigwan ma chibig køn. Tru mayanguen tabig nebuig kømigwan nayasig Tiuswan miaben na utønrrab— cha.

²⁰Inchen Isaacbe nui nusrkawan trenchibig køn:

—Nai nusrkai, ¿Mandø incharre malla wetørragu?— cha.

Inchene Jacobpe trenchibig køn:

—Jehová ñui Tiusbe nan petø wetørramig purugutan— cha.

²¹Inchen Isaacbe Jacobwan trenchibig køn:

—Nai nusrkai mømibe kemall cha, na katøranrrumøn cha, isa kømø, nai nusrkai Esaú køtamørtrab cha kabe peg kuin kui.—

²²Inchen møskai Isaacwan Jacobpe kemallen, nøbe katørawabe, trenchibig køn: —Wambe Jacobwein købendø, tasiimerabe Esaúwein købwain inndan— cha. ²³Pøs nøbe møig kui mørtrab kaimabig køn, kaguende tasiimerabe Esaúwei tasiimera lataig isiiteelø køben. Incha mayanguen tabig nebuig kømigwan yandø ke trantrab inchabe,

²⁴Isaacbe katøle payibig køn: —¿Ñigan isa kømø, nai nusrkai Esaú køtirru?— cha.

Inchen Jacobpe:

—Nabe truwein kur— chiben, ²⁵Isaacbe trenchibig køn:

—Ñi kemøra srua arrigwan na manrrab srua attra cha, na ñun mayanguen tabig nebuig kømigwan tranrrumøn— cha. Inchen Jacobpe mamigwan srua kemallen, Isaacbe mabig køn. Incha katø vinogucha srua arruben, trunungucha muchibig køn. ²⁶Inchen Isaacbe nusrkawan trenchibig køn:

—Nai nusrkai, mømibe kemalla, nan mucharra— cha.

²⁷Inchen Jacobpe kemalla, muchaben, Isaacbe tru nui nusrkai kewa pasrailan irrømøra, mayanguen tabig nebuig kømigwan tranøb trenchibig køn:

—Nai nusrkaimbe wambigwansrø chi købigwan Jehová mayanguen tabig kønrrai mari lataig irrabig køtan cha. ²⁸Tiusbe tru ellmariiløyu srømbalarøngurri serenu peñibzhigwan tranrrun cha. Inchen pirøbe misramburab misren, tirigumera misrøb, vinomeragucha nørrø weguchib inchun cha. ²⁹Tru misag sötømera nørrø pønrrabeløbe ñun utsøbasrtrun cha. Inchen ñibe ñui nunelane ñi karubig kønrrig cha. Inchen truiløbe ñui merrab utsøbasrtrun cha. Ñun ‘trømbøig nebunrrain’ chib pønrrabeløbe, nøm trømbøig nebuilø kønrrun cha. Inchen ñun ‘tabig nebunrrain’ chib pønrrabeløbe, nøm tabig nebuilø kønrrun— chib.

³⁰Inchen Isaac tru mayanguen tabig nebuig kømigwan Jacobwan chab tranen, Jacobpe møskaweinukkurri webiben latatø, nuneg Esaúbe wambigwansrø usha kemørøb uña puptinchibig køn. ³¹Incha nøgucha kan mamig mayzhig tamara, nui møskaweimay srua arruabe, trenchibig køn:

—Nai papá, wamisr cha. Na ñui nusrkai kemøra srua arrigwan manrrig cha, ñi nan mayanguen tabig nebuig kømigwan nayasig Tius nan tranrrai miarrunrrig— cha. ³²Inchene Isaac møskaimbe trenchiptinchibig køn:

—¿Trube, ñibe mugugu?— cha.

Inchen nøbe:

—Nabe tru Esaú ñui mayur nusrkain kur— chiben, ³³Isaacbe itønab menda, purø kørrø kwaarig, trenchibig køn:

—¡Paare! ¿Trube muguig køh? cha, tru usha kemøra srua arrubiibe. Pøs, ñi arrumøwatø, srua arruben, nabe kerrigu chab maig køn cha. Incha nabe mayanguen tabig nebuig kømigwan nun chab tranig køn cha. Pøs, tru mayanguen tabig nebuig kømigwan tranigwane nøbe tøga kørrømisrtrun— cha.

³⁴Inchen Esaúbe møskai trendaig wamwan mørabe, truba mur wamab trashib, purø kørrø isui inchib ¡karren kønrrab! chib kishibig køn, trenchib:

—Nai møskai, tiusmanda nangucha tru mayanguen tabig nebuig kømigwan tranrra— cha.

³⁵Inchen Isaacbe trenchibig køn:

—Ñui nuneebe arrua, nane purø may isa, tru mayanguen tabig nebuig kømig ñuin kønrrabigwan nø uta, tøga, yan— cha.

³⁶Inchene Esaube trenchiptinchibig køn:

—Nune Jacob cha wamappe, trendambuawei trendaig kuin køn cha. Pamayguen køn cha, nan øyeeg isa kebenøsrkøb arrig, srøtøbe na mayur nusrkain kuimburø na uta tøgagømigwan nø kerraig køn cha. Møimbe tru mayanguen tabig nebuig kømig naiwan katø nøtøwei uta tøga yain køn— cha.

Inchabe katø trenchibig køn:

—¿Nayasikkan tru mayanguen tabig nebuig kømigwan tranamig maitøguen tøgagømøtirru?— cha.

³⁷Inchen Isaacbe trencha løtabig køn:

—Nabe ñune Jacob karub tøgagønrrai Tiuswan miar cha. Incha katø nui misaamerabe Jacob manchiben marøb melabelø kønrrai miar cha.

Trurriгу nõbe tirigumera nõrrø tøgagøb, vinomera tøgagøb inchai miar cha. Nai nusrkai, ¡Møimbe yandø ñuyasiibe chi maramig kaatan!— cha.

³⁸Inchen Esaúbe mōskawan trenchibig kōn:

—Nai mōskai, tru mayanguen tabig nebuig kōmigwan tranamiibe kabe ke kanzhiitø kuig kuitarru cha. Nai mōskai, nangucha tru tabig nebuig kōmigwan tranrra— cha. Incha srawa, srawaa kishibig kōn.

³⁹Inchene Isaacbe trenchibig kōn:

—Ñibe misrøb pirømerasøngurri purø yabsrø tsunrrabguen cha, katø srømbalasarøngurri serenu peñibig nebumøsrø.

⁴⁰Ñibe ñui espadatøga kwayawatøwei øsig tsunrrabguen cha. Incha ñibe ñui nuneg karuindiig megamig nebunrrun cha.

Inchendø ñun megamgaig misrøb arruben, ñibe truyugurri welulrrabguen— cha.

Jacob Esauwan Kørab Lulamig Nebub

⁴¹Indig truyugurrimbunø Esaúbe Jacobwan purø trømbøig ashig kōmui inchibig kōn, nui mōskai tru mayanguen tabig nebuig kōmigwan nun tranikkurri. Incha nõasiitøwei trenchibig kōn: “Maya yanayutø namui mōskai pinøben, larrø isuin pønrram kwalømmeragucha attrun cha. Yandø trugurrimbe si, pinisamønrrun cha, nai nuneg Jacobwan.”

⁴²Inchen Rebecabe tru Esaú øyeeg martrab isub unigwan wammørabe, Jacobwan wamønrrab øra, trenchibig kōn:

—Ñui nuneg Esaúbe ñun nõgucha lata martrab ñune kwetchab tan cha.

⁴³Inchawei nai nusrkai na maig taigwan møra mar cha. Nai nuchag Laban Haran pirau tsuisrømay trubab inrrø chibig kōn. ⁴⁴Trusrø kan maya yana kōsrøn tsunrrig cha, ñui nunewan namig kōbig purayamne. ⁴⁵Ñui nunewei namig kōbig yandø patsab, tru ñi nun chi mariilan nõ pesannabene, ñibe katøle attrai, trube, eshkawa øramønrrun chibig kōn. Nai pagatø nusrkalan ke kan kwalømyutø parba pini asha wag kōmøtan— cha.

⁴⁶Incha Rebecabe Isaacwan trenchibig kōn:

—Nabe nai øsig unigu larrø trømbøig kui uñar cha, tru hititas ishumburmeragurrindø. Jacob yu Canaán pirau hititasmeraba kasharabene, chinchib øsig tsumuinguen kōnrrautan— chibig kōn.

28 ¹Isaacbe Jacobwan wama, mayanguen tabig nebuig kōnrrai tranabe, trencha karubig kōn:

—Nui srain kōnrrai yu Canaán pirau ishumburmeran lanrrab kōmø cha.

²Kurra, Padan-Aram pirausrømay inrrø cha, tru Betuel ñui usrai mōskai waisrømay. Incha ñui kuchimōskai Labanwei kan nimbawwan ñui srain kōnrrai lanrrig cha. ³Inchen Maramburab Marøb Tiusbe ñune mayanguen tabig nebuig kōnrrai mara, ñune ureg larrø nõrrø tøgagønrrai tranøb, ñuinukkurri purø nõrrø misag sötømera nemisramnegatig martrun cha. ⁴Katø Abrahamwan tru mayanguen tabig nebuig kōnrrai tranrrab misrig kōbigwan ñunba, ñuinukkurri

amrrub misaameranba ñun tranrrain cha. Tru møyia ñi peesrøngurri ka arruatø lataig tsuin pirøwan ñimui mara waramig kønrrai, tru pirøwan Abrahamwei kønrrai Tius nun keta tranrrabmisra kørrømisrig købigwan.—

⁵Øyamay Isaacbe Jacobwan Padan-Aramsømay inrrai ørig købig køn, tru Betuel arameowei nusrkai tru Labanwei yausrømay. Truibe Rebecaimbe nuchag købig køn, Jacobweimba Esaúweimbabe usrin køben.

⁶Inchen Esaúbe wammørøbig køn, møskai Isaacbe tru mayanguen tabig nebuig kønrrai tranøb, sraingucha lappe, Padan-aramsø lanrrai chiben. Incha tru mayanguen tabig nebuig kømigwan møskai tranabe, øyeg karua pasri ashibig køn: “Yu Canaán ishumburmeran ñui srain kønrrai marøb pasrønrrab kømø” cha. ⁷Inchen Jacobpe møskawanba usranba møra, Padan-Aramsømay yai ashibig køn Esaúbe. ⁸Incha treekkurri nui møskai Isaacbe tru Canaánsø ishumburmerane chigucha tab kømui ashibig kuin kui wetøbeña, ⁹Esaúbe Abrahamwei nusrkai Ismael tsuisrømay ya, tru katøgan sralø kømnetø, trusrø Mahalatwan nui srain kønrrai marøbig køn, tru Abrahamwei nusrkai Ismaelwei nimbasrwan, tru Nebaiotwei nuchawan.

Tius Jacobwan Betelsø Kenamisrøb

¹⁰Inchen Jacobpe Beersebagurri webya, Haran pirausrømay ibig køn. ¹¹Inchen yandø kanbalø puabe, pørr pinaiben, truyu yem kørrømisrøbig køn. Incha truyu kan srug tsubigwan kuña mara trarra, truyu kinrrab tsumisrøbig køn. ¹²Inchen truyu nun piappe treeg piabig køn: Kan escalera, srømbalasarøngurri pirausrø punøsrkain pasrappe, tru kappe srømbalasarø kebacha pasrøben, møimbe truwane angelesmera nebambamba, kørrørrumba inchib køben, ¹³Jehovábe palasrø pasrøwabe, trenchibashib:

—Nabe Jehová kur cha, Abraham ñui aweluwei Tius, Isaac ñui møskawei Tius, ñi uyu kib tsuig pirøwane ñunba, ñuinukkurri amrrub misaameranba tranamønrrun chib. ¹⁴Ñuinukkurri amrrub misaamerabe purø norrø køptø, pirau kan usrø tui lataig kønrrun cha, pørr pinebgatømaywansrø, pørr neeshibgatømaywansrø, walligebwansrø, waguebwansrø, misag larrøbicha warønrrun cha. Ñui yellygurri pirau muba kuimburab maya misaabe, ñigurri mayanguen tabig nebuilø kønrrun cha. ¹⁵Nabe ñiba pasrar cha. Ñi chu yaindøgucha nabe ñun chi kømønrrai ashib tøga pasrøwa, katøle i piraumay nabe ñune pera arrumønrrun cha. Na ñun maig martrab taigwan na trunun maramnegatig nabe ñune elachimumønrrun— taig køn tru piabyube.

¹⁶Inchen Jacob tru piab tsuigugurri kiagasrabe, trenchibig køn: “Isa kømø, Jehovábe yu pasrøben, nabe treeg kuitamappe isumubrain køn” cha. ¹⁷Incha truba kørig kui inchabe, trenchibig køn: “Yube si, purø kørig kømdiig køtan cha. Chi peg kømøtø, Tiuswei yaba, srømbalasarø yaskappa køn” cha.

¹⁸Inchen Jacobpe lõtsøzhig kurrabe, tru nõ kuña mari srugwan kusrua, kan pilar lataig øneþ pasra, truyu øyeeg puigwan aschai trubala aceite itølushibig køn. ¹⁹Incha truyube Betel cha wamabig køn, merrabsrømbe tru ciudadwane Luz cha wamig købig kuindøgucha.

²⁰Incha Jacobpe nuinetø øyeeg martrab cha kørrømisrøbig køn: “Tius naba lincha pasrab, na mõi øyeeg inrrab yaigu nan chigucha kømønrrai ashib, nan mamig, mutsamig tranøþ, pula pasramig tranøþ, ²¹katø na nai møskawei yausrø chigucha kømø, katøle pishindø tab ka puinabene, Jehovábe nai Tius kønrrun cha. ²²Inchen i srugwan kan pilar lataig ølgandø na kusrua pasriibe, Tiuswei ya kønrrun cha. Inchen Tius nan chigurrimbunø tranigugurri nabe cienyu diezbatø, diezbatø nun tranamønrrun” chibig køn, Jacobpe.

Jacob Haran Pirausrø Puig

29 ¹Jacobpe nõ chu yamsrømay ib ya, pørr kal-labgatømaywan misaamerain pirausrø pubig køn. ²Incha trusrø pua ashene, tru wambigwansrømbe kan pisu wabig køn. Inchen tru pisu pulube ubishamera pøn søtø israb warabelø køn, kaguen truiløbe tru piwan muchibelø kua. Inchen tru pisube larrø nu sruutøga kasraig pasrabig køn. ³Inchen tru ubisha søtømera truyu mayamba tuluntsunøbene, ubishameran pi mutsøsrønrrab tru srugwan malsra, katø chab muchene, srugwan katøle kemalsra pisuwan kasrøbelø køn. ⁴Inchen Jacobpe tru ubisha ashibelan:

—¿Nai nunelø! ¿Ñimbe chuelø køgue?— cha payene:

—Nambe Haransreelø ker— chiben,

⁵Jacobpe katøle trencha payibig køn:

—¿Nacorwei awelu Labanwan ñimbe ashibelø kømøgueh?— cha.

Inchen nõmbe:

—Truigwane nambe ashibeløwein ker— chibelø køn.

⁶Inchen Jacobpe:

—¿Kwanrrø kømø, tab ka tsubig kuitarru?— cha katøyug payibig køn.

Inchen tru ubisha ashibeløbe trenchibelø køn:

—Nøbe tab ka tsubig køn cha. Au, ñiguen ash cha, møskawei ubishameran merrana nimbasr Raquelbe yu arrun— cha.

⁷Inchene Jacobpe trenchibig køn:

—Kwalømdø srø køn cha. Ubishameran kanbalatø mara keramibe menrra tørbatø køn cha. Pi mutsøsrø, pu manrrai katø merranamdiig kømuita— cha.

⁸Inchen truiløbe trenchibelø køn:

—Treeg maramgaig køn cha, maya ubisha søtømera kerrigu kanbalatø misramne, tru ubisha ashibelø, tru pisu pala srug trarrig tsubigwan malsramne. Malsrøbendøwei ubishameran nambe pi mutsøsrømig køn— cha.

⁹Inchen Jacob truiløba waminchib pasramne, Raquelbe møskawei ubishameran merrana, arruþtinchibig køn, kaguende ubishameran nõ ashibig kua.

¹⁰Inchen Jacobpe tru nui usraimbe nuchag Labanwei nimbasr Raquelwanba, katø tru Labanwei ubishameraba arri ashabe, kemalla, tru pisuyu srug kasraig tsubigwan malsra, nui kuchimøskai Labanwei ubishameran pi mutsøsrøbig køn. ¹¹Incha trugurrimbe Raquelwan muchawabe, truba truba kishibig køn.

¹²Incha nøbe:

—Rebecai nusrkain kur' cha. Labanweimbe kuchiunø kur— chib waminchen, Raquelbe nui møskawan eshkanrrab luløbig køn. ¹³Inchen Labanbe tru nui nuchawei nusrkai Jacobweimburab wamindi mørøppe, katønrrab luløbig ya, ira, muchawa, nui yamay pera ibig køn. Inchen Jacobpe nun chitø purayaigwan kerriguh eshkabig køn. ¹⁴Inchen Labanbe trenchibig køn:

—Ñibeguende nai anindøwein køn— cha.

Jacob Leaimba Raquelweimba Marøb Megaig

Inchen Jacobpe yandø Labanba pølguen tsuben, ¹⁵Labanbe nune trenchibig køn:

—Ñi nai yauig kuimburøtø chi pagaraimfiig ka mara tranøptø megamig kømøn cha. ¿Mayanzhig pagaramø?— cha.

¹⁶Inchen tru Labanbe nimbasrmera pagatø tøgaig købig køn, mayurbe Lea købene, wendiibe Raquel. ¹⁷Leabe kammera larrø tabzhig ashibig købene, trune Raquelbe larrø tab malø pasraig, larrø tab ishuzhig købig køn. ¹⁸Incha Jacobpe Raquelwan purø chull asha, nui kuchimøskawane trenchibig køn:

—Ñui wendø nimbasr Raquelwan nai srain kønrrai ñi tranamwei tratrø y pa pila ñuyasig mara tranøb megarrumøn— cha.

¹⁹Inchene Labanbe trenchiptinchibig køn:

—Asiimfiigwan tranøbgunrriibe ñi yauigwan tranrrumøn cha. Trube, naba kørrømisr— cha.

²⁰Øyamay Jacobpe tratrø y pabila Raquelwan tranamwei mara tranøb megabig køn. Nøbe Raquelwane purø chull asha, megaig køppe, nune ni kan maya yanaguen kømub lata inchibig køn. ²¹Yandø Jacobpe pilamera tratrø y par nemisrene, Labanwane trenchibig køn:

—Maya yana mara tranøb meganrrain taigwan yandø nemanan cha. Møimbe nai srai kønrrai tranrra— cha.

²²Inchene Labanbe truyu maya misaameran tulamrrai wama larrø tab fiesta marøbig køn. ²³Indiibe yandø yem misren Labanbe nui nimbasr Lean pera arrua, Jacobwane truigwan tranøptinchen, Jacobpe pera kibig køn. ²⁴Inchagucha Labanbe kan karuig mendig megabig Zilpa taigwane Lean purugub meganrrai tranøbig køn.

²⁵Indiibe løtsøbe, Jacoppe Leaba kib tsuptinchibrain kui ashibig køn. Incha Jacobpe Labanwane trenchibig køn:

—¿Øyeebe nane ñibe chi margu? cha. ¿Yamba Raquelwan tranamwei nabe ñuyasig marøb megaig kømuitarru? cha. ¿Nane chindimbarre øyeege isa kebenøsrkugu?— cha.

²⁶Inchene Labanbe trenchibig køn:

—Nam waraim piraube kasharanrrai wendiigwanmerrig tranamig kømøn cha, mayurguen ka tsumnetøbe. ²⁷Leaba tru kasharabyu tabig mab kasrag waramigwan trune neigwan patsøgø chibig køn Labanbe. Trugurrimbe Raquelwangucha tranrrumøn cha, trattrø y pa pila ñi nayasig katøle srøig marøb meganrrab købene.—

²⁸Inchen Jacobpe treeg marøbig køn. Incha tru Leaba tru kasharabyu tabig mab kasrag waramigwan tru trune neig maramigwan chab nemarene, Labanbe Raquel nui nimbaswan srain kønrrai tranøbig køn. ²⁹Inchen Labanbe kan karuig mendig megabig Bilha taigwangucha Raquelwan purugub meganrrai tranøbig køn. ³⁰Inchen Jacobpe Raquelbagucha kibig køn. Incha truigwane Lean lataguen kømø, masken undaarabig køn. Incha Labanweyasig katøgucha srøig trattrø y pa pila mara tranøb megaig købig køn.

Jacobwei Nusrkalø

³¹Jehovábe Leane Jacobpe ke palabinø indi ashabe, truigwane ureg tøgagønrrai tranøbig køn. Trune Raquelbe urekkaig kønrrabig købig køn. ³²Incha Leabe kwanrriig kørrømisra, kan nusrkai tøgagua, truigwane Rubén munchi pasrøbig køn, kaguende nøbe trenchibig køn: “Na yeekkucha isui megaben, Jehová nan isua ashtan cha. Møimbeguende nai keebe nan undaaranrrautan” cha.

³³Incha katøle kwanrriig kørrømisra, katø kan møg unø tøgaguig køn. Inchabe trenchibig køn: “Jehovábe mörin køn cha, nan øyeeg undaaramuinab megaigwan. Inchagurri i nusrkawangucha nan trandan” cha. Treekkurri truigwane Simeón munchi pasrig køn.

³⁴Incha katøle kwanrriig kørrømisra, katø kan nusrkai tøgagua trenchibig køn: “Møimbe nai keebe naba mas trakkandø linchautan cha, kaguen nabe nune chabguen pøn nusrkaløguen tranar” cha. Inchagurri truigwane Leví munchi pasrøbig køn.

³⁵Incha Leabe katø kwanrriig kørrømisra, katø kan nusrkai tøgaguig køn. Inchabe trenchibig køn: “Møi iyube Jehóawan mayanguen tabig wamindamønrrun” cha. Inchagurri truigwane Judá munchi pasrøbig køn. Incha trugurrimbe yandø kan maya yana køsrøn mas ureg chigaa guig køn.

30 ¹Raquelbe Jacobwei ureg tøgagønrrab kaimappe, numøsrwane truba pusrkwai asha, Jacobwane trenchibig køn:

—Ureg tøgagønrrab tranrra cha, tren kømuisruandø nabe kwamønrrun— cha.

²Inchen Jacobpe truba nama, trenchibig køn:

—¿Nagan Tius kuitarru cha, ñun chi ureg chigaig kønrrai marøbiibe?—

³Inchene nøbe trenchibig køn:

—Bilha, nai karuig mendig megabigwan na ñun tranar cha. Truiba ki, chibig køn. Inchen truig ureg tøgamisren kal-laben, nai srøbchagu

mutikkurrimbe na tøgá misri lataitøweih køben, nabe nøgurri ureg tøgáig kømønrrun— cha.

⁴Øyamay Raquelbe tru nui karui megabig Bilhan Jacobwan srai lataig kønrrai tranøbig køn. Inchen Jacobpe tru Bilhaba kibig køn. ⁵Inchen Bilhabe kwanrriig kørrømisra, Jacobwei kan nusrkai tøgaguig køn.

⁶Incha Raquelbe trenchibig køn: “Tiusbe naimburab maig maramigwan sølgandø martan cha. Incha nai miaigwan møra, kan nusrkai trandan cha. Treekkurri Incha Raquelbe tru unane Dan munchi pasrig køn.

⁷Tru Bilha Raquel karui mørøb megabiibe, katø kwanrriig kørrømisra, Jacobwei katøgan nusrkai tøgamisrig køn. ⁸Incha Raquelbe trenchibig køn: “Tius namun øyeeg kønrrain kuikkurri nabe nai numøsraimba purø murtø melambuyab megawa, na kanar” cha. Treekkurri Raquelbe tru unane Neftalí munchi pasrig køn.

⁹Inchen Leagucha yandø mas ureg tøgagønrrab kaimappe, nui karuig mendig megabig Zilpan pera arrua, Jacobwan tranøbig køn, nui srain kønrrai. ¹⁰Inchen tru Zilpa Leai karuig megab ishuube, Jacobwei kan unø tøgamisrøbig køn. ¹¹Inchen Leabe trenchibig køn: “Yangucha tabig pub attrabigwan tøgaguinatan” cha. Incha treekkurri Gad munchi pasrøbig køn.

¹²Inchen Leai karuig mendig megabig tru Zilpabe Jacobwei katøgan nusrkai tøgaguig køn. ¹³Incha katø Leabe trenchibig køn: “Nane larrø kasrag køtan cha. Ishumburmerabe: jkan yangucha tabgui unamigwan tøgaguita!” chinrrautan cha. Treekkurri tru unane Aser munchi pasrig køn.

¹⁴Tirigu parøb kwalømmerawan Rubenbe wambigwansrø llirab yabe, mamig trulmera mandrágoras tailø wetørrawa usri Leayasig lurra, srua arrubig køn. Inchen Raquelbe Leane trenchibig køn:

—Tiusmanda, ñui nusrkai tru mandrágoras tailø srua arriilan srøttra— cha.

¹⁵Inchene Leabe trencha løtabig køn:

—¿Ñibe nai kewan yeeg kerrawa pasraptøga ñungan chigucha kømui lataig mørøraitarru? cha. ¿Møimbe nai nusrkai mandrágoras srua arriilangucha nan kerranrrab indirru?— cha. Inchene Raquelbe trenchiptinchibig køn:

—Tru ñui nusrkai mandrágoras srua arriilan na merrarranrrur cha, truburø mõi yem Jacobpa ñi ki pøs— cha.

¹⁶Inchen yandø maaben køben, Jacob wambigwansrø uña katø arruben, Leabe katønrrab webyabe, trenchibig køn:

—Mõi yembe ñibe naba kiamig kønrrab køn cha, kaguen nai nusrkai mandrágoras srua arriitøga nabe Raquelwan pagarawa, truburø mõi yembe nabe ñiba kiamig køn— cha. Inchen tru yembe Jacobpe Leaba kibig køn.

¹⁷Inchen tru Lea miab megaigwan Tius møren, Leabe kwanrriig kørrømisra, trattrøgatø kønrrabyu nusrkawan Jacobwei tøgaguig køn.

¹⁸Incha Leabe trenchibig køn: “Tiusbe tru na pagaraikkurri nan keta

trandan cha, kaguende nabe nai karuig mendig megabigwan nai kewan tranig kua” Incha treekkurri unane Isacar munchi pasrig kòn. ¹⁹Incha Leabe katø kwanrriig kòrrømisra, Jacobwei katøgan nusrkai tøgaguig kòn, truibe tru trattrø y kanba kònrrabyu nusrkawan. ²⁰Incha Leabe trenchibig kòn:

“Tiusbe nane purø tabigwan keta trandan cha. Møimbe nai keebe naba kòrrømisra uñchun cha, kaguende nabe trattrø y kanba Jacobwan nusrkalø tranar” cha. Incha tru nusrkawane Zabolón munchi pasrig kòn.

²¹Incha trugurrimbe Leabe kan nimbasr tøgagua, truigwane Dina munchi pasrig kòn.

²²Inchendø Tiusbe Raquelwan isub tōga wawa, nø miab megaigwan mōra, ureg kònrrai tranig kòn. ²³Incha nøbe kwanrriig kòrrømisra, tru srøsrø nusrkawan tøgamisrabe trenchibig kòn: “Na chi urekkaig tsaløbala indinab unig kōbigwan trunun mõimbe kerratan” cha. ²⁴Incha treekkurri trunune José munchi pasrabe, trenchibig kòn: “Jehová nan katøgan nusrkai tranrra chimubraitā” cha.

Jacob Puamisrøb

²⁵Yandø Raquel Joséwan tøgamisren, Jacobpe Labanwan trenchibig kòn: —Na tsuig kōbig tru pirausrømay inrrab, ibashcha cha. ²⁶Nai sralan tranrra cha, na truilaimburab mara tranøb megailan, nai nusrkalanba, nan yandø ibashcha chibig kòn, kaguende nabe ñuyasig yeeg marøb megaigwan ñibe asha kòn— cha.

²⁷Inchen Labanbe trenchibig kòn:

—Ñuin kabyu na tabig asønainabene tiusmanda naba ka kòrrømisr cha. Pøs Jehová nan øyeeg tabig nebub attrai mariibe ñigurri øyeeg kuin kui nabe tōrgandø wetøbeña pasrar cha. ²⁸Incha eshkarra chibig kòn: ñi maya pagar utønrrab isuigwan, nabe treegwan pagaramønrrun— cha.

²⁹Inchene Jacobpe trenchibig kòn:

—Ñibe ashibig kòn cha, nabe ñuyasig yeeg marøb megaigwan. Incha ñui ushameran nabe yeeg tab ashib tøgaguigwan. ³⁰Kaguendø na yu marøb meganrrab arrumøwatøbe ñibe trengatig nørro tōga kōmuig kōbig, mõimbe yeeg nørro nemisran cha, na yu puikkurri Jehovábe ñune mayanguen tabiitø nebuig kònrrai maran cha. ¿Inchendø nai ureemeraimbe nabe mana marøb pølbasmø?— cha. ³¹Inchene Labanbe trencha payibig kòn:

—¿Ñun chi tranamø?— cha.

Inchen Jacobpe trenchibig kòn:

—Chigucha tranmørrunrrig cha. Na ñun øyeeg martra taigwan ñi tregwan martrab misrene si, nabe ñui ubishameran ashibig asamønrrun cha. ³²Nan mõi ñui maya ubisha sötø utuwan pureb arruben, tsurø ubishameranba, rayas tōga ubishameranba, yalø ubisha— ureemeranba, katø maya cabra— ureezheelø tsureelanba rayas tōgarmeranba, ñi tarømarømarøb inrrig cha, Nai pagarbe truilø kønrrun cha. ³³Pøs Srøna

trumarsrø tru na kanab megaigwan ñi ashchab arruben, tab marigwan kenamartrabibe truiig kønrrun cha. Kabe kan ubisha kui, kabe kan cebra-unø kui rayas tøgær kømøwei, tsureelø kømøwei, kabe kan ubisha-unø yalig kømøwei, tru utu ñi treelø wetørrappe, trube, nabe ñuyelan nilab megaig kønrrun— cha.

³⁴Inchene Labanbe trenchibig køn:

—Ñi trendaig tab køn— cha. Labanbe treeg kørrømisrøbig køn.

³⁵Inchen Labanbe tru kwalømdøwei møg cabramera sinda tøgærmeranba, tsureelanba, ishug cabramera sinda tøgærmeranba, tsureelanba, katø puliig tøgærmeranba chishtø, katø yalø ubisha-ureemeran kerriguba tarømara, nusrkalai tasku ashchai põnsrøbig køn. ³⁶Incha tru ubisha sötømerane Jacob tsuisrøngurri põn kwaløm ambiisrø srua ambubelø køn, nøm waraisrø. Trune Jacobpe nuimburappe Labanwei katøgan ubisha sötømeran ashib tsubig køn.

³⁷Incha Jacobpe alamo srarmeranba, almenbro srarmeranba, palanda tusrwanba para, trugurrimbe kaluswan karrøbig køn, pulø sindazhig kena kønrrai. ³⁸Inchabe tru tsig karrilane tru ubishamera pi muchig kemalinug põnsrøbig køn. Incha ubishamera wambiimisar tru pi mutsinug pubene, ³⁹tru carneromerabe ubishameran truyu nesraløbelø købig køn. Incha tru tsig karra põnsrainug nesralig kuig køppe, ubishamera lluiløbe rayas tøgærmera køben, tsureelø køben, pulig tøgær køben, llubelø køn. ⁴⁰Incha Jacobpe tru ubisha-ureemerane nørømara, Labanwei ubishamerayu rayas tøgærmeranba yaleelanba Jacobpe nui ubisha sötømerayu keerøb ibig køn. Incha yandø nuyasig ubisha sötømera kønrrai marøb ibig køn. Labanweimba kanbalatø kømøtø. ⁴¹Incha tru mas werus asr tøgær ubishamera wambiimisa põnrraimørig, Jacobpe tru tsig karrilan ubishamera pi muchib kemalinug põnsrøbig køn, tru ushamerain pinrøgue. Tru tsig karrig põnsrailan ashib nesraliilø kønrrai. ⁴²Inchen tru tre asrka ushamera wambiimisa amrrubene, tru tsiimeran põnsrømføg køn. Inchagurri tru Labanweimbe tre asrkazheelø køben, tru mas werus asr tøgærmera larrø chisheløbe Jacobwein købig køn. ⁴³Incha Jacobpe larrø puaig misrig køn, ubisha sötømera lata, karuig mendig melab møguelø lata, ishumburmera lata, camellosmera lata, burrusmera lata purø nørø tøgær

31 ¹Jacobpe Labanwei nusrkalø øyeeg chib amønaigwan wam mørøbig køn: “Jacobpe namui mōskaweiwan kerriguba nø tøgær misrøb kebya, truitøga mōimbe larrø puaig misrin køn” chib kui. ²Inchagucha Jacob Labanwei maløwan ashene, maløbe ke mindiitø uñibig køn, merrabwan lataig kømøtøgue. ³Inchene Jehovåbe Jacobwane trenchiptinchibig køn: —Merrabsrø ñui kølli misamerai pirausrømay katø inrrø cha. Ñui nammisaamera waraisrømay, nabe ñiba pasramønrrun— cha.

⁴Inchen Jacobpe Raquelwanba, Leanba wamabig køn, tru nø ubishameran ashib tsuisrømay amrrunrrai. ⁵Inchabe nømune trenchibig køn:

—Ñui mōskaimbe nan merrabwan lataig kōmōtō, malōbe ke mindindō, mindindō uni ashar cha. Inchendō nai mōskawei Tiusbe naba pasraig kōn chibig kōn. ⁶Ñimbe ashibelō kōn cha, nabe ñimui mōskawan na maya chish kuimbura chish kuitōga nabe mara tranōb megaig kōn cha.

⁷Inchen kōben ñui mōskaimbe, treeg martrab chib treeg martrab chib marmuig kōn cha nai pagarwan ke pa tratrō piejes yunōmarōb. Inchen kōben Tiusbe na chi tōgaguigwan Laban kaig marmōnrrai nan sōtō pasraig kōn cha. ⁸Nōbe, “Ñui pagarbe tsurō ubishamera kōnrrun” chibeneh, trube, ubishamera lata, cabramera lata mayamba tsurō ureezheelō llubelō kōn cha. Inchen: “Ñui pagarbe sindaba ubishamera kōnrrun” chibeneh, trube, ubishamera lata, cabramera lata truilōgucha mayamba sindaba ureezheelō llubelō kōn cha. ⁹Ōyamay Tiusbe ñimui mōskawei ubishameran lata cabrameran lata nōrrō kerrawa, nan tranig kōn cha.

¹⁰Indiibe kan pijibe ubishamera lata cabramera lata wambiimisra pōnrrōben, nan piappe, treeg pīatan cha: tru mōg cabrazheelō cabrameran nesralōbelōbe sindabar kōben, tsureelō kōben kagōmōnrraindō tsurōzheelō kōben treelō kōbashib.

¹¹Inchen tru piabyube Tiuswei ángelbe nane trenchitan cha:

“Jacob” cha. Inchen nabe trendainatan cha: “Nabe yu war” cha.

¹²Inchen nōbe nane trenchitan cha: “Ñiguen tab ash cha, tru mōg cabrazheelō cabrameran nesralōbelōbe, sindabar kōben tsureelō kōben, kagōmōnrraindō tsurōzheelō kōben, treelō kōn cha. Nabe ashibig kur cha, Labanbe ñune maitō marōb arrigwan. ¹³Nabe ñi tru srugwan aceite itōlusha katō ñi ñuinetō ōyeeg martrab cha kōrrōmisrinug tru Betelsrō kenamisrōb Tius kur cha. Mōimbe kurra, i piraugurrimbe webya, ñi kallain pirausrōmay katō inrrō” cha, nane trenchitan— cha.

¹⁴Inchene Raquelba, Leababe trencha lōtabelō kōn:

—Nambe yandō namui mōskaweinuube chi ketig utamibe chiga ker cha.

¹⁵¿Pōs, namune ka mendailō kui lataig indig kōmuitarru? cha. ¿Namune nōbe yana, truburō mara tranōb megaigwane nō chishtō maig kōmuitarru? cha. ¹⁶Inchawei nō purō nōrrō tōgaguilan Tius namui mōskawan kerrawa ñun traniilōbe, kerriguba namuimba, namui nusrkalaimba kuig kōbene, mōimbeTius nō maig mar taigwane ñibe kerrigu treeg mar— chibelō kōn.

Jacob Padan-Aramsromay Ib

¹⁷Inchen Jacobpe tamarōb menda, nui nusrkalanba, nui sralanba camellosmerayu itōguanōsra, ¹⁸nui ushameran kerrigu merranōbig kōn, katō tru nō Padan Aramsrō chigurrimbunō tōgamisriilanbañau. Incha Canaán pirausrōmay ibig kōn, katōle nui mōskai Isaac tsui pirausrōmay.

¹⁹Inchen tru Labanbe nōrōsrō ubisha isig partrab yaig mugaabenbatō Raquelbe tru yau yau tōgagui tiusmeran sōra wesrain kōbig kōn. ²⁰Ōyamay Jacobpe tru Laban arameowane tru webya yamigwane chigucha mōrō waminchimōtō, nilō purō may welula ibig kōn. ²¹Incha Jacobpe nō kerrigu

chi tøgaguilan srúa, ashmøwatø welula ya, Eufrates nu piyu chab larrayabe, trugurrimbe Galaad tun ureemeragøba pirømerawansrø inrrab ibig køn.

²²Indiibe pøn kwalømyube Labanwane eshkaptinchibelø køn: “Jacobpe welula, yain køn” cha. ²³Indig Labanbe nui nammisaameran lincha pera, Jacobwan wetøgønrrab pasreb mendabig køn. Indigbe tratrø y pa kwaløm puraiben tru Gaalad pirau tunmerasrø chab wetøgøb ibig køn.

²⁴Inchen tru yem tru Laban arameowane Tiusbe kan piabyu kenamisra, trenchibig køn: “Isuptø mar cha. Chigøben martrumøn chib tsag, tsag waminchab kømø.”

²⁵Indig Labanbe Galaad tunmerasrø wetøgøbig køn, tru Jacob nui yaeløba kørrømisriisrø. Incha Labangucha trusrøndøwei nui nam misaameraba kørrømisrabe,

²⁶Jacobwane trenchibig køn:

—¿Chi mara pasrøgu? cha. ¿Nane chindimbarre øyeeg may kebenøsrkøgu? cha. Kan ñigui nai nimbasrmerane kwayabyu kemøri ishumburmeran kui lataig srúa yaitan cha.

²⁷¿Chindimbarre nane øyeeg kebenøsrkøb, trubatø nilø welula igu? cha. Nane chigucha eshkamøtøbe. Nan eshkaig kuimbeh, tab amrrigay cha, kantab, palø ichib, arpa kønab kasraatø ñimun treeg ungua cha ørøbsrubraig kuinrrun cha. ²⁸Ñibe nai awelu ureemeran nai nimbasrmeran ungua cha muchanrainguengaig maritan cha. Ñibe møyimbe ni kan chuguinquen mormfig lataig marin køn cha. ²⁹Pøs nabe ñun chi marøg køben maramigwan tøgá pasrar cha. Inchendø ñui mōskawei Tiusbe mira yem øyah chitan cha: “Jacobwane isuptø mar cha. Chigøben martrumøn chib tsag, tsag waminchab kømø”. ³⁰Ñui mōskawei yauwan truba isub pesrøgøben inrrab yabe, trube, ¿nai tiusmerane chinchab nila srúaigu?— chibig køn.

³¹Inchene Jacobpe Labanwane trenchibig køn:

—Kaguen nane korig kuig køn cha, inchippa ñi ñui nimbasrmeran nan namiimay kebya kerraptinchaitamab. ³²Pøs tru ñui tiusmeran møyig køben yu tøgá wabiibe kwanrrain chibig køn. Nai yaelø testigos kønrai cha nai chi tøgaguigu, chitø ñuyelø kōtashchab ñiashib lau,— chibig køn.

Inchendø Jacobpe Raquel nemøra srúa arritamappe chiguen isumuig køn.

³³Inchen Labanbe Jacobwei carpa yasrø kebya, trugurrimbe Leain carpa yasrø, katø tru pailø karui mōrøb melab ishumburmeraisrø lab kebya, kalawa, tru Leai carpaygurri webarruabe, yandø Raquel waisrø lab kebig køn. ³⁴Inchen Raquelbe tru tiusmeran nemøra kan camelloi tsølig umbu warøppa, trubala wamisrøppa wabig køn. Inchen Labanbe tru carpa yau kerriguh lawa, kalaben, ³⁵Raquelbe mōskawane trenchibig køn:

—Nai mōskai, na ñui merrab kurrømubene, ñi nan namømørrunrrig cha, kaguen nabe chillig misraig war cha. Inchen Labanbe tru taska marig tiusmeran wetørranrrab kaima lab uñen, ³⁶Jacobpe truba nama, øyeeg chib namab mendabig køn:

—¿Nabe ñune chi kalø marta? cha. ¿Naimbe chi kalø mari pasra? cha, ñi nan ke chinchimmørø inchib nan wendautø pasra attraimbe. ³⁷Ñibe nai chi købeløyu chishtø lawa, ¿ñui yau pørrabelan chi wetørragu? cha. Inchawei ñi chi wetørrawabe, yu nai yaue lai merrappa, ñui yaue lai merrappa pønsrø chibig køn, nam pailainug møig søl pasrai kui nøm ashchai.

³⁸Na møi ya pib trattrø pilamera na ñuyasig marøb megaben, mana ñui ubishamera, ñui cabramera lutø llumuig køn cha. Katø nabe ni managuen ñui ubisha sötømerayugurri carnero kandøguen ma kømøwein kur cha.

³⁹Nabe managuen kan kaambu namig usha kwabasiilanguen ñune srua arrumíig kur cha. Treeg kømøtø, truburøbe naguen ñun pagaramig købig køn cha. Kan trutø kønrrab kuindø ¿kwaløm niligwan lata, yem niligwan lata ñibe nan, nan ulø payibig kømøtirru? cha. ⁴⁰Kwalømbe nabe pachig købiitø kwamdiig kui megab, yemmerawane kørrag købiitø kwamdø kui megainaben, kiguen pumíig køn cha. ⁴¹Pilamera pib trattrøh nabe ñui yau megaig køn cha. Ñui pa nimbasrmeran nan tranamweimbe pilamera pa trattrø y pib pilaba mara tranøb megaig køn cha. Inchen trattrø y kanbabe ñui ushameraimburø megaig købig køn cha. Inchen nan pagaramigwane katø, katø peemayh, peemayh ñibe yunømarøbig køn cha, pa trattrø piejes yunømarig køn cha. ⁴²Nai møskai Abrahamwei Tius, nai møskai Isaac truba kørig tøga pasrai Tius naba pasrømuig kuimbeh isa kømøtø, ñibe nane chigucha chigaig inrrai ørøbsruig kuitan cha. Inchen ñi nan yeeg kaig inchen isui megaig købigwanba, na mandø mara tranøb megaiwan købigwanba, Tiusbe trunun ashib wawa, ñune mira yem øyeebe kalø marmøta chib mur wamindiinrrun— cha.

Jacob Labanba Øyamay Kønrrain Cha Kørrømarig

⁴³Inchen Labanbe Jacobwan trenchibig køn:

—I ishumburmerabe nai nimbasrmera køben, nøm tøgagui ureemerabe nai awelumera køben, ubishamerabe nai ubishamera køben, cabramerabe, nain cabramera køben chigurrimbunø yu kena købiibe nayelø køn cha. Treeg kuindøgucha nabe nai nimbasrmeranba, katø nøm tøgagui nusrkalanbabe nabe katøle nayelø kønrraimbe yandø chi maramgaig køtan chibig køn. ⁴⁴Incha møimbe amø chibig køn, naba ñiba øyamay kønrrai mara kørrømartrab cha. Tru treeg mariibe nainuuba, ñuinuuba øyah kørrømarigwan isunanøb pasrønrrain— cha.

⁴⁵Inchabe Jacobpe kan nu srugwan malsra, ølneb kusrua pasrabe, ⁴⁶tru nui yau misaamerane trenchibig køn:

—Sruumera tulisay— cha.

Inchen truiløbe sruumera tulisha, tun pasrabe, tru tun pasrim puluh kanbalatø purramisra mabelø køn. ⁴⁷Inchen Labanbe truyu nuin triimaybe ‘Jegar Sahaduta’ cha wamøbene, Jacobpe nui triimaybe ‘Galaad’ cha wamig køn. ⁴⁸Inchene Labanbe trenchibig køn:

—I srug tun pasriibe mõi naimba, ñuimba treeg kòrrømisrigwan eshkab pasrønrrabig kòrrømisran— cha. Inchagurri truyube Galaad taig kòbig kòn. ⁴⁹Incha katø Mizpagucha taig kòbig kòn, kaguen Labanbe trendaig kòbig kòn:

—Nam ñiba kanikkurri, kanikkurri yandø katøbe asiyamig nebumuben, nam maig inchibelø kòtashchab Jehová nø ashib pasrønrrain cha. ⁵⁰Inchippa nai nimbasmmeran ñi kaig inchib, maig kòbash inchib, kabe nai nimbasmmera kòmnetø ñi katøgan ishumburmeran pera arrin kui inchen, namune mu katøgan ashib pasrømuingucha, ñuimba, naimba øyah marig kòn chib, Tius nø eshkab pasrønrrun— chibig kòn.

⁵¹Incha katøgucha Labanbe Jacobwan trenchibig kòn:

—Ash cha, i tru srug tun pasrigwanba, katø tru srug ølneb pasrigwanba, na tru naimba, ñuimba tøbøtag pasrigwan. ⁵²Ig tru srug tunbasriiba, srugwan ølneb kusrua pasriibabe øyah marig kòn chib isunanøb pønrrørrabelø kòn cha, nagurri ñuimay purøbunamig kòmønwei, katø ñigurri naimay purøbunamig kòmøwei kønrrai. ⁵³Inchen ñui awelu Abrahamwei Tiusba, katø ñui awelu Nacorwei Tiusba maig maramigwan namun nø asha martrain— chibig kòn.

Inchen Jacobpe tru nui møskai Isaac korig tøga pasraig Tiuswei merrab: “¡Katø! marmø kòmø, nabe treeg maramønrrun” chibig kòn.

⁵⁴Incha Jacobpe tru tunbalasrø Tiuswan keta, tranrrai ushamera kweecha, tru nui yau misaameran mamiimeraba manrrab amrrunrrai wamabig kòn. Inchen truyu mayeeløba ma, tru tunyu kibelø kòn.

⁵⁵Incha katø løtsø Labanbe kia kurra, nui awelu ureemeran, nui nimbasmmeran muchawa, trugurrimbe mayanguen tabig nebuilø kønrrigay cha. Yandø nui pirausrømay katøle inrrab ibig kòn.

Jacob Esaúwan Katønrrab Inrrab Tamørøb

32 ¹Inchen Jacobpe nui yamigwan legucha iben, nune Tiuswei kan angelesmera katønrrab werruben, ²Jacobpe truilan ashabe, trenchibig kòn: “Yube Tius nui angeles sòtømeraba kòrrømisra pasrainug kòn” cha. Incha treekkurri truyube Mahanaim cha wamabig kòn. ³Incha Jacobpe tru Edom pirau tru Seirsrømay wan sruar merrab amrrai ørøbig kòn, Esaúwan katønrrabelø tru nabe punrrab arrumønrrun cha, nui nuneg eshkanrrabelø.

⁴Incha øyeeg chinrrai karua ørøbig kòn:

—“Ñi nai mayur nuneg Esaúwan Jacob na ñi maig chiben megabiibe, trendan cha: ‘Nabe mõi øyangatig Labanba kòrrømisra tsua, ⁵møimbe waaramera kòben, burrumera kòben, ubishamera kòben, cabramera kòben, karuig melabelø møguelø kòben ishumburmera kòben, tøgag kur’ tan chinrrai. Pøs ñi nai mayur nunewan nabe ñun øyeeg eshkawa ørar cha, ñi nan truba tabig utig pasramig kønrrai.”—

⁶Inchen tru wam srua ambubeløbe Jacobweimay katøle amrrua, trenchibelø kòn:

—Ñui nuneg Esaú waisrø ashchab amber cha. Nøgucha ñun katønrrab arrun cha, møguelø cuatrocientos lincha peraig.—

⁷Inchen Jacob øyeeg taigwan mørabe, truba kørig kui inchib, truba isuin kørromisra, nøbe tru nui misag lincha perayailan pa sötø pirishibig kòn, tru ubishameran, cabramera køben, waarameran, camellomeran chigucha. ⁸Pøs nøbe treeg isubig kòn: “Inchippa Esaú kan sötøwan kwayanrrab megambuigucha, katøgan sötøbe lulrrain” cha.

⁹Incha Jacobpe Tiuswan trenchib miabig kòn:

—Nai møskai Abrahamwei Tius, nai møskai Isaacwei Tius: “Tru nai pirausrømay, nai yau misaamersømay katøle nan inrrø cha. Ñune truba truba tøgag misrøb inrrai maramønrrun” cha, ñi nan trendaig kuig kòn cha. ¹⁰Na ñi karuigwan marøb megabiibe ñi larrø tab indigwanba, ñi trendø treeg tabig køppe treeg mariilanba na truigwan utab pasramibe nabe trengatig truburab kømuintan cha. Pøs, nabe i Jordan nu piyu larreb urasbe i pøtønain tsiizhiitø srua pasraig køben, trune mømibe nuingui, nuingui pa sötø tarømara pasramig tōga pasrar cha. ¹¹Nai nuneg Esaúwei taskugurri chi kømønrrai marøbsrumuguh cha. Nane kørig kòtan cha, inchippa nanba, usralmeranba, ureemeranba kweecha petønrraitamab. ¹²Ñitøwei nane trendaig kòn cha: “Nane maya nuguen tabig nebuig kònrrai mara, nainukkurri amrrub misaamerabe purø norrø køptø, mar menda kan pisrum lataig kònrrun cha, mundamguengaike.”—

¹³Incha tru yembe Jacobpe truyu kia, nø truyu chi tøgaguigwan nui nuneg Esaúwan ketamig lawa wesrabig kòn. ¹⁴Cabramera doscientas, pib trattrø turmøg cabramera, ubishamera doscientas, turmøg ubishamera pib trattrø, ¹⁵Camellasma ureg perarcheelø treinta, waaramera cuarenta, toro-ureemera pa trattrø, asnasma pib trattrø, pa trattrø burrusmera. ¹⁶Incha tru nui karuig mendig melabelai tasku tru ushameran nuingui kan sötø, kan sötø pønsra, tru nui mendig melabelane trenchibig kòn:

—Nai merrab ambay cha. Incha tru tarømarig sötømerane kanguetøtø kømøtø, yabsrø, yabsrø merranrrigay— cha.

¹⁷Incha Jacobpe tru ke srøsrø merrana ibigwane trencha karua ørøbig kòn:

—Nai nuneg Esaú ñun kata: “¿Ñibe muinukkurriig kugu chib, chumay inrrab arrugu? chib. ¿Ñi merrana yaig ushamerabe muielø kø?” chib payene, ¹⁸ñibe øyah chib lètønrrig cha: “Ñun ketamig ñi nai ashib karubig ñi Esaúwein kòn cha, iilane ñi maig chiben marøb megabig, tru Jacob, keta trana øran cha, nui ushamerayugurri. Inchagucha nøbe namui wendau arrun” chinrrig— chibig kòn.

¹⁹Incha tru srøsriigwei wendau ibigwan lata, pøn kònrrabyu ibigwan lata, tru wendau ambubelan møilandøgucha treetø, treetø chinrrai karua pasrig kòn. Esaúwan katabe, øyeetøh chinrrigay cha. ²⁰Incha katø trenchinrrigay cha: “Ñui karuig megabig Jacobpe namui wendau arrun” cha. Kaguen Jacobpe treeg isubig kòn: “Tru na keta trana øriilanmerrig nun pungaruabe, tru nø namig kørromisrig købig yandø kuchi tammisren, trugurrimbe nui maløwan asamønrrun’ cha. ²¹Inchen tru keta tranameløbe merrab chab amben, Jacobpe tru nui misaameraba, nui ushamerabañau kørromisra tsuinug kinrrab kørromisrøbig kòn.

Jacob Angelba Melambub Kemøriyab

²²Incha tru yemdøwei Jacobpe kurra, nui pagatø sralanba, nui pagatø linchatø melab ishumburmeranba, pa trattø y kan tru nui nusrcalanba, Jaboc taig nu piyu larraambubelø køn. ²³Incha yandø truilan chab larrøørabe, katø chine købigwan kerrigu larrøørøbig køn. ²⁴Incha Jacobpe tru misaameraba, nui ushameraba kørrømisra tsuinug nøtø kørrømisra, kan møøba tør-rramnegatig kwayab tranriyabelø køn. ²⁵Inchen tru møøbe Jacobwane chinchaguen kullaaranamgaig kui ashabe, srøptsim merrarrab srølwane kebachen safabig køn, tru kemøriyab tranriyabyu. ²⁶Inchen tru møøbe trenchibig køn:

—Yandø chab tør-rrab køn cha. ¡Elatcha!— cha.

Inchene Jacobpe trenchibig køn:

—Ñi nan maya nuguen tabig nebunrrabigwan tranmubene, nabe lelachimumønrrun— cha.

²⁷Inchene tru møøbe:

—¿Ñibe chi munchi kugu?— cha payen,

Nøbe:

—Jacob munchi kur— chibig køn.

²⁸Inchene tru møøbe trenchibig køn:

—Ñibe yandø Jacob cha wamig kønrrabig kømøtø, Israel cha wamig kønrrabig køn cha. Kaguende ñibe Tiusba, møgueløba truba melambuyab tranriyaigu, ñibe kullaaramøn— cha.

²⁹Inchene Jacobpe trencha payibig køn:

—¿Ñibe chi munchi kugu?— cha.

Inchene tru møøbe trenchibig køn:

—¿Nai munchiwane nane chinchab paygu?— cha.

Inchen tru møøbe truyutøwei tru mayanguen tabig nebuig kønrrabigwan nune tranøbig køn.

³⁰Incha Jacobpe truyube Peniel cha wamabig køn; kaguen nøbe trendaig køn: “Nabe Tiuswan malaugue ashendø, katøgucha ka øsig pasrainatan” cha. ³¹Inchen Jacob Penielsrøngurri puraiben, pørrbe neeshib arrubig køn. Inchen nui pøytañig safaig pusrkwabene, Jacobpe kebeñiptø, kebeñib arrubig køn. ³²Incha treekkurri Israelweinukkurri amrrub misaamerabe møingatig tru ushamerayu pøytañig kemøøb srølwane mameelø køn, kaguen Jacobwane tru srølyu kebatig kuig kua.

Jacobpa Esaúba Katøle Chi Kømui Lataig Tab Kørrømisrøb

33 ¹Møimbe Jacob kurraashene, Esaúbe arruptinchibig køn, tru cuatrocientos møguelan pera. Inchen Jacobpe nui ureezheelan kanelane Leai merrab, kanelane Raquelwei merrab, kanelane pagatø nui tru karuig mendig melab ishumburmerai merrab øyamay pirisha merranøbig køn. ²Incha tru nui pagatø karub tøgagui ishumburmeran tru nømui ureemeran

ke merrabsrø pønsra, tru wendaube Lean tru nui ureemeranba, tru wendaube Raquelwan tru nui Joséwanba pønsrøbig køn. ³Incha Jacobpe kerrigu mayeelai merrabsrø puraya, pirausrøngatig tratrø y pagatøgatig utsøbasrøbig køn, nuneg waisrø pumnegatig. ⁴Trune Esaúbe nunewan katønrrab luløb ya, naashiburab ira, muchabig køn. Incha pailøba kishibelø køn. ⁵Incha møimbe Esaú kurraashabe ishumburmeranba, ureezheelanba ashabe, trenchibig køn:

—Iilø ñiba pønrrabeløbe ¿mumeragøh?— cha.

Inchene Jacobpe trenchibig køn:

—Na, ñi maig chiben marøb megabigwan, iiløbe Tius nan trani ureezheelø køn— cha.

⁶Inchen tru pagatø karuig melab ishumburmera nømui ureezheeløba amrrua, utsøbasrøbelø køn. ⁷Trugurrimbe Lea nui ureezheeløba utsøbasren, tru wendaube Raquel nui Joséba arrua, utsøbasrøbig køn. ⁸Inchen Esaúbe trencha payibig køn:

—¿Tru na katab arrigu øyeeg nørrø sötø, merrana amrruiløtøgabe nan chi chinrrab treenchigu?— cha.

Inchen Jacobpe trenchibig køn:

—Ñi nane kan chigucha inchimø, ñuin kabyu tab kui asig kønrrab øyeeg marar— cha.

⁹Inchene Esaúbe trenchibig køn:

—Nai nuneg, nabe tsabøtø tøgaig kur cha. Ñuimbe ñuin kønrrain— cha.

¹⁰Inchene Jacobpe trenchibig køn:

—Ñuin kabyu na tab kui asig kuinabene, tiusmanda na kettrab srua arrigwan utørra chibig køn. Na ñui maløwan asiibe Tiuswan asi lataig køtan cha. Ñibe nane kan yangucha tabig utøtan cha. ¹¹Na ñun ketamig srua arrigwan ka utørra cha. Tiusbe nane øyeeg nørrø tøgaig kønrrai maren, nabe menrrazhikken tøgagur— cha.

Incha Jacobpe utønrrai truba inchen, Esaúbe tru ketiilan ka utabig køn.

¹²Incha Esaúbe trenchibig køn:

—Ambamigwan amun cha. Trube, naba lincha amun— cha.

¹³Inchene Jacobpe trenchibig køn:

—Nai nuneg, ñibe asiinrrabguen cha, nai ureemerabe kullaguelø srø køn cha. Katø ubishamera køben, waaramera køben, ureezheelø perartø køn cha. Na menrra trømbøig malla merranene, nai ubishamerabe kan kwalømyutø kerriguba chab kwanrrun cha. ¹⁴Ñi, nai ashib karubiibe, ñi karuigwan marøb megabigwei merrabmisra ka ashirrunrraguh cha. Nabe nai ubishameran køben, cabrameran køben, waarameran køben, merraniilø maig amben, nabe tsøndatø treeg arrumønrrun cha. Katø ureezheeløgucha nøm maig ambub meløben, tsøndatø treetø arrumønrrun cha, Seirsrø ñun wetøgamsrøngatig.—

¹⁵Inchen Esaúbe trenchibig køn:

—Trube, treeg ka amrrab cha. Inchendø tru naba lincha amrrub møguelan møilan køsrøn ñiba lincha amrrunrrai kørrømartrab— chibig køn.

Inchene Jacobpe trenchibig køn:

—Truburappe chi isumøta cha. Ñuin kabyu na tab kui asig kuinaig købene, truig mas purø nuig køtan— cha.

¹⁶Incha tru kwaløm Esaúbe Seirsømay inrrab ibig køn. ¹⁷Inchen Jacobpe Sucotsømay ya, trusrømbe nuyasig kan ya marøb, nui ushamerai ranchu-ureemera marøb inchibig køn. Incha treekkurri trusrømbe Sucot cha wamig kuig køn.

¹⁸Jacobpe Padan-Aramsøngurri chigucha kømø, katø tab ka pubig køn, Canaán pirau Siquén ciudadasø. Incha tru ciuda pinrrøguesø kørrømisra warøwa, ¹⁹kan tul penabig køn, tru Hamorwei nusrkalan. Incha trube Siquénwei møskawan, tsantsøn andøga mari monedamera sulu cien pagaraig køn. Incha truyu nui carpa yawan lasrua tsumisra, ²⁰truyube kan altar mara, truigwane El Elohe Israel cha wamig køn.

Dinan Kan Møg Kemøra, Kaig Marøb

34 ¹Jacob Leaba kan nimbasr Dina taig tøgaguibe tru pirau ishumburmeran ashib pub inrrab webya ibig køn. ²Inchen tru heveo truyu ashib karubig Hamorwei nusrkai Siquém ashabe, Dinane kemøra, kaig mara mindisha kørrømarøbig køn. ³Incha nøbe Dinan purø chull ashiptø, tabzhib waminchibig køn, Dina undaaraig kønrrab. ⁴Incha Siquémbe nui møskai Hamorwan trenchibig køn:

—I srusran nai srain kønrrai møskaløba waminchay— cha.

⁵Inchen Jacobpe tru nui nimbasr Dinan Siquémbe kemøra, kaig mara mindisha kørrømarin kui wammørøbig køn. Inchen nui nusrkaløbe tru purugubeløba trausrø ushamera ashib warøben, tru nusrkalø katøle pumne chigucha waminchimig køn.

⁶Incha pumøwatø, tru Siquémwei møskai Hamorbe nui nusrkai pa misrtrab isuigwan Jacobpa waminchab arrubig køn.

⁷Inchen tru Jacobwei nusrkaløbe traugurri chab pua, tru treeg purayaigwan wammørabe, karre øyeeg maritamab isub, larrø namig kuig mørøbelø køn, kaguende Siquénbe Israelwei yau misagwan purø trømbøig mara pasren tru Jacobwei nimbsrwan kemøra, øyeeg mindishib. Pøs øyeebe ni managuen maramig kømíigwan.

⁸Inchen Hamorbe tru møskawanba nusrkalanba trenchib waminchib køn:

—Nai nusrkai Siquémbe ñui nimbasrwan purø chull asan cha, ishug-unø nøba kasharanrrai treegwan isubsrømøgue chinrrab inchar cha. ⁹Yau misamera misrkun chibig køn, ñimbe namui nimbasrmeran sralø maren, namuieløbe ñimui nimbasrmeran sralø martrain cha. ¹⁰Trumaybe ñimbe namui utu warøben, yu nam waraig pirøbe ñim chu warag køben waramig pasrønrrun cha. Ñimbe truyu warab, penab, yanøb, katø pirømera penab inchigay— cha.

¹¹Inchen Siquémbe nuimburappe tru Dinai møskawanba, nuchalanba trenchibig køn:

—Na ñimuin kabyu tab asønainabene, ñim maig miabendø, nabe tranamønrrun cha. ¹²Tru srusran srain kønrai tranamwei maya nu kuindøgucha, ñim maya miamigwan eshka, maya ketig tranamelan eshka inchay chibig køn. Inchendø tru srusrane naba ka kasharabashchunrrigay— cha.

¹³Inchen Jacobwei nusrkaløbe tru møskai Hamorwanba Siquémwanba purø may kegørrørkønrrab isua løtabelø køn, kaguen nømui nuchag Dinan kaig kui lataig purø trømbøig marøb mindisha kørrømarikkurri.

¹⁴Incha nømbe trenchibelø køn:

—Nambe namui nuchawane kan møg circuncidamígwane tranrrab kaimamønrrun cha. Kaguen namuiwan purø trømbøig mindishib korig marinab pønrramig køn cha. ¹⁵Pøs, nambe treeg punrrai martrab cha ñim øyamay martrab kørrømisrene, ñimui utu maya møgueløba circuncidawabe kønrrun cha, nam latailøwein kønrrab. ¹⁶Trumaybe si namui nimbasrmerabe ñimba kasharab, ñimui nimbasrmerabe namba kasharab, nambe ñimui utu warab, kan sötø misaameratø kønrrab cha. ¹⁷Inchen tru circuncidamigwan ‘ka’ taingatiibe nambe namui nuchawane perøb, yu ñimui piraugurri ambuptindamønrrun— cha.

¹⁸Inchene Hamorwanba Siquémwanba tru øyeeg margun taigwane truba tabig mørørai inchibelø køn. ¹⁹Inchen tru matsinube mallatø circuncidabig køn, kaguen nøbe Jacobwei nimbasrwane purø chull asha kuig kua. Inchagucha Siquembe nui yaube mas nuig kuig asig møg købig køn. ²⁰Incha Hamorba Siquémba nømui ciudayu kebambi yaskabumay amba, truyu warab misaameran trenchibelø køn:

²¹—Tru møgueløbe kwa tammayelø køn cha, nømbe yu namuim pirau warønrrab amrrua warab, namuin pirau penab, yanøb inchib kønrrain cha, kaguen pirømerabe nøm kørrømisra waramig tsabøtø lendø køn cha. Nambe nømui nimbasrmeran sralø maren, nømbe namui nimbasrmeran sralø martrun cha. ²²Inchendø namui utu nøm kørrømisra, kan misag sötøtø misra waramibe nam øyamay kønrrab købendøwein kønrrun cha, namui utu møgueløbe mayeeløba circuncidawar kønrrai, nøm mailø køben, nam treeløtøweingue. ²³Inchawei nøm maig tailan ka lötøgun chibig køn, nøm namui utu warønrrab kørrømisrtrain cha, kaguende nøm chi tøgaguiløba, nømui ushamerababe, namuin kønrrun— cha.

²⁴Inchen tru chi maramigwan nøm ashibelø maya møguelø tru ciudayu kebambi yaskabu tuluntsunabeløbe tru Hamorba, tru nusrkai Siquémba treegwan martrab pønrramisrøbelø køn. Incha tru maya møgueløbe circuncidailø kørrømisrig køn.

²⁵Indiibe pøn kwalømyu tru circuncidailøbe pusrkwilø purrøbenh, Jacobwei pagatø nusrkalø tru Dinai nuchaløbe Simeónba, Levíba nømbe espadan srua ambubelø køn, tru ciudayumay, truiløbe ni chigucha chi isumø køben, maya møguelan chishtø kweecha petabelø køn. ²⁶Incha Hamorwanba nui

nusrkai Siquémwanba espatatøga kweecha peta, Dinane Siquémwei yaugurri wesrawa, pera ambubelø køn. ²⁷Incha tru Jacobwei katøgan nusrkaløbe amrrua, kwabelaim palawan itøbunab puraamba, ciudayu kegørra chi købigwan chishtø wesrabelø køn, tru nui nuchawan øyeeg trømbøig mara mindisha kørrømarigwan trunun ulø payib. ²⁸Incha ubishameran køben, cabrameran køben, waarameran køben, burrumeran køben, srua ambubelø køn, ciudayuigwan lata, wambigwan chi købigwan lata. ²⁹Incha yaambumerayu chi købelane chishtø wesrawa, katø chigurrimbunø chi tøgaguilan køben, møguregwan køben, ishumburmeran køben merrarrowa, srua ambubelø køn.

³⁰Inchen Jacobpe Simeónwanba, Leviwanba trenchibig køn:

—Ñimbe nane purø nuigu mumayguen kømíig meganrrai martan cha, cananeomeraba, ferezeomeraba i pirau misaamera namun larrø tsalø asiilø pønrramig kønrrai ñimbe treeg marøb. Nabe ya mamdø møguelø tøgagøben, nømbe kanbalatø lincha, namune kwayanrrab melambua, nanba nai yau misaameranba pinisha petønrrautan— cha.

³¹Inchene nømbe trencha løtabelø køn:

—¿Nø isuppe, kabe namui nuchawane trømbøig martrab nui asrwan anwei yanøb ishug kui lataig mara kutchain kuitarru?— cha.

Tius Jacobwan Betelsrø Maya Nuguen Tabig Nebuig Kønrrai Marøb

35 ¹Tiusbe Jacobwane trenchibig køn:

—Kurrab, Betelsrø tsunrrab inrrø cha. Trusrømbe, tru ñui nuneg Esaúwan ñi trubab arruben kenamisrøb Tiuswan kan altar kusrunrrig— cha.

²Inchen Jacobpe tru nui yaambuelanba, nun lincha amrrubelanba trenchibig køn:

—Tru katøgan peg tiusmera ñim tøgaguilan ñimbe chishtø webetab, ñimui kalø mariilan chish misrøb, ñimui kewaguilan yunømarøb inday cha. ³Betelsrømay amun cha, tru nan chine kaig nebuinab arrubengurri purugub Tiusweyasig trusrø kan altar kusrunrrab cha, tru na chu unindøgucha nan lincha pasrabigwan.—

⁴Inchen nømbe tru taska marig peg tiusmera nøm tøgaguilan kerriguba Jacobwan tranøbelø køn, katø kaluyu kandunga melsraguilan chigucha. Inchen Jacobpe kan encina tusr keta truilan sørabig køn, tru Siquém pulu.

⁵Inchen nøm truyugurri webamba ambene, tru puluwan warab misaamerabe mayeeløba purø trømbøig kørig kui inchai Tiusbe treeg marøbig køn. Inchagurri Jacobwei misaamerane nømbe chi kaig martrab inchimeelø køn.

⁶Incha Jacobpe maya misaameraba Luz cha wamiisrø pubig køn, tru Betelsrø Canaán pirau. ⁷Incha nøbe trusrø kan altar kusrua, El Betel cha wamig køn truyube, kaguende Tius trusrø kenamisrig kuig kua, tru nui nunewan trubab welula ib uras.

⁸Inchen katø truyuh kwaig købig køn, Debora tru Rebeca lamíig køben asam purugubig købig. Truigwane kan encina tusr katsiizhigu sørig køn, Betel pulu. Incha Jacobpe truyube Elon Bacut cha wamig køn.

⁹Incha Jacob Padan Aramsrøngurri katøle arrubene, Tiusbe nune katøle kenamisra, maya nuguen tabig nebuig kønrrai tranrrab misrøbig køn. ¹⁰Incha Tiusbe trenchibig køn:

—Ñibe Jacob munchi køn cha. Inchendø møyimbe Jacob cha wamig kømøtø, ñui munchibe Israel cha wamig kønrrabig køn— cha. Incha Israel cha wamig køn.

¹¹Incha katø Tiusbe trenchibig køn:

—Nabe tru Maramburab Marøb Tius kur cha. Misag purø nørrø karrab, larrø nørrø larrøbichig cha. Ñuinug kan larrø nu misag sötømera kal-lawa, ñuinukkurri misag larrø nørrø sötømerabatø kurrab amrrunrrun cha. Incha ñuinukkurri amrrub misaamerayugurrimbe reymera kurrønrrun cha.

¹²Incha Abrahamwanba, Isaacwanba tranin pirøwane ñun tranamønrrun cha. Incha ñuinukkurri amrrub misaameran tranamønrrun— chibig køn.

¹³Incha Tiusbe nuimbulugurri ibig køn, tru nøba waminchib pasrainukkurri.

¹⁴Inchen Jacobpe kan srug nemøra, ølneb pasrøbig køn, Tius tru nun wamindinug. Incha trubalabe pi lusha, aceitetøga itølushibig køn Tiuswan keta tranøb. ¹⁵Incha Tius tru nun wamindinuube Betel cha wamabig køn.

Raquel Kwaig

¹⁶Incha Betelgurri amba, katøgucha Efratasrø pumibe yab paløben, møyimbe Raquelbe unøzhigwan ke tammisrtrab kaimabsrua tammisrig køn. ¹⁷Inchen ke purø lastimazhig pusrkwai inchib megaben, tru patsø kørrøørøbiibe trenchibig køn:

—Chi kørig isumøta cha, ñibe katø møy-unøzhig tøgagønrrab køn— cha.

¹⁸Inchen nøbe yandø ke kwanrrab inchib ke srabe israb megawa, unøzhigwane Ben-Oni cha wamabig køn. Inchendø møskai Jacobpe Benjamin munchi pasrig køn. ¹⁹Incha Raquelbe øyeeg kwamig nebuig kwaben, Efratamay amrrab ambi maysrø sørig køn, tru Belén. ²⁰Tru kwabigwan sørimbalabe kan srug nemøra ølneb pasrig køn. Incha tru treeg tamara kusrua pasrig købiibe tru Raquelwan sørig købig kui ashchai pasran møyngatig.

²¹Incha Israelbe tru nø yamigwane ibig ya, Migdal Edargurri mas yab yaisrø nui carpa yawan lasrua kørrømisrøbig køn. ²²Indiibe Israelbe tru pirausrø kørrømisra tsubene, Rubénbe ya, Bilhaba kiain købig køn, tru nui møskawan lincha tsub ishuuba. Inchen Israelbe øyeeg marigwan wammørøbig køn.

Jacobwei Nusrkalø

Israelwei nuskaløbe pa trattø y par købig køn.

²³Leai nusrkaløbe iilø køn: Jacobwei mayur nusrkai Ruben, Simeón, Leví, Judá, Isacar, Zabulón.

²⁴Raquelwei nusrkaløbe: Joséba, Benjaminba.

²⁵Inchen Raquelwei tru karuig mendig megabig Bilhai nusrkaløbe iilø køn: Danba, Neftaliba.

²⁶Inchen Leai tru karuig mendig megabig Zilpai nusrkaløbe: Gadba, Azerba. Iilø køn tru Jacobwei nusrkalø Padan Aramsrø kal-lawar.

Isaac Kwaig

²⁷Incha Jacobpe Isaac nui møskawei yausrømay ibig køn, Mamre taisrømay Kiriati Arba pulusrø, tru Hebrón cha wamiisrømay, Abrahamba, Isaacba tsuig købiisrømay. ²⁸Isaacbe tru nø kwab uras pilamera ciento ochenta tøgagig købig køn. ²⁹Inchen Isaacbe yandø larrø kølliizhig, larrø yana øsig tsua, yandø nui israbig luchen, nui nusrkalø Esaúba Jacobpa misra kusra sørøben, nui kølli misaameraba isrønrrab tsumisrøbig køn.

Esaúweinukkurri Amrrub Misaamera

36 ¹Iilø køn tru Esaúweinukkurri amrrub misaamera, tru Edomwei. ²Esaúbe Canaán ishumburmeraba kasharaig køn. Tru Elon hititai nimbasr tru Adaba katø Aholibamababe Anai nimbasr køben, truiibe Zibeón heveowei awela kuig køn. ³Katø Basematwangucha nui srain kønrrai marig køn, truiibe Ismaelwei nimbasr Nebaiotwei nuchawan ⁴Esaúbe i uremeran tøgaguig køn: Adababe Elifazwan Basematbabe Reuelwan; ⁵Aholibamababe Jeúswan køben, Jalánwan køben, Coréwan køben tøgaguig køn. Iilø kuig køn tru Esaú Canaán pirau tsub uras tøgagui uremera.

⁶Incha Esaúbe nui sralan køben, nusrkalan køben, nui nimbasrmeran køben katø tru nøba lincha warab misaameran køben pera, tru Jacob nui nuneeba tarømisrtrab katøgan paløsrømay ibig køn. Incha ushameran kerriguba katø Canaán pirau nø chi tøgamisriilane chishtøh srua ibig køn. ⁷Jacobpa Esaúbabe purø nørrø tøgamisrøptø, pailøba kanbalatøbe waramgaig købig køn. Inchagucha tru nøm waraig pirøbe ushameran mannami g truburab tranmfíg køn. ⁸Trekkurri Esaú tru Edom taibe Seir pirau tunmeragøba tøgasrø tsunrrab yaig køn.

⁹Iilø køn tru Esaúweinukkurri amrrub misaamera: edomitasmerai møskai tru Seir tunmeragøba tøga pirømerasrø warab misaamera.

¹⁰Inchen tru nui nusrkalai munchimerabe iilø køn:

Esaúwei srai Adai nusrkai Elifaz køben Esaúwei srai Basematwei nusrkai Reuel købengue.

¹¹Inchen Elifazwei nusrkaløbe Temán køben, Omar køben, Zefo køben, Gatan køben, Kenaz køben købig køn.

¹²Inchen Timná ka linchatø ishug tru Esaúwei nusrkai Elifazwei kan nusrkai tøgaguig køn, tru Amalecwan. Iiløbe kerriguba Esaúwei srai Adai awelumera kuin køn.

¹³Inchen Reuelwei nusrkaløbe iilø kuig køn: Najat køben, Zera køben, Sama køben, Mizá købengue, truiløbe tru Esaúwei srai Basematwei awelumera købig køn.

¹⁴Inchen tru Esaúwei katøgan srai Anai nimbasr tru Sibeónweimbe awela tru Aholibamai nusrkaløbe iilø kuig køn: Jeús køben, Jalán køben, Coré købengue tru Esaúwei nusrkalø.

¹⁵Iilø kuig køn tru Esaúweinukkurri amrrub misaamera, nørreelø nøm asha karubelø, tru Esaúwei mayur nusrkai Elifazwei nusrkalø: Temán køben, Omar køben, Zefo køben, Kenaz køben, ¹⁶Coré køben, Gatán køben, Amalec købengue. Iilø kuig køn tru Edom pirau Elifazweinukkurri amrrub misaamera nørreelø nøm asha karubelø, tru iløbe kerriguba Adai awelumera.

¹⁷Inchen Esaúwei nusrkai tru Reuelwei nusrkaløyu nørreelø nøm asha karubeløbe iilø kuig køn: Najat køben, Zera køben, Sama køben, Mizá købengue. Iilø kuig køn tru Edom pirau Reuelweinukkurri amrrub misaamera nørreelø nøm asha karubelø tru iløbe kerriguba, Esaúwei srawei Basematwei awelumera.

¹⁸Inchen tru Anai nimbasr tru Esaúwei srai Aholibamai nusrkalø nørreelø nøm asha karubeløbe iilø kuig køn: Jeús køben, Jalán køben, Coré købengue.

¹⁹Iilø kuig køn tru Esaúweinukkurri amrrub misaamera, katø nune Edomgucha taigwei. Trumørig nømui nørreelø misag sötømera købelan nøm asha karubelø.

²⁰Inchen tru horeo Seirweinukkurri amrrub misaamera tru pirausrø warabeløbe iilø kuig køn: Lotán køben, Sobal køben, Zibeón køben, Aná køben, ²¹Disón køben, Ezer køben, Disán købengue. Iig tru Seirweinukkurri amrrub misaamera, Edom pirau horeosmeran nøm asha karubelø nørreelø købig køn.

²²Inchen Lotánwei nusrkaløbe iilø kuig køn: Horiba, Hománba. Inchen Timnabe Lotánwei nuchag købig køn.

²³Inchen Sobalwei nusrkaløbe Alván køben, Manajat køben, Ebal køben, Sefó køben, Onam køben kuig køn.

²⁴Inchen Zibeónwei nusrkaløbe iilø køn: Ayába, Anába. Tru Aná kuig køn, tru misag warab waraimø pirømerasrø kuaalab pigammeran wetørrabig nui mōskai Zibeónwei burrueran ashib uña.

²⁵Inchen Anábe kan nusrkai Disón taig tōgaig købig køn, katø kan nimbasr Aholibama taikkucha.

²⁶Inchen Disónwei nusrkaløbe iilø kuig køn: Hemdán køben, Esbán køben, Itrán køben, Kerán købengue.

²⁷Inchen Ezerwei nusrkaløbe iilø køn: Bilán køben, Zaván køben, Acán købengue

²⁸Inchen Disánwei nusrkaløbe iilø kuig køn: Uzba, Aránba.

²⁹Inchen horeosmeran nøm asha karubeløbe iilø køn: Lotán køben, Sobal køben, Zibeón køben, Aná køben, ³⁰Disón køben, Ezer køben, Disán købengue. Tru iløbe nøm mōitøgucha nømui nørreelø sötø misaameran nøm ashib karubelø treelø købig køn.

Edomsrø Reymera

³¹Israelitasmera rey tøgagømøwatø, tru Edom pirau reymera nebamba karub purrabeløbe iilø kuig køn:

³²Beorwei nusrkai Belabe Edomsrø rey kuig køn, nøbe tru Dinába taig ciudadugurri arrubig.

³³Inchen Bela kwabene, tru nuimburøbe Zerai nusrkai Jobab karunrrab nebyaig køn, Bosra pirausriig.

³⁴Inchen Jobab kwabene, tru nuimburøbe Jusán karunrrab nebyaig køn, Temán pirausriig.

³⁵Inchen Jusán kwabene, tru nuimburøbe Bedadwei nusrkai Hadad karub wanrrab nebyaig køn, trube tru Moab pirau madianitasmeran kanawa kørrømarøbig. Tru nø tsuig ciudadabe Avit taig kuig køn.

³⁶Inchen Hadad kwabene, tru nuimburøbe Masreca misag sötømera waraisriig Samla karub wanrrab nebyaig køn.

³⁷Inchen Samla kwabene, tru nuimburøbe Rejobotsrø Saúl karunrrab nebyaig køn, tru Eufates pi menda.

³⁸Inchen Saúl kwabene, tru nuimburøbe Acoborwei nusrkai Baal-Janán karunrrab nebyaig køn.

³⁹Inchen Acborwei nusrkai Baal-Janán kwabene, tru nuimburøbe nusrkai Hadad karunrrab nebyaig køn, tru nø tsuig ciudadabe Pau taig køben. Inchen tru Hadadwei sraimbe Mehitabel taig købig køn, Matredwei nimbasr, Mezabweimbe awela.

⁴⁰Iilø køn tru Esaúwei karub pønrrab møguelai munchimera, mu møskalø køben, trumørig truilainukkurri amrrubelø, nøm waraigwan nømui munchitøgatøwei wamiilø: Timná køben, Alvá køben, Jetet køben, ⁴¹Aholibama køben, Elá køben, Pinón køben, ⁴²Kenaz køben, Temán køben, Mibzar køben, ⁴³Magdiel køben, Iram købengue. Iilø kuig køn tru Edom pirau nørreelø nøm asha karubelø, nøm chu waraig pirømerayu, nømui pønrrabigu.

Edombe Esaútøwein køn, tru edomitasmerai møskai.

Joséwei Piailø

37 ¹Jacobpe nui møskai kørrømisra tsui pirau truyu kørrømisra tsuig købig køn, tru Canaán pirau. ²Iibe Jacobwanba nui yaambu misaameranba maig pureb arrigwan waminchibig truig køn:

Josébe pilamera diecisiete tøgagøbig køn, ubishameranba, cabrameranba nui nuneløba ashib tøgagøbig køn, tru møskawei ishumburmera Bilhaimba Zilpaimba truiløbe nusrkalø køben. Incha Josébe tru nuneløbe søl kømøtiig marøbelø køn chib møskawane eshkabig køn.

³Incha kerrigu maya nusrkalan lataguen kømøtø, tru Israel Jacob taig købiibe Joséwane truba undaguig købig køn, kaguende nø køllimbala tøgagui unø kuimba. Inchagurri pala itø kemig larrø tab tsurøzhig maringarubig køn. ⁴Inchen

nømbe nøm kerriguelan lataguen kòmø, Joséwane mas undaarai ashabe, yandø tsalø ashib menda ni kan wamzhikken tammaybe wamømeelø køn.

⁵Indiibe Josébe kan piji kan piaig tøgagua, nunelan waminchen, trugurrimbe nuneløbe masken tsalø ashibelø køn; ⁶kaguen nøbe trenchib eshkabig køn:

—Nan piaigwan ñimun eshkanrrab inchar cha, mørtray cha: ⁷Møimbe nam trausrø warøwa, tirigu lusrømera lusrøb købene, møimbe nai tirigu lusrøbe pasramisrøppe, ke ølgandøzhig pasramisrøptindan cha. Inchen ñimui tirigu lusrømerabe tru nai tirigu lusrø pøtøgatan pønrramisrøppa, purø tab inchib ke nai tirigu lusrømaygøba utsøbasrøptinchimøh— cha.

⁸Inchene nuneløbe trencha kusrua løtabelø køn:

—¿Treekkan namui rey misra, namune ke ñi karub tøga pasrønrrab inchib pasrøtirru?— cha. Incha masken ashig kømui inchibelø køn, tru piailan, nø waminchen.

⁹Incha Josébe katøgan piaig tøgagua nunelan katø treeg eshkabig køn:

—Møimbe katø nan piappe, pørrba, pølba pa tratrø y kan kønchabiimeraba nan tab inchib utsøbasrøb piatan— cha.

¹⁰Incha møskawanba, nunelanba treeg eshkabene, møskaimbe øyeebe chisun waminchab arrugu trenchiptinchibig køn:

—¿Tru ñi øyeege piaig tøgaguitøgabe namune manchibrre inchigu? cha. ¿Ñui usrimba, ñui nuneløba, naba, kabe ñun piraugatig utsøbasrøtrain kønrrab kø chindah?— cha.

¹¹Inchen nuneløbe larrø pusrkwai inchibelø køn. Trune møskaimbe øyeege piaibe chiguermab wetøbeñimmørø chu uragucha isub sulu uñibig køn.

Joséwan Nunelø Yanig

¹²Indiibe yandø treeg purayai wendø Siquémsrø nui nuneløbe møskawei ubishameranba, cabrameranba pu lawa mannrrab amben,

¹³Israelbe Joséwane trenchibig køn:

—Ñui nuneløbe Siquémsrø ubisha ashib waran cha. Amø cha, trusrømay inrrig— cha.

Inchen Josébe:

—Øø, inrrur— chibig køn.

¹⁴Inchen Israelbe trenchibig køn:

—Ashchab ya, tru ubishameraba cabrameraba, ñui nuneløba maig warai ashabe, wam srúa attrunrrig— cha. Incha Hebrón chaasrøngurri inrrai ørøbig køn.

Inchen Josébe ya, Siquémsrø pubig køn. ¹⁵Indiibe Josébe trusrø pua, truba lab llirab uña, pella pasrøbene, kan møg katabe, payibig køn:

—¿Chi lagu?— cha.

¹⁶Inchene Josébe:

—Nabe nai nunelan lab uñar cha. Chu ubisha ashib warai ñibe tiusmanda eshkabsrumuguh— chiben, ¹⁷tru møøbe trenchibig køn:

—Yugurrimbe chab ambubguen indig køn cha. Inchendø:
“Dotánsrømay amrrab” taig nabe mørig køn— cha.

Inchen Josébe nunelan lab ya, Dotán tru misag sötømera warainug kømøtø, wambig nøørsrø wetørrabig køn. ¹⁸Inchen nømbe yabsrø arri ashabe, nømuimbulu pumøwatø, nømbe kwetchab waminchibelø køn. ¹⁹Incha kangurri kangurri trenchibelø køn:

—Ñimguen asay cha, tru piainabiibe øsrø arrun cha. ²⁰Møimbe amrrui chibelø køn, kweecha, kan aljibe laligu kegutchab cha. Incha: “kan namig usha kweecha, main køn chinrrab” cha. Er nui piailøbe maig indashchab— chibelø køn.

²¹Inchen Ruben iigwan mørabe, nømui taskabe chi marmønrrai isua:

—Kweechimugun chibig køn. ²²Ñimbe ani lushmøtø, mu misag warab waraimønug aljibe lalig pasrabnug kegutsay chibig køn. Inchendø ñimui taskabe chi marmøtay— cha. Rubénbe øyeeg chippe, Joséwane katøle wesrawa, møskaweisrø pegutchab isuig køn.

²³Inchen José nunelaimbulusrø pubene, nømbe Joséwane tru nø pala itøguewa pasraig tab tsurøzhigwane kerrawa, ²⁴nune kemøra, tru pi wesramig trab lalig pasrabigu keguchibelø køn. Inchendø tru trab laliibe chi pigaig pur pasrabig køn.

²⁵Inchabe yandø nømbe manrrab purramisrøbelø køn. Inchen nøm ashene, Galaadsrøngurri kan sötø ismaelitasmera amrruptinchibelø køn, camellosmerayu niisrar larrø may irrabzheelø, balsamo køben, mirra køben tru Egiptosrømay.

²⁶Inchen Judábe nui nunelan trenchibig køn:

—Namui nunewan kweechabe, chi mariasamø cha, kweecha tre marigwan sørato tøgaguabe. ²⁷Trembe ismaelitasmeran yangun chibelø køn. Namui taskabe chi kaig marmønrrab cha, kaguendø nøbe namui yaundøwei namui nuneg køn— cha. Inchen nuneløbe trumay kørrømisrøbelø køn.

²⁸Inchen tru madianitasmera chine penab, yanøb inchibelø amrruben, Joséwei nuneløbe tru aljibe trab lalig pasrabigugurri wesrawa, pib tratrø an pitiswei yanøbelø køn. Øyamay Joséwane Egiptosrømay srua ambig købig køn.

²⁹Indig yanayu Rubénbe tru aljibe trabsrømay arrubene, møimbe Josébe yandø mugaagøptinchen, nøbe isuptø nui kewa pasraigwan kølsrøptinchibig køn. ³⁰Incha nunelan trenchinrrab ibig køn:

—Yandø matsinube mugaagøn cha. ¿Nabe møimbe chindamer?— cha.

³¹Incha nømbe kan cabro unø kweecha, José pala itøguewa unigwane tru aniyu kebisha, ³²tru Joséwei kewaguig tab tsurøzhigwane møskaweimay trana ørøppe, øyeeg cha ørøbelø køn:

—Nambe øyeeg wetørrer cha, ñui nusrkawein kui, ñui nusrkawein kømui muingøtashchab tab ashchig— cha.

³³Inchen Jacobpe trunun nebua ashippe:

—Nuiwein køn chibig køn. Kan namig usha webarrua kemøra, pitis mara, mainrrun— cha.

³⁴Incha Jacobpe nui kewa kuigwan kølsra, trøsrkølig kewa, nui unø pinigwan purø yanarøngatig isub kørrømisrig købig køn. ³⁵Inchen nusrkaløba, nimbasrmeraba isumønrrai maya, maya inchib melaingucha, nøbe trunune mørøg kømui inchibig køn. Incha nusrkawan isub, kishib trenchibig køn:

—Kwabelø israb waraisrø na nøba tsunrrab yamnegatig nai nusrkawane isub tøga kømønrrun— cha.

³⁶Inchen Egiptosrømbe tru madianitasmerabe tru Josewane Potifarwan yanøbelø køn, tru Faraon lutø tranigwan marøb pasrabig, tru suldaumera reywan chigøben kømønrrai ashib pønrrabelan nø asha karub pasrabigwan.

Judaba Tamarba

38 ¹Tru urassrø Judábe nui nunelan mendamisra, kan Adulamsrø møwei yausrø tsunrrab ibig køn, Hira taigweisrø. ²Incha trusrømbe kan cananeo Súa taigwei nimbasrwan srain kønrrai kabgucha, truigwan nui srain mara, pailø kibelø køn. ³Inchen tru ishuube kwanrriig kørrømisra, truigwei kan nusrkai tøgagua, truigwane Er cha wamig køn. ⁴Incha katø wendø kwanrriig kørrømisra, katøgan nusrkai tøgamisra, truigwane Onán cha wamig køn. ⁵Incha katø maya yanayu køsrøn katøgan nusrkai tøgamisra, truigwane Sela cha wamig køn. Truibe tru unan tøgagøb urasbe Kezibsrø tsuig kuig køn.

⁶Indiibe Judábe tru nui mayur nusrkai Erweimbe srailabig køn, tru Tamar taigwan. ⁷Inchendø tru Er Judáwei mayur nusrkaimbe Jehováwein kabyu larrø kaig kuig køn. Inchen Jehovábe nui øsig unigwan kerraptindig køn.

⁸Inchene Judábe tru Onánwane trenchibig køn:

—Ñui nuneg kwabigwei srawan kasharamø kømø, kasharau cha, ñui nuneg kwabig ñigurri ureg tøgag kønrrain— cha.

⁹Inchen Onánbe tru ureg kal-labeløbe nuin kuentailø kømønrrab kui asha kua, nui nuneg kwabigwei sraimba kib waramisri mørig, kwanrriig kørrømisrømønrrai pirautø, pirautø lushibig køn, nuneg kwabigweyasig chi ureg kaanrrai. ¹⁰Inchen Jehováwane treebe chigucha tabig asønamben, truigwangucha øsig kuigwan kerraptindig køn.

¹¹Inchen Judábe tru nui yerna Tamarwane trenchibig køn:

—Ñui møskawei yau kasharamø, ka tsunrrig cha, nai nusrkai Sela kølig misramne.— Inchendø Judabe treeg isubig køn: ‘Inchippa Selagucha nuneg kwabelø lataitøwei kwanrraitamab.’ Incha treekkurri Tamarbe nui møskawei yausrø tsunrrab ibig køn.

¹²Indig yandø yana puraiben, tru Súai nimbasr tru Judáwei sraimbe kwabig køn. Inchen nøbe yandø tru isubig puraiben, Timnat pueblorømay ibig køn, tru nui ubisha isig parøbelø waraisrømay. Inchen tru adulamita Hira taig tru nun linchibiibe nune lincha ibig køn.

¹³Inchen Tamarbe tru nui sueeru Timnatsrø nui ubishameran isig partrab yan taig wammørabe, ¹⁴tru piuda kørromisra pala keegwan wesrawa, incha muguinguen ashmønrrai maløwan pinøgasraitøga nøbe pinøgasra, Enaim kebambi yaskabu wamisrøbig køn, tru Timnatsrømay amrrab ambi mayuhke. Inchen nøbe øyeeg marøppe, tru Selabe yandø kølig kui asha, treeg marig køn, inchen køben, nune tru Judábe nune tru nusrkaimba kasharanmuben.

¹⁵Inchen Judá truigwan ashabe, nøbe kaig maramig asrwan anwei yanøb ishug kuitamab isubig køn, kaguen nøbe maløwan pinab kasraig waben. ¹⁶Inchen nøbe tru nui yerna kuitamab isumøtø, may menda waben kemallabe, trenchibig køn:

—Ñiba kigun— cha. Inchen nøbe:

—Ñiba, naba treeg maramig, na, øn tamibe ¿chi tranrrunrragu?— chibig køn.

Inchene nøbe trenchibig køn:

¹⁷—Nai ubisha søtømeraygurri kan cabro-unøzhig trana øramønrrun— cha.

Inchene nøbe trenchibig køn:

—Kan chigøsrøn ñuiwan kørromartra cha, ñi tru tranrrab misrigwan na utamnegatig.—

¹⁸Inchene Judábe trencha payibig køn:

—¿Chi kørromaramø?— cha.

Inchene nøbe trenchibig køn:

—Ñui sellon tru ilin tsiwanbañau, tru pøtønain tsig ñui tasku srua pasraigwanba kørromartra— cha.

Inchen Judábe truilan tranabe, tru Tamarba kib waramisra treeg maren, nøbe kwanriig kørromisrig køn. ¹⁹Incha nøbe kurra, truyugurri yabe, tru malø kasraigwane pinøsrua, tru keg kaig kørromisra kewa unigwan katø kebig køn.

²⁰Incha mas wendø tru Judábe tru nui tab linchibig adulamitan tru cabro unan trana ørøbig køn, tru ishuwan tru nuyelan trana kørromariilan katøle utønrrai. Inchen nøbe tru ishuwane wetørranrrab kaimaptinchibig køn. ²¹Inchen nøbe truyu warab misaameran trencha payibig køn:

—¿Peg møgueløba kaig marøb ishug tru Enaim may menda wabiibe chu wah?— cha

Inchen nømbe trenchibelø køn:

—Peg møgueløba kaig marøb ishuuma yube mumaganug køn— cha.

²²Inchen tru møøbe katøle Judá waisrømay yabe, trenchibig køn:

—Nabe truigwane wetørranrrab kaimar cha. Inchagucha truyu warab møgueløbe nane trenchitan cha: “Yube peg møgueløba kaig marøb ishube mugaaguig køppeh”— cha.

²³Inchen Judábe trenchibig køn:

—Kerriguba ka tøga kørromisrbashshu cha, namun ke chinetø chib indza asiinab pønrramig kømønrraimbe. Inchendø tør kønrrain cha, nabe cabro unane tru ishuwan trana øren, tru ishuwane ñibe wetørramuigwan— cha.

²⁴Indiibe yandø pøn pøl puraibene, Judáwane trencha eshkaptinchibelø køn:

—Tamar ñui yernabe kaig marøb uña, treeg marøb unigu kwanrriig misrin køn cha, nui asrwan anwei yanøbig lataig misra waikkurrindø.—

Inchene Judábe trenchiptinchibig køn:

—Nune wesrawa, parray— cha.

²⁵Inchen yandø tru møgueløbe nun patrab wesranrrab amben, nøbe nui sueerune trencha ørøbig køn:

“Nabe kwanrriig misra pasrappe, tru na i srua pasrailan nan tranøbigwei kwanrriig misra pasrar” cha. Inchabe katø trenchibig køn: “I sellon tru ilintsiwanbañau, i tsigwanba, muin køtashchab ash” cha.

²⁶Inchene Judábe nuin kui ashabe, trenchibig køn:

—Nøbe sølgandø tabigwan maren, naguen kalø marøbrain køn cha, nai nusrkai Selaba nabe nun kasharanmub.— Incha nøbe tru ishuuba katøløbe kimuig købig køn.

²⁷Indiibe yandø Tamarwan unø tøgamisramig puben, mømibe parchig tøgagig købrain kui wetøbeñibig køn. ²⁸Inchen tru yandø kal-lanrrab inchen tru parcheeløyu kane tasiizhiemerrig kal-laptinchen, patsø kørørøbiibe unai tasiizhigu pigø tsizhig lichiptinchibig køn trenchib: ‘Imerrig webarrig køn’ chib. ²⁹Inchen unøbe tasiizhigwan katø kesruben, kanzhiemerrig kal-laptinchibig køn. Inchen tru patsø kørørøbiibe trenchibig køn: ‘¡Mandø incharre puraarruh!’ cha. Inchagurri unane Fares cha wamig køn.

³⁰Inchen trugurrimbe tru nui nuneg tru tasiizhigu pigø tsi litsig kal-labig køn. Incha truigwane Zera cha wamig køn.

Joséba Potifarwei Sraimba

39 ¹Joséwane Egiptosrømay srua amben, kan egipcio Potifar taig ismaelitasmeran Joséwane penabig køn, trusrømay truilø srua amrruin køben. Inchen Potifarbe tru Faraon lutø tranigwan marøb pasrabig nuig, tru suldaumera reywan chigøben kømønrrai ashib pønrrabelan nø asha karub pasrabig køn.

²Jehovábe Joséwane tarømisrmø nøba pasrøben, chi mariiløtøgucha tabiitø, tabiitø pub iben, nøbe tru egipcio tru nun penabigwei yau wabig køn.

³Incha tru nun karub pera pasrabiibe Jehová Joséwane chi mariiløytøgucha merraptø webinrrai mari ashibig køn. ⁴Øyamay tru Potifarbe Joséwane chi isumgaig larrø tabikkui asha, Putifar nø chi palai waben trunun ashib pasrønrraimba, katø nui yau chigurrimbunø tøgaguilan nø ashib pasrønrraimba treeg kørømarøbig køn. ⁵Inchen yawanba nø chigurrimbunø tøgaguilanba Joséwan ashchai pasrikkurrimbunø, Jehovábe tru egipcione Joségurri mayanguen tab inchen, Jehováwei maya nuguen tabiitø nebunrrai indiibe tru egipcio kerrigu chi tøgaguimbala pasrabig køn, yau lata, wambigwansrø chi købigu lata. ⁶Inchagurri

Potifarbe kerriguba Joséwei tasku ashchaim pasra, nune chi isumig chigaabig kòn. Isumig kòppe, nò mab mutsamigwan trunundòh isumig kòbig kòn.

Inchen Josébe larrò tab asr tøgagig trurrigu larrò tab møg kòbig kòn. ⁷Indiibe kan maya yanayu kòsròn, tru nun pena karub tøgagòbig tru Potifarwei sraimbe Joséwane chull ashib menda, trenchibig kòn:

—Naba waramisrkun— cha.

⁸Inchen nòbe treegwane marmòtò, tru nun karub tøgagòbigwei srawane trenchibig kòn:

—Pòs, nai karubiibe yu yau chi kòbigwane nababe chi isumikkaig pasròwa, treekkurri chi kòbigwan kerriguba nai tasku ashchai pònraig kòn cha. ⁹I yaube natòwei mas nuig kur cha, chiwanguen ashmònrrai nane meriibe chigaagòn cha, ñundòh na chi asamig kòmònrrai nòròr kòn taig kòn cha, kaguende ñibe nui srain kuimba. ¿Nabe nune øyeeg kaig maròb mandò pasramò cha, Tiuswan purò tròmbòig maròb?—

¹⁰Inchen ishuube kwalømmòrig, kwalømmòrig Joséwane ‘naba waramisrkun’ chib, nuimbulu lincha wanrrai inchib maya, maya treendingucha, Josébe treegwane kandò, kandò ka chib, webib, webig ibig kòn.

¹¹Indiibe José kan kwalòm yau nui chi maramigwan martrab kebibenba, truyube mugucha kaaben, ¹²ishuube nui kewa pasraigu kemòròppa trenchiptinchibig kòn:

—Naba waramisrkun— cha.

Inchene Josébe tru nui kewa pasraigwane nui tasku srúa pasrònrraindò yaugurri welulòppa iptinchibig kòn.

¹³Inchen Josébe tru nui kewa pasraigwane nui tasku kòrròmistraindò welula yai ashippe, ¹⁴yau tru karuig mendig melabelan wamabe, trenchibig kòn:

—Au, ñimguen asay cha, tru nai keg kan hebreo pera arriibe namune ke kan chigucha kòmeelò kui lataig mara kòrròmarrab ka treetò arrin kòn cha. Nainug kebarrua, nan kemòrtrab inndan cha. Inchen nabe truba truba mur trashiben, ¹⁵na truba mur trasai ashippe, nui kewaguigwan naimbulu tsumnetò, lulòptindan— cha.

¹⁶Incha tru ishuube tru José kewaguigwane nui keg yau pumnegatig trarra wawa, ¹⁷kewangucha treetòweih chib eshkabig kòn:

—Tru hebreo ñi karub tøgagòmig pera arriibe nane kan larrò kaig kui lataig kemòra ka kaig martraptò arrin kòn chib. ¹⁸Inchen nabe truba mur trashiben, nui kewaguigwan naimbulu tsumnetò welulòptindan— cha.

¹⁹Tru “ñi karub tøgagòmig peniibe nan øyeeg martan” chib, sraimbe Potifarwan øyeeg chib eshkaben, nòbe truba tròmbòig namabig kòn.

²⁰Inchen tru Joséwan penabiibe reyweimburab kalò maròbelan kemòra keeriilò purramnug, Joséwan truyu keera wannòbig kòn.

Inchendø Tru Kailan Keeri Yaugucha

²¹Jehovábe Joséba pasrøwa, nui lastima asigwane kenamarøbig kenamara, tru keerin pønrrabelan ashib pasrabikken nune chi isumgaig larrø tabikkui ashchai, Jehovábe treeg marøbig køn. ²²Inchen tru keeri pønrrabelan nø karubiibe, tru mayeelø keeriilø pønrrabelan José nø ashchai pasren, katø truyu chi asha maramelane kerriguba José nø asha marøbig køn. ²³Inchen tru keerin pønrrabelan nø karubiibe chi isua asamikken palømiig køn, José nø asha marøb pasraigwane. Kaguende Jehovábe Joséba pasrøwa, nø chi mariilane merraptø, merraptø webinrrai marøbig køn.

Piailøbe Øyeeg Chib Køn Cha José Tørmarøb

40 ¹Indig øyeeg chab purayaig yandø yana køben, reywan mutchai srørrøb pasrabiiba, reywei pirri marøbiiba, nømui karubig Egipcio reywane namishibelø køn. ²Inchen Faraónbe tru i pagatø nørreelan nø lutø tranigwan marøb pønrrabelan namabig køn, tru vino srørrøb pønrrabelan nø asha karubigwanba, tru pirri marøbelan nø asha karubigwanba. ³Incha tru suldaumera reywan chigøben kømønrrai ashib pønrrabelan nø asha karubigwei yau nømune keera purrønnobig køn, tru Joséwan keera wanninuutøwei.

⁴Inchen Faraónwan chigøben kømønrrai ashib suldaumerai nø karubiibe tru pagatø nørreelan keerilane José nø asha purugub pasrøbig køn.

Inchen truiløbe kan maya yanagøsrøn truyu keeriilø purrøwabe, ⁵tru pailø nørreelø tru lutø tranigwan marøb, katø tru reywan vino srørrøb pasrabiiba, tru pirri mara srørrøbiiba tru keerin purrabeløbe kan yem nøm kan kan piaig tøgagøbelø køn, tru piailøbe møitøgucha peg, peg eshkabig.

⁶Inchen Josébe løtsø nømun ashchab ibene, nømbe truba truba isuilø purraptinchen, ⁷nøbe trencha payibig køn:

—¿Ñimbe møimbe chindimbarre ke peg misriilø purrøgue?— cha.

⁸Inchene nømbe trenchibelø køn:

—Nambe pailøba piailø tøgagøbendø, muguen kan øyeeg køn cha eshkanrrabiibe mugaagøn— cha.

Inchene Josébe trenchibig køn:

—¿Piailan ‘øyeeg køn’ chinrrabiibe Tius nø kømuitarru? cha. Er eshkarra pøs— chibig køn.

⁹Inchen copamerayu srørrøbelan nø asha karubiibe trenchib eshkabig køn:

—Møimbe nane piappe, kan uvas tusr naim pinrøgue pasrabiibe, ¹⁰srarmera pøn kwaliimera tøgag pasraptindan cha. ¹¹Incha truiibe ishiizheelø wegucha, uzheelø niga tru lusrømerayube uvasmera srønan cha. Inchen nabe Faráonwei copan nai tasku muta, tru uvasmerane tru

copayu sunna, trugurrimbe natøwei Faraónwei tasku tranøb pian—
cha. ¹²Inchene Josébe trenchibig køn:

—Tru pøngatø srrarmerabe pøn kwaløm køben, ¹³pøn kwalømyube Faráonbe ñi chi kalø marigwan ulø paymøtø, katøle ñune ñui lutøytøwei pasren, ñibe Faraónwan katøle vinon srøttrabguen cha, maramigwan maig marøbig købig kuig treetøwei. ¹⁴Inchen ñun treg tab kørrømarene, trube, nan isurrunrig chibig køn. Tiusmanda nan lastima tøgagua, Faraónwan waminchunrig cha, nan yugurri wesranrai. ¹⁵Kaguende nane hebreosmerai pirausrøngurri nane namiimay merrarawa, srua amrruig køn cha. Nabe yu Egipto pirau chigøben kalø mara kømur cha, na yu merrarawa keerig wamig.—

¹⁶Inchen tru pirri marøbelan asha karub pasrabiibe tru piaigwan ke chi isumgaig tabig øya kønrun chib eshkain kui ashabe, trenchibig køn:

—Naimburappe nane treg pian cha: Nai turbalabe pøngatø tasin-ureemera chi pirrimera køben tøgar pønrrøbashib. ¹⁷Inchen ke pala srabesrø pasrab tasinyube, Faraónweyasig chine larrø may pirrimera sulu tøgäig pasrøbendø, illimera tru nai turbala tasin pasrabiguigwan mabashib.—

¹⁸Inchene Josébe trenchiptinchibig køn:

—Ibe øyeeg cha eshkabig køn cha: Pøngatø tasin ureemerabe pøn kwaløm køn cha. ¹⁹Inchen pøn kwalømyube Faráonbe ñui turwan paringarua, kan tusryu mesringaruben, ñui aswane illimera amrrua, ñune manrun— cha.

²⁰Indiibe pøn kwalømyu Faráonbe nui tru kal-lain kwalømgurri mam pila nemisrigwan trunun isunrrab marøbig køn. Incha nø lutø tranigwan marøb pønrrabelayasig truba truba kasrag waramig mara, truilai merrab tru copasyu vino srørrøb pønrrabelan nø karub pasrabigwanba, tru pirri marøbelan nø karub pasrabigwanba tru keera purrønninukkurri wesrangarubig køn. ²¹Inchen tru copayu srørrøb pønrrabelan asha karub pasrabigwane katøle nui lutøwan tøga pasrønrrai tranen, nøbe srøsrø maig marøbig kuig katø treetøwei copan Faráonwan mutchai yuuløb pasrabig køn. ²²Inchen tru pirri marøbelan asha karub pasrabigwane José maig purainrun taimbala naashigu tsibasra mesrøngaruig køn.

²³Inchen køben, tru copayu srørrøb pønrrabelan ashibiibe Joséwane isumø, kerrigu pesannaptindig køn.

Faraónwan Maig Piaigwan José Tørmarøb Eshkab

41 ¹Indig yandø katøle srørrøb pønrrønrrai pønsrai pa ila purainen, Faráonbe kan piaig tøgagøbig køn: Nune Nilo nu pi menda papsrøbashib. ²Møimbe tru piugurrimbe trattrø y parba larrø tabelø, tsal waaramera werruptincha, junco utuwan pu mab mendabelø køn. ³Inchen møimbe katø tru wendaube trattrø y par treetøwei waaramera larrø trømbøilø, kalargøleelø piugurri werruabe, Nilo pi menda tru srøsrø werrub waarameraim pulu pønrramisrøptincha, ⁴tru larrø trømbøilø, kalar waaramerabe katø tru trattrø y par larrø tab waaramera tsalelane

mabashibgue. Inchen tru treeg piab tsuppa, Faraónbe kasraptindinabig kòn.

⁵Incha nõbe katø kibene, katøgan piaig mørøbig kòn: Møimbe tirigu turmera larrø tabelø, larrø may nigar, kan tsutsiizhigutø trattrø y par weguchar, treeg nõrrørailø pønrrøbashibgue. ⁶Inchen tru wendaube tru tsutsigutøwei katøgan trattrø y par weguchibelø kòn, larrø pøndøzhig, tru kurag isig arrubig tustam itsiilø. ⁷Inchen tru trattrø y par larrø pøndøzheeløbe tru trattrø y par larrø may nigazheelø, larrø tabelan piñiptinchibelø kòn. Inchen Faraónbe kia kasraptindinaben, nõbe piabre tsubrain kui wetøbeñibig kòn.

⁸Inchen nõbe lõtsø kia kasrappe, larrø isuig kia kurra, tru Egiptosø mayeelø magia kusrebelø mu mana mariimfiigwan marøbelanba, larrø kusrebelanba amrrunrrai wamabe nui piagwan eshkabig kòn. Inhendø truiløbe tru piaigwane ni mõikken ‘øyeeg kòn’ cha Faraonwane eshkanrrab kaimabelø kòn.

⁹Inchen tru copayu vino srørrøb pønrrabelan nõ karub pasrabiibe Faraonwane trenchibig kòn:

—Møimbe si, na chigøsrøn eshkamig tøgaguigwan eshakamubrain kuin isuptinndan cha. ¹⁰Pøs yanaguen kòn cha nam ñui karui melabelan ñi namun nama, nanba tru pirri marøbelan ashib karub pasrabigwanba, tru suldaumeran nõ karub ashibigwei yau, nõ ashib tøgaguilø purrønrrai namune keeringaruig købig kòn cha. ¹¹Indiibe wendø kan piaig tøgaguig kòn cha, truigwanba nanba tru yemdøwei. Inchen tru piaibe kane peg peg eshkabig kuig kòn cha. ¹²Inchen truyube kan hebreo matsinan merrarrawa keerig namba waig købig kòn cha, tru suldaumeran nõ karub tøgä pasrabigwei karuig megabig. Inchen nambe namui piailan nun eshkabene, nõbe namui piailan øyeeg kønrrabig kòn cha eshkabig kòn mõ piatøgucha maig kønrrabigwan. ¹³Incha nõ maig kønrrun cha eshkaig købiibe trubalawei purayaig købig kòn cha: nabe nai lutøyu katøle puinabene, kanune naashigu tsibasra mesraig kuig kòn— cha.

¹⁴Inchen Faraónbe Josewan attrai wamønrrab øren, tru urastø Josèwane kalø marøbelan merrarrawa keeriinukkurri wesraben, Josébe milisigwan mullib, kewaguilan yunømarøb, Faraónweimay arrubig kòn.

¹⁵Incha Faraónbe Josèwane trenchibig kòn:

—Nabe kan piaig tøgagøbendø, ‘øyeeg kòn’ cha kelarrab eshkanrrabiibe muguen kaagøn cha. Inhendø nabe wammørar cha, ñibe piaigwan wamindi mørabe, ‘øyeeg kønrrab’ kòn cha eshkabig kuin kui.—

¹⁶Inchene Josébe Faraónwane trenchibig kòn:

—Tru treeg maramibe nainug pasrømøn cha. Faraón chi isumø pishindø tab wanrrai wam tranøb lötønrrabiibe Tius nõ kòn cha.—

¹⁷Inchen Faraónbe Josèwane trenchibig kòn:

—Nan piappe, nabe Nilo nu pi menda pasrøbene, ¹⁸tru piugurrimbe waaramera trattrø y par larrø tabelø, tsalelø werruptincha, tru juncos utu pu mab køben, ¹⁹møimbe katø tru wendaube trattrø y par treetøwei waaramera

larrø trømbøgøleelø, ke tsutsiiba, kalusbateelø, ¡katø! itapteelø piugurri werrubelø køn cha. Kan managuen Egipto pirau nabe øyeeg kalargølig trømbøgøleeløbe ashmuig køn cha. ²⁰Inchen tru waaramera larrø trømbøgøleelø kalargøleeløbe tru srøtø trattrø y par tsal waaramera pønrrabelan maptinchibelø køn cha. ²¹Inchendø truilan mappe, mabendø, kan chigucha mamøwa lataitøweih pønrrabelø køn cha. Kaguende maig købeløbe treeg trømbøig kalargøleetøweih pønrrabelø køn. Inchen nabe kasraptindinabig køn cha.

²²Inchen nan katø piappe: Møimbe tirigu turmera larrø tabelø, larrø may nigar, kan tsutsiizhigutø trattrø y par weguchar, treeg nørøwar pønrrøbashib piabig køn cha. ²³Inchen tru wendaube tru tsutsigutøwei katøgan trattrø y par weguchibelø køn, larrø pøndøzhig, tru kurag isig arrubig tustam itsilø. ²⁴Inchen tru larrø pøndø tirigube tru larrø tab tirigu turmeran kebinab, kebinab piñbashib piabig køn cha. Inchen nabe tru magia kusrebelø mu mana mariimífgwan marøbelan payen, muguen truiløbe tru piaibe øyeeg chibig køn chabe eshkamøtan— chibig køn.

²⁵Inchen Josébe Faraónwane trenchibig køn:

—Faraónwei tru pagatø piailøbe parba trunundøwei eshkabig køn cha. Tiusbe nø maig martrab pasraigwan tru piabyu kenamarin køn cha. ²⁶Tru truba tab waaramera trattrø y par, katø tru larrø tab tirigu turmera tru trattrø y parbabe pilamera trattrø y parwan eshkan cha. Tru piaibe trutøwei kandø eshkabig køn cha. ²⁷Inchen tru waaramera larrø trømbøgøleelø kalargøleelø tru tab waaramerai wendau nerrubeløba, katø tru tirigu turmera larrø pøndøzhig tru kurag isig arrubig tustam itsiløba, truiløbe pilamera trattrø y par køn cha. Inchendø truike pilamera trattrø y par larrø trømbøig parø attrabigwan eshkabig køn cha.

²⁸Nabe ñi Faraónwan øyeeg eshkar cha, Tiusbe nø maig maramigwan ñune kenamarøb pasran cha. ²⁹Pilamera trattrø y par Egipto pirau muba kuimburab mamig purø misrøb pilamera kønrrab køn cha. ³⁰Inchen katø tru wendaube pilamera trattrø y par purø trømbøig parø attrabig køn cha, truba truba mamiimera misrig købelanguen chi misrmuig kui lataig pesannawa kømgue, kaguende tru parø arrubiibe tru Egipto pirøwane purø lastimaig mara kørømartrun cha. ³¹Inchawei parø purø trømbøig arruptø, tru merrabwan truba truba mamiimera misrig købeløbe ni kan kenaguen kønrraamøn cha, purø trømbøig køptø. ³²Pøø, ñi Faraónbe pamay treetø, treetø piaig mørig køn cha, kaguen Tiusbe iigwan ñi asha kønrrai ¡katø! martrab pasran cha, trurrigu chi srørømtø.

³³Incha treekkurri ñi Faraónbe kan larrø kusreb møg, chigui asha tab marøb møg lanrrain cha, Egipto pirau kerrigu chi maramigwan nø karub ashib tøgä pasramisrtrai.

³⁴Incha nabe trendamønrrun cha, ñi faraónbe Egipto muba kuimburab tru ellmarig tulisailan ashib amrrabelø wesrawa pønrsø cha, Egipto pirau ellmarig tulisailan cien cargasyu veintene eseganrraingue tru trattrøba parba truba truba misrøb pilamerawan.

³⁵Tru mamig misrøbig larrø tab pilamera amrruben, tru Faraón maig chiben trumay tru ellmarig misrigwan ashibeløbe mamigwan kanbalatø tulisha, ciudamørig esegamig kønrrun, misaamerayasig mamig kønrrai. ³⁶Inchawei tru i esegawa pønsrai mamiimerabe, tru Egipto pirau pilamera trattø y par larrø trømbøbig parø arrubigu purugunrrun cha, trumay misaamera parøgwab kwamønrrain— cha.

José Egipto Pirau Kubenadur

³⁷Inchen tru øyeebe Faraónwanba tru nø karuigwan marøbelanbabe truba tabig mørøraben, ³⁸Faraónbe tru nui karuilane trenchibig køn:

—¿Tiuswei espíritu nunug arrua pasrainabig, katøgan øyeeb møg wetørranrrautah?— cha.

³⁹Incha Faraónbe Joséwane trenchibig køn:

—Ñi lataig kusrebig chigui asha tab martrabiibe mugucha katøgane kaagøn cha. Kaguende Tiusbe ñune kerrigu iigwan nebua asingaruin køn cha. ⁴⁰Ñi kønrrabig køn cha, nai purø tab yau na mubøraptø nebua karub tøgaguigwan ashib karub wanrabiibe, nai maya misaamerabe ñi maig chiben møramig kønrrun cha; ñuimbalabe natøh mas nuig kømønrrun cha, kaguende nabe rey kuikkurri.—

⁴¹Incha Faraónbe Joséwane trenchibig køn:

—Nabe ñune Egipto pirau kerriguba ñi asha karub wanrrai neera wannar cha, naimburø ashib wanrrai.—

⁴²Incha Faraónbe surtigas sellobañauigwan nui taskugurri wesrawa, Joséwan pasrøbig køn. Incha trugurrimbe keilø linotøga marig purø tabig kenanøb, katø kan oro naashigu iløsrøb inchibig køn. ⁴³Incha trugurrimbe tru Faraónwei wendau katøgan tru ashib karub wabig unin karryuy Joséwane nebingarua misagwan øyah chib trashinrrai karubig køn: “¡Tømbønsray! ¡Tømbønsray!” chib. Øyamay Josébe Egipto pirau kerriguwan nø karub wanrrab nebyaig køn.

⁴⁴Incha Faraónbe Josewane trenchibig køn:

—Nabe Faraón kur cha. Inchendø kerriguba Egipto piraube chi maramigwan ñi treeg martrig chimuingatiibe, mugucha kønønrraamøn— cha. ⁴⁵Incha Faraónbe Joséwane munchin yunømara Zafenat Panea cha wamababig køn. Incha Asenatwan nui srain kønrrai tranøbig køn, truiibe On ciudasrø sacerdote lataig Potifera taigwei nimbawwan. Øyamay Josébe Egipto pirøwan ashchab pasramisrig køn.

⁴⁶Josébe pilamera treinta tøgagig købig køn, Egipto rey Faraónwei merrab pera ambub uras. Incha Josebe rey Faraonwei merrabgurri webya, tru Egipto pirau pirø muba kuimburab ashib llibabig køn. ⁴⁷Tru trattø y par misrøb pilamerawane pirøbe truba truba misren, ⁴⁸tru trattø y pa pilamerawan Egipto pirau truba truba misriilan Josébe tulisingarua, ciudamerasrø kan mayangøsrøn esegawa pønsrøbig køn, tru ciudamørig tru pøtøgatanwan tirigu trameran tulisailan truyuy truyuy esegab. ⁴⁹Josébe tirigumera nørø køptø kan maryu pisrum lataig nørø

tulishibig kòn. Tirigu purø norrø køptø yandø mayan kòn tamgaig køben, ka korrømarøbig kòn, norrø køptø øyan kòn chib eshkaib tøgagømgagig kuikkurri.

⁵⁰Tru parø attrab pila ke srøsrø pila pølbasmøwatø Josébe nui srai Asenat, tru Onsrø sacerdote Potiferai nimbarba, pagatø ureezheelø tøgaguig kòn. ⁵¹Incha mayur nusrkawane Manasés munchi pasrig kòn, kaguende nøbe trenchibig kòn: “Nai møskawei yaugurri webya iben, chine chine nebuinab unig købigwan Tiusbe trunun isubguengaig pishindø unamig kønrrai martan” cha. ⁵²Incha tru wendau katøgan unane Efrain munchi pasrig kòn; kaguendø i munchibe: “Na yeeg isuig tsuim pirausrø Tiusbe nane ureg tøgagønrrai marig kòn” chibikkurri.

⁵³Inchen tru Egipto pirau mamig larrø misrøb pilamera trattø y par chab puraiben, ⁵⁴José maig eshkaimbala tru purø trømbøig parø attrabig tru trattø y pa pilamerabe yandø kebibig kòn. Inchen chu pirausrøndøgucha parø arrub mendøben, trune Egipto piraube muba kuimburab mamig købig kòn. ⁵⁵Inchen Egipto pirau kerrigu misaabe parø arrub mendi mørabe, misaamerabe Faraónwan mamig kaatan cha, miab mendaptinchen, Faraónbe maya egipciosmeran trenchibig kòn:

—Joséweimay amba, nø maig taigwan maray— cha.

⁵⁶Inchen parøbe tru pirau muba kuimburab puim pasrøben, Josébe tirigu esegaig pønrrabelømørig kura, egipciosmeran yanøbig kòn. Kaguende mamig kaagøb arrubiibe chu pirausrøndøgucha, masken, maskenig trømbøig misrøb arruben. ⁵⁷Inchen chu pirausrø misaameratøgucha Joséwan tirigu penønrrab amrrubelø kòn, kaguen tru parø arrubiibe yandø munaørøba arrub pasrøben.

Joséwei Nunelø Egiptosrø Mamig Lanrrab Ambub

42 ¹Inchen Jacobpe Egiptosrømbe mamiimera kòn tai wammørabe, nui nusrkalane trenchibig kòn:

—Mailø køh cha, kangurri kangurri asiyab purrønrrappe.

²Egiptosrømbe mamig kòn tai wammørar cha. Trusrømay kørraamba, namuyasig mamig penay cha, kwamø, øsig waramig kønrraimbe.—

³Inchen tru Joséwei nunelø tru pa trattøreløbe Egiptosrø mamig penønrrab kørraambubelø kòn. ⁴Inchendø Jacobpe tru Joséwei nuneg Benjaminwane ørmíig kòn, tru nui nuneløba: “Inchippa mayu chigøbendø nebubgun” cha. ⁵Inchen Israelwei nusrkaløbe mamig penønrrab ambubelø kòn, tru katøganelø penønrrab ambubeløba, kaguende Canaán piraube parø purø trømbøig pasrøben.

⁶Inchen Josébe tru pirau nø ashib karubig købig kòn, katø chu pirausreelan køben maya misaameran tirigu yanøbig. Inchen Joséwei nunelø trusrø puabe, nømui kappalømeran pirausrøngatig kebachib utsøbasrøbelø kòn. ⁷Inchen Josébe tru urastø nømune nui nunelø kui mõi mõi nebua ashibig kòn. Inchendøgucha ashmíig misrøppa, nømune purø tsag waminchib trencha payibig kòn:

—¿Ñimbe chugurri amrrugue?— cha.

Inchen nømbe:

—Canaán pirausrøngurri tirigu penønrrab amrruer— chibelø køn.

⁸Inchen Josébe nui nunelø kui ashen, nømgurrimbe ashmeelø køn.

⁹Inchen Josébe nun tru nømuimburab piaig købigwan isuptinchibig køn.

Inchabe trenchibig køn:

—Ñimbe i pirau kwayanrrab mubørab mas may kegørramdiig kõtashib ka larønrraptørre amrrun— cha.

¹⁰Inchen nømbe trenchibelø køn:

—Ñi, namui karubig, chi treeg kømøn cha, nam ñui karuig melabeløbe tirigu penønrrab amrruig køn cha. ¹¹Nambe mayeeløba kan møskaweindø nusrkalø ker cha, nambe chigøben kalø marøb pønrrømø misaamera, nam ñi karuig melabeløbe maisrøn kõtashib kalø martrab larab amønñimø misaamera ker— cha.

¹²Inchene Josébe trenchibig køn:

—Kah cha, ñimbe i pirau kwayanrrab mubørab mas may kegørramdiig kõtashib trunun ashchaptøwei amrruin køn— cha.

¹³Inchen nømbe trenchibelø køn:

—Nam ñi maig chiben pønrrabelø pa tratrø y par købelø kuig køn cha, nambe søteeløba kan møskaweindø nusrkalø Canaán pirau tsubigwei. Inchen mas unøbe namui møskaimba kørrømisren, kane yandø pinig mugaagøn— cha.

¹⁴Inchen Josébe katøle trenchibig køn:

—Na maig taig ñimbe maisrøn kõtashchab nilø ka larønrraptørre amrrun cha. ¹⁵Incha isa kømø, ñimui wamindig cierto kuitashchab Faraónwei merrab, ¡katø! nabe øyeeg maramønrrun cha, trendamønrrun chibig køn, ñimui wendø nuneg-unan yumay pera amrrumuingatiibe ñimbe yugurrimbe webamrraamøn cha. ¹⁶Ñim møigwan køben øray chibig køn, tru ñimui wendø nunewan pera attrai. Inchen katøganelane keera purrønñiilø purrønrrain cha, trumaybe asamdiig kønrrun cha ñim sølwan waminchibelø kuin kui.

Inchen ka isatø indin kuisruandøbe, ñimbe maisrøngøtashchab ka larønrraptørre amrruar køn cha, nabe Faraónwei munchiyu trendamønrrun— cha. ¹⁷Incha tru nøm pa trattreelane Josébe pøn kwaløm ørøba keerig purrønrrai marøbig køn.

¹⁸Inchabe pøn kwaløm puraibene, trenchibig køn:

—Nabe Tiuswane larrø køriibala pasrabig kur cha. Øyamay maray chibig køn, ñim øsig webamrrappe: ¹⁹Ñim isa kømø, chigøben kalø marøb pønrrømø misaamera kuabe, møikkøben ñimui kan nunewan keera awannig kørrømisra wanrrain cha. Inchen kaneløbe ñim ñimui yau misaameran parø purørmønrrab mamiimera srua ambay cha. ²⁰Incha ñimui wendø nuneg-unan pera amrrunrrrigay cha. Trumaybe isa kømø ñimbe sølwan waminchibelø kui asha, ñimbe kwamig kømønrrun— cha.

Inchen nømbe treegwan martrab kørrømisrøbelø køn.

²¹Inchabe kangurri kangurri trenchibelø køn:

—Isa kòmò, nambe namui nuneweimburab larrò trømbøig kalø marig kòn cha. Pøs øyeekatiibe marmørrunrigay chib nò namun truba truba trenchib megaben, nambe trendaigwane ni mørøkkuinguen kòmuin pønrraig købig kòn cha, yeeg lastima isui indi ashatøgucha. Truburø mòmibe øyeeg isuin pønrramig namuimbala itøarrin pønrrer— cha.

²²Inchene Rubénbe trenchibig kòn:

—Unane chi kaig marmøtay chiben, ñimwei nan mørmuig kòn cha. Møimbeguende namune nui animbe ulø payinab pønrramig kønrrab kòn— cha. ²³Inchen Josébe nò wamindi wamwan nui nunelan katøburø lliska waminchabig katøgan pera pasrabig kòn. Inchagurri nuneløbe nòm chi chib pønrrailane Josébe mørøb pasraitamappe isumeelø kòn.

²⁴Inchen Jøsebe nòmum pulgurri tarømisra ya, truba kishababe, trugurri katøle nòmumay arrua, nòmbe wamincha, Simeónwane nørøø mara, nòm ashib pønrramne lusingarubig kòn.

²⁵Incha trugurrimbe Josébe nòmui kustalmerayu tirigu netsøganingarua, katøle tru nòmui tiriguburø pagarai anmerane kanun, kanun tru nòmui tirigu kustalyu pusingarub, katø mayuwei ishin tamara traningarub inchibig kòn. Inchen treeg marig kòn. ²⁶Inchen nømbe nòmui tirigumeran burrumerayu niisra truyugurri ambubelø kòn.

²⁷Incha nømbe tru kørømisra kiamsrø puabe, møikkørørn nui burrun tirigu manrrab kustalwan pichene, mòmibe nui anbe kustalrrigu ka wai ashtiptinchibig kòn. ²⁸Inchen nøbe nui nunelan trenchibig kòn:

—Nai anwane nane katøle pusrin kòmøh cha. Yu nai kustalyu ka purran— cha.

Inchene nømbe larrø kørørø kwariilø, nòmui manrrøbe ke webørsrab lata inchen, kangurri, kangurri trendiyabelø kòn:

—¿Namun øyeeg nebuinab pønrramig kønrrai kabe Tius treeg mara chinderah?— cha.

²⁹Inchen nømbe Canaán pirausrø møskai Jacob waisrø chab puabe, nòmun kerrigu chi purayaigwan eshka trenchibelø kòn:

³⁰—Tru pirausrø karub wab møøbe namune purø tsag wamincha, nui pirowan maig køtashib namune larab amrruig treeg kemesrøtan cha.

³¹Inchen: “Nambe chigøben kalø marøb pønrrømø misaamera, managuen maig køtashib larab amønimeelø ker cha, nambe trender cha. ³²Incha katø nambe nune trenchibelø ker cha: “Nambe pa tratrø y pa nunelø, katø søteeløba kan møskaweindø nusrkalø, kane yandø pinig mugaaben, srabeibe ñiba Canaánsrø kørømisran” cha.

³³Inchene tru pirausrø karub wab møøbe namune trenchitan cha:

“Nabe ñimune øyamay marigu asamønrrun cha, ñim chigøben kalø marøb pønrrømø misaamera kuitashchab ashchab, møigwan køben, ñimui nunewan yu naba kørømaray cha, kaneløbe nòmui yuelan parø purammønrrai tirigu niisra amrrai. ³⁴Inchendø katø amrruppe, wendø nunewan pera

amrrunrigay chitan cha. Trumaybe ñim isa kòmø chigøben kalø marøb pønrrømø misaamera, ka maig kətashchab ashib ka larønrraptø amrrumuin kui asamønrrun cha. Trugurrimbe ñui katøgan nunewan elachen, ñimbe i pirau mu chi taimíig yanøb, penab amønamiig kønrrun” chitan— cha.

³⁵Inchen tru Joséwei nunelø tru kustalmeran kwarøb mendøbene, nømui kustalmørig kan talegu-unøzhigu nømui tru tiriguburø pagarai anbe ka purraptinchen, nøm lata, nui møkai lata tru an pusri talegu-unøzhigwan kura ashabe, purø kørig isubelø køn.

³⁶Inchene møkai Jacobpe nømune trenchibig køn:

—Ñimbe nane yandø chi nusrkaløgaig kørømarøb amrrutan cha. Josébe yandø pinig mugaaben, Simeóngucha mugaaben, mømibe Benjaminwan pera amrrab indan cha. Iibe kerriguba naimbalatø pureb attan— cha.

³⁷Inchen Rubénbe møkawan trenchibig køn:

—Benjaminwane na ashchur cha. Na Benjaminwan ñuimay katøle pera pumubene, nai pagatø nusrkalan kwetchig— cha.

³⁸Inchene Jacobpe trenchibig køn:

—Nai nusrkaimbe ñimba inrraamøn cha. José nuneebe yandø kwaig mugaaben, mømibe nõtøwein kørømisra megan cha. Mayu chigøben kaig nebubene, chi martrague cha, trube, ñimgurrindø kønrrun cha, køllig waacha isubigutø kuabene.—

Benjamínwan Pera Joséwei Nuneløbe Egiptomay Katø Ambub

43 ¹Inchen tru piraube parøbe masken trømbøig misrøb arruben, ²tru Egiptogurri srua amrruin tirigube yandø chab patsøbene, møkaimbe trenchibig køn:

—Egiptomay katøle amba, namuyasig tirigu nubah penønrrigay— cha.

³Inchene Judábe trenchibig køn:

—Tru møøbe namune ¡katø! ke kandø cha pasrig kuig køn cha: “Tru ñimui wendø nunewan ñim pera amrrumuingatiibe trube, nan kuimbe kenamismørrunrigay” cha. ⁴Ñí namui nunewan ka pera ambasheneh, trube, nambe ñuyasig mamig penønrrab kørøambamønrrun cha. ⁵Inchen ñi namun nun pera ambashmubene, trube, nambe ambamiig kømønrrun cha. Kaguende tru møøbe namune trendaig kuig køn cha: “Ñimui nunewan ñim pera amrrumuingatiibe trube, kenamismørrunrigay”— cha.

⁶Inchene Israelbe trenchibig køn:

—Ñimgui nane purø trømbøig kalø mariitan cha. ¿Tru møwane katøgan nuneg tøgaguer chabe, chinchabrre eshkainguaasamørra?— cha.

⁷Inchene nømbe trenchibelø køn:

—Kaguende tru møøbe namuimburappa, namui yaelaimburappa ke chine tab, tab payibig køn cha. Inchabe trenchibig køn cha: “¿Ñimui møkaimbe ka øsig wabig køh? cha ¿Ñimbe katøgan nuneg tøgagøgueh?” cha. Pøs nambe, nø mancha payiilan ka lètamiitøwein kuig køn cha. “Ñimui

nunewan pera amrrunrigay” chinrraitamappe, ¿kan nambe mu isua pønrraig kõtah?— cha.

⁸Inchene Judábe mōskai Israelwane trenchibig kōn:

—Matsinane na asamønrrun cha. Matsinane naba ka ingaru cha, nambe yandø ambamønrrun cha, ñi lata, nam lata, namui ureemera lata kwamønrrappe. ⁹Chi kōmønrrai nune na asamønrrun cha. Na yumay nun katøle pera arrumuinabene, trube, nagurrindø kōnrrun cha, na chu uraskatig nai øsig tsuigu. ¹⁰Inchawei namun øya srarrøbashmuig kuinguen, katøguen amba pubsruiinrrun— cha.

¹¹Inchen mōskai Israelbe trenchibig kōn:

—Pøs mumay katøgan peemay maramdiig chigaaguig kōbene, trube øyamay ka maray cha: Ñimui kustalmerayu tru mōwei ketamelø i pirau chigøben tabig misriilan srua ambay cha, kan lamø bālsamo kōben, lamø miel kōben, mayzhig irrabelø kōben, mirra kōben, nueces kōben, almendras kōbengue. ¹²Angucha srua ambuppe, maya srua ambig kōmnetø katø treetøweih srua ambay cha. Ñimui tirigu kustalyu tru anmeran katøle pusrig kōbigwane tranrrab katøle srua ambay cha. Inchippa pella treenchib kuin kōbgun cha. ¹³Incha ñimui wendø nunewan pera, tru Egipto pirau nø karub wabigweimay katø ambay chibig kōn. ¹⁴Maramburab Marøb Tiusbe tru mōg ñimun lastima tøgagønrrai martrain cha. Inchen ñimui katøgan nunewan lelachen, Benjamíngucha katø ñimba attrain cha. Inchen nan nai nusrkalan trubisamig nebubene, chinchibig kui ¡ka treeg nebunrraita!— cha.

¹⁵Inchen nōmbe tru ketamelanba, katø angucha maya srua ambig kōmnetø katø treetøweih srua, Benjamínwan pera, Egiptosrōmay kōrraamba, Joséwei merrab pubelø kōn. ¹⁶Inchen Josébe Benjamín nōmba arrin kui ashabe, tru nui yau ashibigwane trenchibig kōn:

—I mōguelan nai yamay pera ya, kan waara kweecha tamaray cha, kaguen i mōgueløbe kwaløm tøbøtaabe naba manrrab kōn— cha.

¹⁷Inchen tru mōøbe José maig taigwan mara, Joséwei yamay nōmune pera ibig kōn. ¹⁸Inchen nōmbe Joséwei yausrōmay pera ambi mōrabe, kōrrø kōriimata trenchibelø kōn:

—Marig merrabwan namui kustalmerayu tru anwan katøle pusrikkurri namune pera ambiinrrun cha. Mōimbe namune merrarrawa, chigøben maramba, namune øyeeg, øyeeg mara pønrran tamba, katø namune nōmui karua srua kuilø kōnrrai maramba inchautan cha, namui burruimeranbañau.—

¹⁹Incha yandø kebambi yaskabu puabe, tru Joséwei yawan ashibigwan nōmbe waminchab kemallabe, ²⁰trenchibelø kōn:

—Tiusmanda, namui karubig, nambe tru srøtø kōrrøruppe tirigu penønrraptø kōrrøruig kōn cha. ²¹Indiibe tru nam werrua amrrua, tru yem kōrrømisramsro puabe, namui kustalmeran kura ashene, mōimbe tru tirigu kustalmerayube mōilaindøgucha namui anmerabe kerriguba ka purraptindin kōn cha, maya unaasiibe, treekke. Mōimbe nambe tru anwan tranrrab katøle srua amrruer

cha. ²²Incha tirigu penamig anbe katø srøig sruamrruer cha. Inchendø nambe tru srøsrø srua amrrui anwane kustalmerayu mu kebusri mørmer— cha.

²³Inchen tru Josewei yau chi købigwan nø ashibiibe trenchiptinchibig køn:

—Chi isumøtay cha. Chi kørig isumøtay cha. Ñimui Tius, katø ñimui møskawei Tius nøbe ñimui kustalmerayu tru anwan pusriinrrun cha. Nabe ñim pagarai anwane utig kuig køn— cha. Incha tru Joséwei yau chitø tøgaguilan ashibiibe Simeónwan wesrawa, nøm purraisrømay pera arrua, ²⁴trugurrimbe José waisrømay pera ya, nømui srømmeran kwalamig pi tranøb, burrumeran mannamig pønsrøb inchibig køn.

²⁵Inchen nømbe ketamelan tamara, José israyu pumnegatig muniirabelø køn, kaguen mamiibe truyu kønrrabig kui nømbe wammøra purrøwa.

²⁶Inchen yandø José yau pubene, nømbe tru ketamelø srua amrruilan keta, nømbe Joséwei merrab pirausrøngatig maløwan trarrøb utsøbasrøbelø køn. ²⁷Inchen Josébe payibig køn:

—¿Maig meløgue? cha, ¿Tru ñim wamindig ñimui møskai kølli misaazhikkan katøgucha ka øsig wabig kuitarru?— cha.

²⁸Inchene nømbe trenchibelø køn:

—Tru namui møskai, ñi maig chiben martrabiibe, chigucha kømø, tab ka wan cha. Ka øsig wabig køn— chabe, nune tab indig kønrrai utsøbasrøbelø køn.

²⁹Inchen Josébe nuin pøtøgatan ashabe, tru kan møskaindø, kan usrindø kuikkurri nuimbe trag nuneg Benjamín pasrai ashabe, trenchibig køn:

—¿I tru ñimui wendø nuneg kuitarru cha, tru ñim nan wamindig?—

Inchabe trenchibig køn:

—Tius maya nuguen ñun tab indig kønrrain cha, nai nusrkai.—

³⁰Inchen nui nunewan ashene, kishig købiibe yandø pasramgaig køben, Josébe mallatø webya, nui kwartuyu kebya, kisamburab kishibig køn.

³¹Incha yandø awentawa, nui maløwan kwalla, webarruabe, trenchibig køn:

—Mamiimera nøm manrrai pønsray— cha.

³²Inchen José mab wamisramibe nøørø køben, katø nunelane nøørø tamara purrønana, egipciosmera tru Joséba mabelane katø nøørø mab purramig tamarøbelø køn, kaguende egipciosmerabe nøm kørewa tøgaguigube hebreosmerababe trubalatø purramisra mamig kømíig kua, kaguen nømuimbe treebe larrø trømbøig købig køben. ³³Inchen Joséwei nuneløbe nui merrab purrabelø køn, José maig purramisingaruben, treekke. Kerrigu mayurmerrig, trugurrimbe tru wendauig treetø, treetø nøm maya yanailø køben, trumay treeg purrønnoibig køn. Inchen nømbe truba kwaariilø purrabelø køn, nømbe ¡katø! kangurri, kangurri asiyab. ³⁴Incha Josébe tru nui mishatsigu chi mamiimera pønsraigwan tru mamiimeran nømun pirishibig køn. Inchen Benjamínweyasiibe trattreelaimburabigwan nuyasiitø pasrøbig køn, kanelan lataitøguen kømø. Incha nømbe Joséba kanbalatø mab, muchib truba truba kasraarabelø køn.

Josewei Copa

44 ¹Incha mas yanayu Josébe nui yawan ashibigwan trencha karubig køn:

—Tru møguelai kustalmerayu maya kemnegatig tirigun netsøganay cha. Incha nømui pagarai anmeran tirigu kustalmerayu trumørig pusrrig cha. ²Incha tru wendø nunewei tirigu kustal trigube nai copa andøga marigwan wayrrig cha tru tiriguburø nø an pagaraigwanba kanbalatø.—

Inchen tru yau ashib wabiibe José maig karuigwan marøbig køn.

³Inchen yandø ke chab tør-rrabendø tru møguelane Josebe ambasingarubig køn, nømui burrueranba. ⁴Inchen tru møgueløbe tru ciudadugurrimbe ke tre yab ammø, srø køben, Josébe nui yau ashib wab mōwane trenchiptinchibig køn:

—Tru møguelan wetøgørrrab mōi mōi malla inrrø cha. Incha wetøgabe, trenchinrrig cha: “Namgurrimbe yeeg tab inchen, ñimbe chindimbarre kaig mara amgue? cha. ¿Andøga marin copan chindimbarre nila srúa amgue? cha. ⁵Nan karub pera pasrabig truyu muchib, chi purainrrabigwan truyu nebua ashib indin copan. Ñimgui purø kalø marin køn”— cha.

⁶Inchen tru yau ashib wab mōøbe wetøgabe, José maig taigwan treetøweih chibig køn. ⁷Inchene nømbe trencha lötabelø køn:

—¿Tru namun ashib karubiibe namune chindimbarre øyeeg chinetø tah? cha. ¡Kan! nambe managuen treekkøliibe mara kømer cha. ⁸Yamba nambe Canaán pirausrøngurringuen tru namui tirigu kustalmerayu an wetørrailanguen katøle tranrrab srúa amrruig køn cha. Ñui karubigwei yaugurrimbe mas mandø incha tru oro køben, an køben, nila srúa amrrunrraitamah? cha. ⁹Inchen nam ñui karuig melabelainug mōigweinug køben, tru copan wetørrainabiibe, truike kwamig kønrrain cha. Inchen namguen ñui karuindiig melabelø kønrrab kørrømisramønrrun— chibelø køn.

¹⁰Inchen tru yau chiwan køben nø ashib wabiibe trenchibig køn:

—Ñim maig taig treeg kønrrain cha. Tru copan wetørrainabiitøh na karub tøgagømig Meganrrab kørrømisrtrun cha. Inchen ñim kaneløbe chi kalø mara pønrran tamiibe chigar kørrømisrtrun— cha.

¹¹Inchen nømbe mallazhiitø niisraigwan chab pinøsrúa, mōitøgucha kustalmeran pirau pønsra tsusaigwan pichibelø køn. ¹²Inchen tru ya ashibiibe tru mayur nunewei kustalygurri lab pølbasa, tru srabe nuneg Benjamínweisrøngatig lam mendøbene, mōimbe tru copane truigwein kustalyuh wetørraptinchibig køn. ¹³Inchen nuneløbe nømui kewa pønrraigwan larrø isuin pønrrai ashchai kenamartrab kølsrøptinchibelø køn. Incha nøm mōitøgucha nømui burrueran katø niisra, ciudadsrømay katøle chab llirabelø køn.

¹⁴Inchen Judábe nui nuneløba Joséwei yausrø pubig køn, nøbe yau srø wamnetø. Inchen nømbe nui merrab maløwan pirausrø kebatamnegatig utsøbasrøbelø køn.

¹⁵Inchene Josébe trenchibig kòn:

—¿Ñimbe øyeebe mumay marøb pønrrøngue? cha. Kan møg chi chippe treegwan kønrrai inchibig na lataibe ñim chi kalø martrab indigwan kabe wetøbeñmønrraitamagueh— cha.

¹⁶Inchene Judábe trenchibig kòn:

—Namui karubigwan, ñune ni chitamguen kømøtan cha. Mumaygucha kan treeg marmuig kòn chib pønrramibe kaatan cha. Nam ñui karuig melabelainug trømbøig kalø marigwan Tiusbe kenamaran cha. Møimbe nambe namui karubigwei karuindiig melabelø misramønrrun cha, katø tru copan wetørrainabig chigucha.—

¹⁷Inchene Josébe trenchibig kòn:

—Kan nabe treebe mana marøb pasramø cha. Tru copan nuinug wetørrainabiitøh nai karuindiig meganrrab kørromisrtrun cha. Ñimbe chi isumø, ñimui møskaweisrømay ka ambay— chibig kòn.

Judá Benjamínwan Purøwaminchib

¹⁸Inchen Judábe Joséweimay kemallabe, trenchibig kòn:

—Nai karubig, nan namumørrunrrig cha. Ñundø na kan chigøsrøn chinrrab, nan tiusmanda utø ketøbsrumuguh cha, kaguende ñibe Faraón køb lataitøwei chi maramigwane martrain karubig kòn cha. ¹⁹Ñi namui karubiibe namune øyeeb chib payig købig kòn cha: “¿Ñimbe katøgucha møskawan ka wannar køgueh, kabe katøgan nuneg kui tøgar køgueh?” chib. ²⁰Inchen nambe ñi namui karubigwane øyeeb cha løtab pønrraig kuig kòn cha: “Nambe namui møskai kølli misazhiiba, kan matsinø nuneg-unøba tøgar ker cha, trube namui møskai kølli misag køben kal-lawai. Inchagurri tru i srabeigwane møskaimbe purø undaguig kòn” cha; kaguendø kan usraindø nusrkain kuikkurri kan nunebe yandø kwain kaaben, nøtø kørromisra pasran cha.

²¹Inchene ñi maig chiben nam treeg pønrrabelane ñibe trendaig kømøh cha: “Na ashchab tru wendø nunewane pera amrrunrrigay” cha. ²²Inchen nambe namui karubigwan yamba trendaig køppeh cha: “Matsinøbe møskawane chinch a elatchaamøn cha, kaguende ø elachene, møskaimbe kwanrrun” cha. ²³Inchene nam ñui karuig melabelane ñibe trendaig kòn cha: “Ñimui wendø nuneg ñimba arrumuingatiibe, trube, kenamismørrunrrigay” cha.

²⁴Incha nambe namui møskai tru ñi maig chiben marøbigwei yausrø puabe, ñi namui karubig ñi maig taigwan nambe kerrigu eshkabelø ker cha.

²⁵Inchene namui møskaimbe namune trenchibig kòn: “Katøle amba, namuyasig tirigu nubah penønrrigay” cha. ²⁶Inchen nambe namui møskawane trendaig kòn cha: “Namui wendø nuneg arrumuingatiibe nambe chinch a ambamgaig kòn cha. Namun ø linchimubene, tru karubigwane asamig kaagøn” cha.

²⁷Inchen nai møskai ñui karuig megabiibe trendaig kòn cha: “Ñimbe ashibelø kòn cha, nai sraimbe pagatø nai nusrkalø tøga misrigwan. ²⁸Indig

kane nainukkurri ya yandø pinøben, katøbe managuen ashmur cha. Namig ushamera pitis marig kuitamab isur tan cha. ²⁹Katø iigwangucha pera amben, katø chigøben køptinchene, na køllig waachawan isubiitøgatø kwamig kønrrai marøbeløbe ñim kønrrabguen” cha, nane trendaig køn cha.

³⁰Nai mōskaimbe matsinø-unøbabe purø trag pønrrabelø kuig køppe, nambe katøle amben, matsinø-unø namba arrumubene, ³¹namui mōskaimbe nun ashmuppe, kwanrrun cha. Inchen nam kømønrrun cha, namui mōskai kølli misagwan isubiitøgatø kwamig kønrrai marøbeløbe. ³²Incha na ñui karuig megabiibe matsinan na purøbasramisrøb na ashchab misrig køn cha, nai mōskawei merrab. Incha nabe nai mōskawane trendaig køn cha: “Na katøle ñuimay pera arrumuinabene, trube, nagurrindø kønrrun cha, na chu uraskatig nai øsig tsuigu” cha.

³³Inchawei tiusmanda, nabe ñun treeg marøbsrumu chinrrab cha, matsinaimburo na purøbasramisrtrur cha, na ñui karuindiig meganrrab, matsinø-unøbe nui nuneløba katø inrrai. ³⁴¿Nabe mandø yamø cha, matsinø-unø naba arrumubene? Trube, nane nai mōskawane larrø lastimazhig isui indi ashig kømøtan— chibig køn.

José Nui Nunelan Nø Muguigwan Eshkab

45 ¹Inchen Josébe nuim pøtøgatan pønrrabelai merrab yandø mas awentanrrab kaima, mur wamabig køn:

—¡Mayeelanba yu nai merrabgurri webbingaruy!— chib. José nui nunelan nøbe ñimui nuneg kur cha eshkabene, nuim pulube ni mugucha mugaaguig køn. ²Incha nøbe trasha, trasha kishen, egipciosmerabe wammøren, katø Faraónwei yau misaameragucha wammøren inchibelø køn.

³Incha Josébe nui nunelane trenchiptinchibig køn:

—Nabe José kur cha. ¿Nai mōskaingan tab ka wabig kuitarru?— cha.

Inchen nuneløbe larrø kørrø kwaara, ni chigucha løtønrrab kaimaptinchibelø køn, nømbe nui merrab ni mumayguen kømuilø pønrrøwa.

⁴Inchen Josébe:

—Naimay kemalay— chiben, nømbe kemallen, nøbe trenchiptinchibig køn:

—Nabe tru ñimui nuneg José kur cha, tru ñim nan Egiptosrømay yana ørig købig. ⁵Inchendø ñimbe chi kullaarab isui inchimøtay cha. Ñim nan yusrømay yanig købigwan karrengucha øyeeg marøbraitamab isumøtay cha. Nane Tius ørig køn cha, manawei nanmerrig inrrai, misaameran kwamø ka øsig puramrrai martrab. ⁶Kaguende pirau pa pilaguen parø arrub pasrøben, katøgucha tratrø pila palan cha, tru pilamerawane ellmartrab aramelø kønrrab kømøwei, ellmarig tulisamig kønrrab kømøwein kønrrabig køn cha. ⁷Incha Tiusbe manawei nanmerrig ørig købig køn cha, ñim pirau ka øsig warøwa, larrø tab webamba pønrramig puben, trumay misaamera larrøbichibig larrøbichib kønrrai.

⁸Inchawei nane yusrømay ørøppe, Tius nø ørig køn cha, ñim kømøtø. Tru Faraónwan chi maramigu na isum purugubig kønrraimba, nui yau kerriguwan na ashib tōga wanrraimba, katø kerrigu Egipto pirau na karub wamig kønrraimba nø pasrig køn cha. ⁹Inchawei ñimbe mallatø incha, nai mōskawei yamay amba, trenchinrigay cha: “Ñui nusrkai Josébe øyah tan cha: ‘Tiusbe nane Egipto pirau kerriguba na karub wanrrai wandan’ cha. Incha ‘nan ashchab ‘pebatø’ amø’ tan chinrigay cha. ¹⁰Ñibe nai puluwandø Gosén pirau tsunrig tan cha, ñui nusrkaløba, ñui awelu ureemeraba, katø ñui ubishamera køben, cabrasmera køben, ñui waaramera køben, katø ñui chigurrimbunø tøgaguiløbañau. ¹¹Nabe ñun truyu ashib tōgagørrumøn cha, kaguen katøgucha trattrø pila ørøba tru parøbe arrubig attrab køn cha. Trengømuisruandøbe ñiba, ñui ureemeraba, ñui kerrigu chi tøgaguiløbañau larrø lastimailø misra kørørmisrtrabguen’ cha.

¹²Inchagucha ñim lata, nai nuneg Benjamin lata, ñimashib asha pønrran’ cha, waminchippe na waminchib pasrai. ¹³Nai papáwan eshkanrigay cha Egipto pirau kerriguwan ashib na karub waigube chigurrimbunø køn cha katø ñim kerrigu chi asilanba. ¡Ñimbe mallatø amba!, yusrømay nai papáwan pera amrrunrigay— chibig køn.

¹⁴Incha Josébe nui nuneg Benjamínwan ira pasramisra, kishen, katø Benjamíngucha treetøwei nuneg Joséwan ira pasramisra, kishibig køn. ¹⁵Incha Josébe nunelan muchawa, truba truba kishib irabig køn. Inchen nunelane wamindamig wam larraibig køn.

¹⁶Inchen Faraón nø waig yausrømbe wam pubig køn: “Josewei nunelø chab puin køn” tan chib. Inchen Faraónba tru nui maramigwan marøb purrabelø nørreeløbabe kasraarabelø køn. ¹⁷Incha Faraónbe Joséwane trenchibig køn:

—Ñui nunelan Canaán pirausrømay nømui ushamerayu niisra amrrai karu cha. ¹⁸Incha ñui mōskawanba ñui yau misaameranba naimay pera amrrunrai. Nabe yu Egipto purø tab pirøwan tranamønrrun cha. Inchen nømbe i pirau purø tab mamiimera misriilan manrrun cha.

¹⁹Katø ñibe nømune treeg karunrig cha: “Yu Egipto pirau carretillas nørreelø weytøga sruilan srua ambingarua cha, nømui sralan køben, ureemeran køben ñui mōskawan køben pera amrrumig. ²⁰Incha nømui chi tøgaguilan lelacha, amrrumig chi isumønrray cha, kaguende yu Egipto pirau purø tabiibe nømuin kønrrun”— cha.

²¹Inchen Israelwei nusrkaløbe treeg marøbelø køn. Pøs Faraón maig karuben Josébe carretillas nørreelø weytøga sruilan pønrsøb, mayuwei ishiimera tranøb inchibig køn. ²²Incha nømun kanun, kanun kemelø srøizhig kan, kan keta trana, Benjamínwane tsantsøn anmera trescientosba, katø yunømarøb kemelø trattrøgatøba keta tranøbig køn. ²³Incha nui mōskaweyasiibe iilan trana ørøbig køn: Egipto pirau purø tabelø tøgaguilan pa trattrø burrusmerayu niisra øriiløba, katø pa trattrø cargas burramerayu tirigu niisra øriiløba, katø pirrimera køben, mamiimera køben niisra ørøbig køn, mōskai maywan mab arrumig. ²⁴Incha yandø amrrai ørøbig køn. Incha yandø webamba ambene, Josébe trenchibig køn:

—Mayube chinetø, chinetø tiyab, kwayab amrrab kømø— cha.

²⁵Inchen nømbe Egipto piraugurri nebambub amba, Canaán pirausrø pubelø køn, nømui møskai Jacob waisrø. ²⁶Incha trusrø puabe, trenchiptinchibelø køn:

—Josébe ka øsig wan cha. Egipto pirau muba kuimburab nø karub ashib wabig kuin kømøh— cha.

Inchen Jacobwei manrrøbe pasram kwarøptinchibig køn, kaguen nøbe køremuig kua. ²⁷Inchen nømbe José mandø tailan, mandø tailan chishtøga eshkaben, katø nømun pera ambamig carretillas nørreelø weytøga sruilan trana øriilan ashib inchene, nune asrchiibe katøle chish misrøbig køn. ²⁸Incha Israelbe trenchibig køn:

—Nai nusrkai José katøgucha øsig wabig kuin kui yandø tsabø ashar cha. Na kwamøwatø nabe ashchab yamønrrun— chibig køn.

Jacob Nui Ureemeraba Egipto Pirausrø

46 ¹Incha Jacobpe mayeelø nøba warabeløba nui chi tøgaguiløbañau webya, yandø Beersebasrø puabe, truyu Jacobpe ushamera kweecha Isaac nui møskawei Tiuswan tranøbig køn. ²Inchen Tiusbe yem kan piab lataigu Israelwane trenchib waminchibig køn:

—Jacob, Jacob— cha

—Inchene nøbe:

—Yu pasrar— chiben,

³Tiusbe trenchibig køn:

—Nabe Tius kur cha, tru ñui møskawei. Tius. Egipto pirausrømay kørroyamig chi korig isumøta cha. Nabe ñune ñigurri purø nørro misag sötømera kønrrai maramønrrun cha trusrø. ⁴Nabe ñiba Egiptosrømay kørraarra, katø natøwei Egiptogurri werrunrrai maramønrrun cha. Incha ñi kwabene, Josebe nøashib nui taska ñui kammeran kasrønrrun— chibig køn.

⁵Incha yandø Jacob Beersebagurri webibene, Israelwei nusrkaløbe nømui møskai Jacobwan køben, nømui ureemeran køben, nømui sralan køben, tru Faraón amrrunrrai carretillas nørreelø weytøga sruilø trana øriiløyu amrrab nebambingarubelø køn. ⁶Incha katø Canaán pirau tøgamisriilø nømui ushameran køben, chine købelan køben, tøga srua ambig købig køn. Øyamay Jacob kerrigu nui yaeløba Egipto pirausrømay yaig køn. ⁷Nui nusrkalø køben, nui nimbasrmera køben, nui awelu ureemera køben, nui awela ureemera køben mayeelø nuinukkurri amrrub misaamera nøba ambig køn.

⁸Tru israelitasmera Egipto pirau kebambubelai munchimerabe iilø køn, tru Jacob nuinukkurri amrrub misameraba:

Rubén Jacobwei mayur nusrkai.

⁹Katø trugurri Rubenwei nusrkaløbe iilø køn: Hanoc køben, Falu køben, Hezrón køben, Carmí købengue.

¹⁰Inchen Simeónwei nusrrkaløbe Jemuel køben, Jamin køben, Ohad køben, Jaquin køben, Zohar køben, katø kan Canaánsrø ishuwei nusrrkai Saúl købengue.

¹¹Inchen Leviwei nusrrkaløbe iilø køn: Gersón køben, Coat køben, Merari købengue.

¹²Inchen Judáwei nusrrkaløbe iilø køn: Er køben, Onán køben, Sela køben, Fares køben, Zera købengue. (Inchendø Erbaba Onánbabe Canaán pirausrøndø kwaig købig køn). Inchen Fareswei nusrrkaløbe Ezrónba Hamulba kuig køn.

¹³Inchen Isacarwei nusrrkaløbe iilø kuig køn: Tola køben Fúva køben Job køben, Simrón købengue.

¹⁴Inchen Zabulónwei nusrrkaløbe iilø køn: Sered køben, Elón køben, Jahleel købengue.

¹⁵Truilø kuig køn tru Padan-aramsrø warab uras Lea Jacobwei tøgagui nusrrkalø, katø tru Dina nui nimbasrba. Inchawei truyugurri amrrub misaamera møguelan køben, ishumburmeran køben munchene kerrigube treinta y tres kuig køn.

¹⁶Inchen Gadwei nusrrkaløbe iilø køn: Zifión køben, Haguí køben, Ezbón køben, Suni køben, Eri køben, Arodi køben, Areli købengue.

¹⁷Inchen Aserwei nusrrkaløbe iilø køn: Imna køben, Isva køben, Isvi køben, Beria køben, katø nømui nuchag Sera taikkuchague. Inchen tru Beriai nusrrkaløbe iilø køn: Heber køben, Malquiel købengue.

¹⁸Iilø kuig køn tru Zilpa Jacobwei tøgagui nusrrkalø. Tru Zilpabe karuindiig mendig megabig kuig køn, tru Laban nui nimbasr Lean keta trani ishug. Tru Zilpainukkurri amrrub ureemerabe kerrigube dieciséis kuig køn.

¹⁹Inchen Jacobwei srai Raquelwei nusrrkaløbe iilø køn: Joséba, Benjamínba.

²⁰Inchen Joséwei nusrrkalø Azenatba tøgagui ureemerabe iilø køn: Manasésba, Efrainba Egipto pirau kal-lawar. Tru Azenatbe Onsrø sacerdote Potiferai nimbasr kuig køn.

²¹Inchen Benjamínwei nusrrkaløbe iilø køn: Bela køben, Bequer køben, Asbel køben, Gera køben, Naamán køben, Ehi køben, Ros køben, Mupim køben, Hupim køben, Ard købengue.

²²Iilø køn tru Jacobweimba Raquelweinukkurrimba amrrub ureemera kerrigube catorcegue.

²³Inchen Danwei nusrrkaimbe Husin taig køn.

²⁴Inchen Neftaliwei nusrrkaløbe iilø køn: Jahzeel køben, Guni køben, Jezer køben, Silem købengue.

²⁵Iilø køn tru Bilha Jacobpa tøgagui ureemera. Tru Bilhabe karuindiig mendig megabig kuig køn, tru Laban nui nimbasr Raquelwan keta trani ishug. Inchen tru Bilhainukkurri amrrub ureemerabe kerrigu trattø y par kuig køn.

²⁶Inchen mayeelø Jacobpa Egipto pirau nuikkurri amrrub misaamerabe pubeløbe sesenta y seis kuig køn, nui aniyugurri ureemera nusrrkalai sralan munchimuben. ²⁷Inchen Joséwei ureemerabe pagatø kuig

køn, Egipto pirau kal-lawar. Inchawei Jacobwei yau misaamerabe Egiptosrømbe setenta puig købig køn.

²⁸Incha Jacobpe Judámerrig Joséweisrø merrab punrrai ørøbig køn, Joséwan eshkaben Gosénsrø nun katønrrab attrai. Incha Gosén pirausrø chab pubelø køn. ²⁹Inchen Josébe nui møskawan utønrrab yamig niga luløb kaullimera sruigwan tamara, Israel nui møskawan Gosénsrø utønrrab webibig køn. Incha møskawan ashippe, naashiburab ira, pasramisra, truba truba yana kishibig køn.

³⁰Inchen Israelbe Joséwane trenchibig køn:

—Møimbe ñun na ashib asha, ñi øsig ka wabig kuin kui wetørrawabe, nabe chi isumø, ka kwamønrrun— cha.

³¹Incha Josébe nui nunelanba nui møskawei yau misaameranba trenchibig køn:

—Na Faraónwan ashchab inrrab inchar cha, nun wammørsrkønrrab: “Nai nuneløba, nai møskawei yau misaameraba Canaán pirausrø warabeløbe naba kørrømisra warønrrab amrrun chinrrab”. ³²Pøs nømbe ubisha ashibelø waara karrøgøbelø treelø køn chinrrab. Incha nømui ubishameran køben, waarameran køben chigurrimbunø nøm tøgaguilan køben srua amrrun” cha.

³³Inchawei Faraón ñimun wama: “¿Ñimbe chi marøbelø køgue?” cha payene, ³⁴ñimbe øya lötønrrigay chibig køn: “Nam ñui karuiløbe matsøreg ureamera kurri møingatig nam lata, namui kølli misaamera lata waara karrøgøbelø ker” cha. Trumaybe ñimbe Gosén pirau warønrrabguen chibig køn. kaguende egipciomerabe ubisha ashibelane purø trømbøig kui inchibelø køn cha.

47 ¹Inchen Josébe Faraónwan wammørsrkønrrab yabe, trenchibig køn: —Nai møskaimba, nai nuneløba Canaán pirausrøngurri amrruin køn cha, nømui ubishamera køben, cabrasmera køben, nømui waaramera køben, nømui chi tøgaguilø kerriguba. Incha yandø Gosén pirausrøn chab puaguen køn— cha.

²Incha Goséngurri attraptø trattøgatø nui nunelan lawa wesrua, Faraónwei merrab pera arrubig køn, ‘nai nunelø køn’ cha eshkanrrab.

³Inchen Faraónbe trencha payibig køn:

—¿Ñimbe chi marøbelø køgue?— cha.

Inchen nømbe Faraónwan trenchibelø køn:

—Nam ñui karuig melabeløbe ubishamera køben cabrasmera køben karrøgøbelø treelø ker cha, namui merrabsrø møskalø lataitøwei.—

⁴Incha katø trenchibelø køn:

—Nambe i pirau kan maya yanatø warønrrab amrruer cha, kaguende nam ñui karuig melabelai ubishameraimbe Canaán pirau nam waraisrømbe chi pu kaagøn cha. Trusrømbe parøbe ni chindamguchagaig pasran cha. Inchagurri nam ñui karuig melabelan tiusmanda Gosén pirau namun warøbashibsrømøgue chinrrab inder— cha.

⁵Inchene Faraónbe Joséwan trenchibig køn:

—Ñui mōskaimba, ñui nunelōba ñiba warōnrrab amrruin køn cha.

⁶Egipto pirōbe ñi asha maramig ñuin tasku pasran cha. Mas purø tab pirau warōnrrai war chibig køn, tru Gosén pirau. Egipto pirau truibē purø tab pirø køn cha. Truyu warōnrrab kōrrōmisrtrain cha. Truilai utu purø tab asha martraptø mōguelø købene, truilan nai ushameran nōm ashib tōgagōnrrai nōmun pōnsrø— chibig køn.

⁷Trugurri Josébe nui mōskai Jacobwangucha pera ya, Faraónwan, ‘iibe nai mōskain køn’ cha eshkabig køn. Inchen Jacobpe Faraónwan ‘mayanguen tabig nebuig kønrrig’ chibig køn.

⁸Inchen Faraónbe Jacobwan trencha payibig køn:

—¿Mam pila tōgaig kugu?— cha.

⁹Inchen Jacobpe Faraónwan trenchibig køn:

—Na amburab, iburab llirab uniibe pilamera ciento treinta køn cha. Na øsig uniibe menrra yam pilamera kōmōwei, katø murig kuig køn cha. Tru nai kōlli misaamera nōm llirab amōnain pilamerababe trugatig nebumum kōtan. —cha.

¹⁰Incha Jacobpe Faraónwan mayanguen tabig nebuig kønrrig chib, truyugurri ungua cha ibig køn.

¹¹Inchen Josébe Egipto pirau purø tab pirōmeran tranøbig køn, truyu warōnrrai, Faraón maig karuig, treekke. Treekkurri nui mōskaimba nui nunelōba Ramesés pirau, pirōmera tōgaguig købig køn. ¹²Incha katø Josébe nui mōskawanba, nui nunelanba, nui mōskawei yau misaameranba nui karuig peraguilanba mamiimera mab kōmig pōnsrøbig køn, nōmun kanun, kanun maig paløben, treekke.

José Mandø Asha Maramig Køben Trumay Marøb

¹³Yandø muba pirø kuimburab chigucha mamig chigaaben, trune parøbe chindamdiig køben, Egipto pirau lata, Canaán pirau lata parø arrubigu yandø misaamerabe kwamitø palabig køn. ¹⁴Inchen Josébe tru Egipto pirau misaameraba, Canaánsreelōba tirigu penab pagarai anmeran kerrigu tulisha, tru anwane Faraónwei tab yau esegabig køn. ¹⁵Inchen yandø Egipto pirau lata, Canaán pirau lata chigucha anga patsøben, maya egipcimerabe Joséweimay amrrua trenchibelø køn:

—Namun ñi mamiimera pōnsrørra cha. ¿Namgan ñui merrab kwamig kuitarru? cha, namun kerrigu an patsinukkurrindø.

¹⁶Inchen Josébe trenchibig køn:

—Ñimun an chab patsøbene, ñimui ushameran tranay cha. Nabe tru ushameraba yunømarøb ñimune tirigu tranamōnrrun cha. ¹⁷Inchen egipciosmerabe nōmui ushameran srua amrrubelø køn; kaullimera køben, ubishamera køben, cabrasmera køben, burrumera køben, wamera køben. Incha tru ushameraba yunømara, tru pilawan mamiimera tranøbig køn.

¹⁸Inchen tru pila puraiben, wendø pilayu nōmbe amrruabe, trenchibelø køn:

—Namune an patsøben, namune ni chinchaguen sòramgaatan cha, kòrròmismòtò, an patsòtan cha, ñun eshkaig kòn cha. Yandø namui ushameragucha ñuindø misren, nambe chigòben tranamibe chigar misrer cha, namui piròmerabah, katø nambe ka pònrraiteelø pònrrer cha. ¹⁹Namui piròmerabañau çñigan nam kwanrrai kònrraindeh? cha. Ñi namunba, namui piròmeranba penørray cha, mamiiba yunømariilø kònrrai. Trumaybe nambe namui piròmerabañau nambe Faraónwei misra karuindeelø melamønrrun cha. Inchendø yellmera nam mamig kòben, ellguamelø kòben, tranrra cha, nam øsig waramig kònrraimbe, katø piròmeragucha lelatsiilø pònrrømønrrai.—

²⁰Inchen Josébe Egipto piròmeran kerrigu Faraónweyasig penabig kòn, kaguende egipcimerabe tru parø arrubikkurri nòmui piròmeran yanen. Inchagurri piròmerabe kerriguba Faraónwei tasku purayaig kòbig kòn. ²¹Incha egipciosmerabe Egipto pirau muba kuimburab nømbe ka karuindeelø melønrrab melamisrig kòbig kòn. ²²Inchen piròmera peniimeelø kòrròmisorøppe, sacerdotemeraindøh peniimeelø, ka kòrròmisorig kòn, kaguende nømbe Faraónweinukkurri mamig traniilø utabelø kuig kua. Inchagurri nømbe nòmui piròmeran yanmuig kòbig kòn, nømbe Faraón pønrraigwan mabelø kua.

²³Incha Josébe misaameran trenchibig kòn:

—Møimbe ñimba ñimui piròmerababe Faraónweyelø kòn cha, nabe nuyasig penig kòn cha. Ñimbe yu yellmera tøgagøn cha, piròmeran ellmaray chibig kòn. ²⁴Incha yandø ellmarig tulisamig pubene, tru cienyugurri veinte tarømarøb tulisaiwane Faraónwan tranrrigay cha. Inchen truyugurri kòrròmisorøbigwane tramerayu tsuramiba, katø ñimba, ñimui ureemeraba, ñimui yau misaameraba, katø mayeelø ñimba warabeløba mab kòmig kònrrain— cha.

²⁵Inchen nømbe trenchibelø kòn:

—Ñibe nam øsig warønrrai martan cha. Nø yangucha tab indigwan nambe uta tōga pònrrer cha. Nambe Faraón karuindø melabelø kòmønrrun— chibelø kòn.

²⁶Incha Josebe øyeeg marøb kòmig wesrawa pasrig kòn, ellmarigu misriilan tru cien cargasyugurri veintebatø wesruigwane Faráonwein kònrrai treeg marig kòn, tru mõi kwalømgaatig. Inchen Sacerdotesmerai piròmeratøh Faraónwei kòrròmismuig kòbig kòn.

²⁷Øyamay israelitasmerabe Egipto pirau warønrrab kòrròmisorig kuig kòn, Gosén pirau. Incha nømbe truyu piròmera merrarrawa waramisra, nømbe truyube wereg nørro tøgagua, larrø nu misrig kòn.

²⁸Incha Jacobpe Egipto pirau pilamera diecisiete tsuig kòn. Inchen kerrigu Jacob nø øsig tsuin kwalømmerabe pilamera ciento cuarenta y siete kuig kòn. ²⁹Israel øsig tsum kwalømmera yandø patsønrrab kòben, nui nusrkai Joséwan wamønrrab ørabe, trenchibig kòn:

—Na ñuin kabyu tabig asønaiç kuinabene, tiusmanda ñui tasigwan nai srøptsim umbu estsar cha. Treeg marøppe na maig miaigwane trunune martrunrrig

cha undaatøga. Incha nan purø nu lastima ashib, martrab kørrømisrigwane martrunrig chibig køn. Tiusmanda nane Egiptosrømbe sørømrørrunrig chibig køn. ³⁰Incha na nai møskaløba israb tsumisrene, Egiptogurrimbe suva ya, nømun esegawa wariinutøwei wairrunrig— chibig køn.

Inchen Josébe trenchibig køn:

—Ñi maig taigwan nabe treeg maramønrrun— cha.

³¹Inchen Israelbe trenchibig køn:

—‘¡Katø! Marmø kømø, maramønrrun’ chirra— cha.

Inchen Josébe:

—¡Katø! Marmø kømø, maramønrrun— chibig køn.

Inchen Israelbe nui pøtønaig tsig pala utsøbasrøptinchibig køn.

Manaseswanba Efraínwanba Jacob Mayanguen Tabig Kønrrai Tranøb

48 ¹Indig kan maya yanayugøsrøn Joséwane trenchibelø køn:

—Nui møskaimbe kwanrø tsun— cha.

Inchen Josébe nui møskawan ashchab ippe, nui pagatø nuskalø Manaseswanba, Efraínwanba pera ibig køn.

²Inchen Jacobwane eshkabelø køn:

—Ñui nusrkai José ñun ashchab pun— cha. Inchen nøbe ke kaimatøzhig købendø, truba tranra, camayu kurra, wamisra, ³Joséwan trenchibig køn:

—Maramburab Marøb Tiusbe Canaán pirau Luz ciudayu kenamisra, nane mayanguen tabigwan trana, ⁴øyeeg cha kørrømisrig køn cha: “Nabe ñune ureg purø nørrø tøgagønrrai marøb, misag sötømera purø nørrø kønrrai maramønrrun cha. Incha nabe ñuinukkurri amrrub misaamerane i pirøwan tranen, managatig i pirøbe nømuin kønrrun” taig køn cha.

⁵Na ñiba tsunrrab arrumøwatø, ñui pagatø nusrkalø yu Egipto pirau kal-lawa ureemera tru Efraínba, Manasesbabe nai ureemera misran cha, Rubénba, Simeónba naielø køb lataitøwei. ⁶Inchen ñi tru wendau ureemera tøgagui nusrkaløbe ñuielø kønrrun cha. Incha nømbe Efraínweimba, Manasesweimba nunelø kuig køppe, truilai munchiyu pirø ketig utønrrun cha

⁷Nabe Padan Aramgurri katøle arrub megaben, ñui usri Raquelbe kwaig købig køn cha, Efrata ciudayu pumig ke lamøtø paløben. Inchen nabe Efrata may menda sørig køn cha. Truibe tru Belén kuinrre.—

⁸Incha Israelbe Joséwei nusrkalan ashiptinchabe, payibig køn:

—¿Iiløbe mumera køh?— cha.

⁹Inchene Josebe trenchibig køn:

—Iiløbe nai nusrkalø køn cha, nan yu Egipto pirau Tius keta traniilø.—

Inchen Israelbe trenchibig køn:

—Naimay kemalingaru cha, na purø tab indigwan tranrrab— cha.

¹⁰Israelbe yandø purø kølliizhig kuig kua, yandø nui kabzheeløbe tør pilømuben, tab ashchab kaimabig købig køn. Inchen Josebe nui ureemeran nui møskaweim pulu kemalsrøben, nøbe muchab, irab inchibig køn.

¹¹Inchabe Israelbe Joséwan trenchibig kòn:

—Nabe ñun asamuitamappe isumuig kòn cha. Inchendø Tiusbe nane ñui ureemeranbaguen asamig kònrrai martan— cha.

¹²Inchen Josébe uregwan nui mòskawei srøb utøyugurri tarømarøppa, kappaløwan pirausrø kebatamnegatig utsøbasrøbig kòn

¹³Incha Josébe nui pa nusrkalan Efraínwane nui kusrmay tasiitøga, Manaseswane nui atsitøga kemøra mòskawei pulu pønrsøbig kòn. Tru øyamay Efraínbe Israelwei atsimaygatømay pasramisren, Manasesbe kusrmaygatømay pasramisrøbig kòn. ¹⁴Treeg pønrsraindøgucha Israelbe nui kwalmeran ambumay imay yunømarøppa nui kusrmay tasigwane Efraínwei turbala estsarøbig kòn, wendø nusrkain kuindøgucha. Nui atsimay tasigwane Manaseswei turbala estsarøbig kòn, truike mayur nusrkain kuindøgucha.

¹⁵Incha Joséwane i wammeratøga maya nuguen tabiitø, tabiitø nebuig kònrrai øyeeg chib tranøbig kòn:

—Nai mòskalø Abrahamba, Isaacba nui merrab amønai Tius, tru nan kal-lainukkurri møingatig nan chi kømønrrai ashib tøga pasrab, katø na muba yamigwan eshka pasrab Tius, ¹⁶tru nan chine kaig pubigugurri wesrub Ángel i pagatø matsøreg-ureemeran maya nuguen tabiitø nebuig kònrrai martrunrrig chib. Incha iiløgurri nai munchiba, nai mòskalø Abrahamweimba Isaacweimba munchimerabe pønrrabig pønrrønrun cha. Nømbe pirau nørrø karrab purø nørrø larrøbitchai.

¹⁷Inchen Josebe nui mòskaimbe nui kusrmay tasigwan Efraínwei turbala estsari ashabe, tab kømui inchibig kòn. Incha mòskawei tasigwan Efraínwei turbalagurrimba Manaseswei turbalagurrimba yunømara, estsartrai inchibig kòn. ¹⁸Incha Josébe mòskawane trenchibig kòn:

—Øyan kømøtø cha, iig kòn cha, mayurbe iigweimbala ñui kusrmay tasigwan estsar— cha.

¹⁹Inchen mòskaimbe treeg marmønrrab trenchibig kòn:

—Ashar cha, nai nusrkai, ashar cha. Manaseskucha misag nørrø larrøbitchabiitøwein kòn cha, katø nøgucha larrø nuitøwein kønrrabig kua. Inchendø wendø nunebe nø lataikken sötømera kønrrun— cha.

²⁰Incha tru kwaløm Jacobpe mayanguen tabiitø nebuig kømigwan øyah chib tranøbig kòn:

—Israel misaamera mayanguen tabig nebuig kømigwan nøm tranøppe, ñimui munchiwan wamab tøga pønrrønrun cha: “Efraínwanba, Manaséswanba lataitøwei, Tius ñimun treeg martrain”— chib. Incha Manaséswan wendau pasra, Efraínwan merrab pasrig kòn. ²¹Incha trugurri Israelbe Joséwan trenchibig kòn:

—Nabe yandø kwanrrainchar cha. Inchendø Tiusbe ñimba pasrøwa, nøbe ñimune ñimui mòskalai pirømerasømay katøle amrrai martrun chibig kòn.

²²Incha nabe ñui nunelan lataguen kømø, ñibe purab nuig kuikkurri Siquén pirøwan, amorreosmeraba na truba truba nai espadatøgaba, nai arcotøgaba kwayawa tøgaguim pirøwan tranar— cha.

Jacob Nurskaleimburab Wendøsrø Maig Pub Attrabigw An Waminchib

49 ¹Jacobpe nui nusrkalan wama trenchibig køn:
—Tulaambay cha. Nabe wendø kwalømmerawansrø ñimun
maig purainrrabigwan eshkanrrab inchar cha.

²Kemalay cha, mørtrab, Jacobwei nusrkalo. Møray cha, ñimui møskai
Israel wamindigwan.

³Ñi, Ruben, nai mayur nusrkai, na unøtø misag larrø chishig kua ke
srøtø tøgaguig unø, tabig kui asig kømiguba, katø chi maramig nuig
kømiguba ñimerrig køn cha.

⁴Ñibe kan pimera køramdiig latøgushib amrrubig lataig, mømibe
yandø ñi mayurbe maskucha nuibe kømønrrabguen cha. Kaguende nai
kamayu nai sraimba trømbøig mara, ñui trag møskawei kamawan, kaig
kuig lataig mara kørrømarig køn cha.

⁵Simeónba Levibabe nunelø køben, nømui espadamerabe ka kwayab
misag kweechib tøgømiitø køn cha.

⁶Nøm chigøben kaig martrab waminchib kuigu na truyu pasrønrrab
kømøwei, nøm norrø tuliambinug na linchab kømøwein kur, nai
isubigwan na chishig tøgaguigwan mindisaig kømønrrab. Kaguende
nømbe larrø namikkøleelø pønrrøwa, misagwan kweecha petab,
mørøkkøubiitø ke kagatø, toromerai chambesrølmeran para petig køn.

⁷Larrø tsag inchib namig kurriiba, nømui namikkøbigu lastimagaig trømbøig
mariibabe larrø trømbøig nebuig købash cha. Nabe Jacobwei piraugurrimbe ke
nuinguindø misrtraï mara, Israel pirau ke truøro amba warønrrai maramønrrun.

⁸Ñi Judábe ñui nunelø chi tamgaig, katø tabig wamindig kønrrabguen.
Ñui ashig kømui inchibelane ñi kanawa tøgagønrrun. Inchen ñui trag
nuneløguen ñui merrappe utsøbartrun.

⁹Inchen ñi, nai nusrkai Judábe, kan matsinø leon lataig, nø
kemørigwan chab mabe, kan køli leon lataig pirau purø møg ashib
tsumisrøptinchibig lataig køn. ¿Nune mugui kebacha ashchautah?

¹⁰Judáwane nui karub sraua wain Pørtøsigwane kerraig kønrramøn,
katø nui karub tøgaguin pørtøsigwan lata tru nui srøb utøyugurri, tru
cierton rey arrumnegatig. Truiwane yu pirau pirø muba kuimnburab
maya misaaba nune mørig kønrrabig køn.

¹¹Judabe nui burru uvas tusryu lichippe, llug lamø burru
unøzhigwane purø tab tusr srølyu licha pasran. Nui kewa kuigwane
vinotøga tsarøppe, nui pala itø kewa kuigwane uvas anim piyu tsaran.

¹²Nui kammerabe vino lataguen kømø, mas yaløbigøzheelø køn. Inchen
nui trugulmerabe pitsø lataguen kømø, mas puløzheelø køn.

¹³Inchen Zabulónweinukkurri amrrub misaamerabe mar mendawan
warønrrabelø køben, truyube barcosmera chi isumgaig pub lliramig
kønrrabig køn. Inchen nui linderosmerabe Sidonsrøngatig lulrabelø køn.

¹⁴Isacarbe kan burru larrø murig lataig køn, kan muba webya yamga tul— unøyu keerig pigaya tsub lataig.

¹⁵Tru muba webya yamga tul-unøbe larrø tabig, pirøbe larrø chull asamdø pirø køb, katø pishindø tab tsumdiig køb køben, nøbe karga niga inrrab lligwan kegucha, ka karuindø megabig misrig køn.

¹⁶Inchen Danbe nui misaameran maig kønrrabigwan asha martrabig køn. Israelwei tru doce nusrkalai misag sötømerayu kan møikkørørøn lataitøwei.

¹⁷Danbe kan may menda tsub ul lataig køn, tsachippe kwetchab tsachib ul may menda tsubig lataig, kaullin chiñimerayu tsacha, itøguana wabigwan wendømay palasig kebinab kutsingarubig.”

¹⁸“¡Jehová, ñi kaiyugurri wesraig kømigwan muniirar!”

¹⁹Gadwane kaig marøb misag sötømera amrrua melambub kwayaindøgucha, nøbe wendautø pasraørøb ya, kwayanrrun.

²⁰“Aserbe larrø may mamiimera mabig kønrrun. Incha nøbe reywei mamiimera lataig manrrai põnsørørøn.

²¹Neftalfbe kan ishug panzhig chi ilørskaimíig uñibig lataig køn, larrø tab pan-ureezheelø peraig.

²²“Inchen Josébe kan larrø may utiguitsin tusr lataig køn, may utiguichib pi menda pasrab lataig. Tsiurøzheelø nebib ibiibe tru pirøbanrrimerasø nebib ib lataig.

²³Nune arcostøga kwayabeløbe, lastimaguengaig flechasmeratøga søl ørøb, kwayam laben,

²⁴nø srúa pasrai arcone chigucha kullaaramø srúa pasraig køn, tru Jacobwei maramburab marøb kwalmeragurri. ¡Mayanguen ungua ungua tru Jacobwei Mugucha Chindamga Tiuswan. Truikkurrin køn, tru Ubisha Ashibig, tru Israelwei kan peña lataig.

²⁵¡Mayanguen ungua ungua ñui møskawei Tius ñun purugubigwan! ¡Mayanguen ungua ungua Maramburab Marøb Tius ñun mayanguen tabig nebuig kønrrai marøbigwan! ¡Mayanguen tabig nebuig kønrrai Srømbalásrøngurri arrubiitøga! ¡Mayanguen tabig nebuig kønrrai maryu purø umbusrøngurri arrubiitøga! Pitsø mutsørøb tøgagøb katø usrai patsau tøgagøb indingurri mayanguen tabig nebuig kønrrai arrubiitøgaba.

²⁶Ñui møskaimbe tru maya nuguen tabig nebuig kømigwan ñun tranøppe, nai møskalø tru maya nuguen tabig nebuig kømigwan nan trani lataitøguen kømø tranig køn; managatig tru põnrrab tunmerasrøngatig. Tru iig mayanguen tabig nebuig kønrrai traniiløbe, Joséwei turbala kønrrain køn, nui nunelai utugurri tru lawa wesruigweinug.

²⁷Inchen Benjamínbe kan larrø namig lobo lataig køn, løtsøbe nui kemøra mamigwan ma, maabene unchibelan pirishibig.”

²⁸Iilø køn tru Jacobwei doce nusrkaløgurri misag nørø sötø amrrubelø, tru nømunba, katø nuikkurri amrrub misaameranba wendøsrø nømun kanun kanun maig pub attrabigwan eshkawa pasrig kuig køn.

Jacob Kwaig

²⁹Incha katø Jacobpe øya eshkawa pasrøbig køn:

—Nabe nai misaameraba tsunrrab yamig yandø lutau kōtan cha, nai kōlli misaameraimbulu sørørrunrig chibig cha, tru heteo Efronwein pirau peña trab pasrabigu, ³⁰tru Mamre pinrrøguesø Macpela pirau peña trab lalig pasrabigu Canaán pirausrø, Abraham tru Efron hititan peninug nui yau misaameran kwaben, sørab kømig nōmui pasrønrai. ³¹Truyube Abrahamwanba, nui srai Saranba sørab, katø Isaacwanba nui srai Rebecanba sørab indig køn. Katø nagucha Lean truyu sorig kuig køn. ³²Pøs tru pirøwanba tru peña trab lalig pasrabigwanbabe, Hititasmeran penig kuig køn.—

³³Incha Jacob mandø marøb kømigwan chab waminchabe, katøle kamayu tsumisra, neesrappe, kwaptinchibig køn. Incha merrabsrø nōmui mōskaløba isrønrrab t sumisrig køn.

50 ¹Inchen Josébe nui mōskawei asrwan ira, kishib muchabig køn. ²Incha Josébe tru mō marøbelø nun purugub pōnrrabelan nui mōskawei asrwan minchib irrøramønrrai mō marøb tamarøngarubig køn. Inchen tru mō marøbeløbe treeg marøbelø køn. ³Tru treeg tamarøb kømibe kwalømmera cuarenta nemisramne købig køn. Inchen egipciosmerabe kwalømmera setenta nemisramne isub kishibelø køn.

⁴Inchen yandø tru isub kisam kwalømmera patsøben, Josébe Faraon karub wainug purrab misaameran trenchibig køn:

—Ñim truyu purrabelai merrab ñim nan tab indamdiig kuinabene, tiusmanda Faráonwan trenchirrunrigay cha: ⁵“Nai mōskaimbe nō kwamøwatø, øyegwan marmø kømø, ¡katø! nane maramønrrun tingaruig køn cha: ‘Canaan pirausrø sōramig nō ashib tamarig pasrabigu, nun trusrø sōramig kønrrai.’ Inchawei nai mōskawan trusrø sōrønrrab ibashcha” tan chinrigay cha, nabe katø arrumønrrun— cha.

⁶Inchene Faraónbe trenchibig køn:

—Ñui mōskai øyegwan marmø kømø, ¡Katø! Martrurrunrig cha trendaigwan ñi treeg martrab misrig købene, trube, sōrønrrab inrrø— cha.

⁷Inchen Josébe mōskawan sōrønrrab nebiben, Faraonwan tru nō karub waigu purugub purabelø nōrrø kōlli misaameraba, katø Egipto pirau nōrrø kōlli misaameraba, nune linchibelø køn. ⁸Katø Joséwei yau misaamera mayamba, katø nui nunelø køben, mōskawei yau misaamera køben, nebambubelø køn. Gosén piraube nōmui ureemeranbah, ubishameranbah, cabrameranba, waarameranbahtø kōrrømara. ⁹Incha nōbabe kaulli sruin karretillamerayu suldaumera køben, suldaumera kaulli palār køben tsimaytø lincha nebambubelø køn, misag purø nōrrøgue.

¹⁰Incha Atat taigwei tirigu itsiisrø, tru Jordan pi pulusrø puabe, tsusrømbe mayangucha nu isub kishib treeg marøbelø køn. Trusrømbe Josébe mōskainzhig yandø muga misren, trattø y pa kwaløm isuin

inchib kishibig kòn. ¹¹Inchen truigwan tru Canaán pirau warab misaamera ashabe, tru Atadwei tirigu chish marin tulyu truba truba isuig kishib kui ashabe, trenchibelø kòn:

—Egipciosmera øyeekkatig kishib kuibe purø nuig kørren— cha. Inchagurri tru Jordan pi ambøgatømayrømbe Abel Mizraim cha wamig kòn. (Trenchippe: “Egipciosmera purø isui inchib puraambinug kòn” chib.)

¹²Inchen Jacobwei nusrkaløbe nømun maig martrai nø miaigwan treeg marøbelø kòn. ¹³Nui nusrkaløbe Canaán pirausrømay srua amba, Macpela pirau peñayu trab lalig pasrabigu sørabelø kòn, tru Efron hititan Abraham pirowanbañau peninug, nui yau misaameran sørab tøgagømig, tru Mamre pulusrø. ¹⁴Yandø møskawan chab sørabe, Josébe Egiptomay katø nebarrubig kòn, nui nuneløba, katø maya misamera sørønrrab lincha amrrubeløba.

¹⁵Inchen Joséwei nuneløbe møskai kwaig yandø mugaabene, trunun isub mendabe, trenchibelø kòn:

—¿Josébe namune katøgucha namig isub srø unin kønrrab kø chinderah cha, nam nun øyeeg kalø marigwan trunun isua?—

¹⁶Inchabe José waisrømay trencha karua ørøbelø kòn:

“Ñui møskaimbe nø kwamøwatø, namune trencha karua pasrig kòn cha: ¹⁷Ñimbe Joséwan øyeeg chinrigay cha: Ñui nunelø yeeg kaig marøb, ñun kalø marigwan Tiusmanda ulø paymø pesannarrunrig cha’ Inchawei møimbe tiusmanda, nam ñui møskawei Tius karuigwan marøb melabeløtøwein kuinaig købene tru trømbøig kalø mariilane pesannarrunrig” cha. Inchen øyeeg wamindigwan mørabe, Josébe kishibig kòn.

¹⁸Inchen nuneløgucha Joséwei merrab chab pua, utsøbasrabe, trenchibelø kòn:

—Nambe ñi ka karuindiig melabelø kønrrer— cha.

¹⁹Inchene Josébe trenchibig kòn:

—Chi kørig kui inchimøtay cha. ¿Nagan Tius nø marigwan na pasramisra marøb pasramuitarru? cha. ²⁰Ñimbe nane kaig martrab isua maren, trune Tiusbe tru kaig marigwane tabig punrrai yunømaran cha, tru mõi nam ashib pønrraigwan martrab, misag nørø pasrabigwan øsig tøgagønrrab. ²¹Inchawei ñimbe chi kørig kui inchimøtay cha, nabe ñimunba, ñimui ureemeranba ashib tøgagømønrrun— cha. Øyamay nui manrraugurri undaatoğa, chi isui inchimønrrai waminchibig kòn.

José Kwaig

²²Josébe nui møskawei yau misaameraba Egipto pirau tsuig købig kòn. Nøbe pilamera ciento diezkatig øsig tsuig købig kòn. ²³Incha Josébe Efrainwei katøburø awelu ureemeranguen nebua ashib, katø Manaséswei nusrkai tru Maquirwei ureemeranguen nai ureemeratøwein misran chib, srøbchagu mutab indig kuig kòn.

²⁴Incha Josébe wendøsrø nui nunelan trenchibig køn:

—Nane yandø kwamig lutau køtan cha. Inchendø Tiusbe ñimune ashchab arrua, purugunrrun cha, Abrahamwanba, Isaacwanba Jacobwanba, ¡Katø! nabe tranmø kømø, tranamønrrun cha kørrømisrin pirausrømay ñimune i piraugurri pera inrrab køn cha.—

²⁵Incha Josébe Israelwei nusrkalan, ‘¡Katø! nambe treeg maramønrrun’ tingarubig køn. Incha Josébe nømun trenchibig køn:

—Isa kømø, Tiusbe ñimun ashchab arrua, purugunrrun cha. Treeg pubene, ñimbe nai tsutsiimerane yugurri srua ambamig køn— cha.

²⁶Incha Josébe kwaig køn pilamera ciento diez nemisren. Inchen nui asrwane minchib irrømønrrai mø marøb tamara, kan taulyu wayig køn Egipto pirau.

Fin